
This is a reproduction of a library book that was digitized by Google as part of an ongoing effort to preserve the information in books and make it universally accessible.

Google™ books

<https://books.google.com>





A propos de ce livre

Ceci est une copie numérique d'un ouvrage conservé depuis des générations dans les rayonnages d'une bibliothèque avant d'être numérisé avec précaution par Google dans le cadre d'un projet visant à permettre aux internautes de découvrir l'ensemble du patrimoine littéraire mondial en ligne.

Ce livre étant relativement ancien, il n'est plus protégé par la loi sur les droits d'auteur et appartient à présent au domaine public. L'expression "appartenir au domaine public" signifie que le livre en question n'a jamais été soumis aux droits d'auteur ou que ses droits légaux sont arrivés à expiration. Les conditions requises pour qu'un livre tombe dans le domaine public peuvent varier d'un pays à l'autre. Les livres libres de droit sont autant de liens avec le passé. Ils sont les témoins de la richesse de notre histoire, de notre patrimoine culturel et de la connaissance humaine et sont trop souvent difficilement accessibles au public.

Les notes de bas de page et autres annotations en marge du texte présentes dans le volume original sont reprises dans ce fichier, comme un souvenir du long chemin parcouru par l'ouvrage depuis la maison d'édition en passant par la bibliothèque pour finalement se retrouver entre vos mains.

Consignes d'utilisation

Google est fier de travailler en partenariat avec des bibliothèques à la numérisation des ouvrages appartenant au domaine public et de les rendre ainsi accessibles à tous. Ces livres sont en effet la propriété de tous et de toutes et nous sommes tout simplement les gardiens de ce patrimoine. Il s'agit toutefois d'un projet coûteux. Par conséquent et en vue de poursuivre la diffusion de ces ressources inépuisables, nous avons pris les dispositions nécessaires afin de prévenir les éventuels abus auxquels pourraient se livrer des sites marchands tiers, notamment en instaurant des contraintes techniques relatives aux requêtes automatisées.

Nous vous demandons également de:

- + *Ne pas utiliser les fichiers à des fins commerciales* Nous avons conçu le programme Google Recherche de Livres à l'usage des particuliers. Nous vous demandons donc d'utiliser uniquement ces fichiers à des fins personnelles. Ils ne sauraient en effet être employés dans un quelconque but commercial.
- + *Ne pas procéder à des requêtes automatisées* N'envoyez aucune requête automatisée quelle qu'elle soit au système Google. Si vous effectuez des recherches concernant les logiciels de traduction, la reconnaissance optique de caractères ou tout autre domaine nécessitant de disposer d'importantes quantités de texte, n'hésitez pas à nous contacter. Nous encourageons pour la réalisation de ce type de travaux l'utilisation des ouvrages et documents appartenant au domaine public et serions heureux de vous être utile.
- + *Ne pas supprimer l'attribution* Le filigrane Google contenu dans chaque fichier est indispensable pour informer les internautes de notre projet et leur permettre d'accéder à davantage de documents par l'intermédiaire du Programme Google Recherche de Livres. Ne le supprimez en aucun cas.
- + *Rester dans la légalité* Quelle que soit l'utilisation que vous comptez faire des fichiers, n'oubliez pas qu'il est de votre responsabilité de veiller à respecter la loi. Si un ouvrage appartient au domaine public américain, n'en déduisez pas pour autant qu'il en va de même dans les autres pays. La durée légale des droits d'auteur d'un livre varie d'un pays à l'autre. Nous ne sommes donc pas en mesure de répertorier les ouvrages dont l'utilisation est autorisée et ceux dont elle ne l'est pas. Ne croyez pas que le simple fait d'afficher un livre sur Google Recherche de Livres signifie que celui-ci peut être utilisé de quelque façon que ce soit dans le monde entier. La condamnation à laquelle vous vous exposeriez en cas de violation des droits d'auteur peut être sévère.

À propos du service Google Recherche de Livres

En favorisant la recherche et l'accès à un nombre croissant de livres disponibles dans de nombreuses langues, dont le français, Google souhaite contribuer à promouvoir la diversité culturelle grâce à Google Recherche de Livres. En effet, le Programme Google Recherche de Livres permet aux internautes de découvrir le patrimoine littéraire mondial, tout en aidant les auteurs et les éditeurs à élargir leur public. Vous pouvez effectuer des recherches en ligne dans le texte intégral de cet ouvrage à l'adresse <http://books.google.com>



112

N^o 1

Sc. mil.
jm



ExElectoral^{ium}i Bibliotheca
Serenis. Vtriusq; Bauariae
Ducum.

4064

8 L. mil.

Art

1 m

R

L'art & Guidon

DE LA GVERRE, CONTE-
nant l'experience de mener & conduyre
gens de cheual & de pied, assieger vil-
les, les assaillir, & deffendre, faire
rampars, bastillons, trenchées,
batailles, bataillons, escadrons
entreprises, courses, & autres
choies appartenantes a la
guerre, vtile & necessai-
re a tous capitaines
& autres, desirans
suyure les armes.
Extraict tant des
anciës que mo-
derne liures
touchant l'art militaire

¶ On les vend a Paris, au Palays, en la grand
salle au second pillier par Arnoul l'angelier.

1552

1552
2000
1000

**Bayrische
Staatsbibliothek
München**

L'auteur aux Lecteurs.



Plusieurs plus que experts & instructz en l'art militaire ont de icelluy elegantement & vtilement escript, non seulement escript : mais suyuy l'office avecques grande sollicitude & diligence soubz de tresbons conducteurs & capitaines : desquelz toutesfois ilz n'ont suffisamment parlé, quant a ce qui diserne leur prouffit ou dommage. Reserué vng nommé Frontinus, homme de grand conseil, Lequel assez commodement & habondamment a tenu propos en ses escriptures des Martialles louenges, & belliqueux effectz. Esquelz adiouster selon la puissance, & faculté de mon petit esprit, en ensuyuant les autres escripuains (qui de ceste matiere ont aussi escript) me suis aucunement persuadé n'estre mauuais & inutile: car de la variété du temps se treuuent industries & raisons variables de guerroyer. Et ainsi que toutes empires, gouuernemēs & regēce se muent & changent en pareille sorte, avec eulx nous muōs & changeons. Et cōme en eulx suruiennent nouueaulx princes, & gouuerneurs ainsi aux hom-

Epistre

mes suruiuent nouuelle cautelle, & nouueaux
moyens de faire guerre, garder leurs villes, &
expugner les estranges se treuuent & engen-
drent, Parquoy d'aucuns les plusieurs ont vou-
lu dire qu'on ne pourroit donner certaine rei-
gle ou enseignement, qui peust valloir aucu-
nement a l'exercice, garde, prinse, prouffit, ou
dommage des gens exerceans l'art militaire.
Mais que tout conseil & enseignemēt se doibt
prendre selon l'obiet de la matiere qui se pre-
sente. Pourtant qu'il seroit besoing de trouuer
autant d'effectz & de remedes que de cas & pe-
rilz y suruiēēt, croissent, & si treuuent. A ceulx
cy ie respondray briefuement que ce qu'ilz di-
sent est aucunement vray. Mais qu'il ne peult
a peine iamais venir cas en guerre: que luy ou
son semblable aucunesfois ne soit aduenü. Ce
que nous pouōs en cas pareilz facilēmēt prou-
uer par les anciens iuristes Romains, & empe-
reurs, qui ont le temps passé construyt, fait,
ordonné & institué les loix iuridiques. Et pour-
tant qu'iceulx furent ignorez les cas aduenir
au futur temps ont ordonné qu'ilz fussent ob-
seruez au plus pres du semblable. Nous vserōs
doncques au plus pres des cas futurs du cōseil.

aux Lecteurs.

& document qu'au passé par noz peres auons esté instruitz. Toutestois ce iera l'office du prudent capitaine, ou des sages souldars regarder, & considerer toutes choses cōcernantes la tuition, deffense & honneur de leur entreprinse, & diligemment penser & examiner la sortie & fin d'icelle: Car soit en guerre ou en bataille s'il y a chose cōmise & ppetrée par ignorance, ou par faulte d'y auoir pourueu, apres on ne peut trouuer lieu d'y remedier, pour au tant que soudain que l'erreur est faicte, la peine s'ensuyt. Car bien on est tué par son ennemy, ou prins, ou par luy on reçoit honte, deshonneur, & dommage. Si doncques les capitaines, souldars, & autres qui desirent exercer l'art des armes veulent lire, apprendre, & retenir les prouffitables documents & enseignemens que j'ay redigez & mis en cestuy mien petit liure, & iceulx diligemment veoir: certes ilz seront, ou pourront estre leurs merueilleusement en tout auenement de guerre. Pource qu'il est clair & manifeste a tout homme: combien en icelle vault bon cōseil, Sans lequel rien ne pault estre, ou longuement endurer en secreté. Exemple. Que prouffiteroit auoir grand

à iii

Epistre

**exercite, & innumerable nombre de gédarmes-
rie, & de gens de pied, si d'iceulx le conducteur
& capitaine estoit ignorât, & priué de tout bõ
conseil, & que ses gens fussent sans experiẽce,
& intelligence quezlconques? Certes ce ne se-
roit fors vne assemblée de pecores ou bestes,
qui ne sçauroient quelle part tourner pour eui-
ter la mort, qui leur seroit prochaine, & seure
par leur trop grande imbecilité. Et en cela ne
les pourroit deffendre la corpulence, force, &
grádeur d'eulx: ausquelles se on vouloit total-
lement veoir, & se tenir: combien se trouue-
roit il de bestes plus dignes de porter armes, &
combatre que les hommes. Et nonobstant que
icelles bestes soient plus puissantes, grandes,
& fortes, que nous hommes: Toutesfois par
raisons nous leur sommes maieurs, domina-
teurs & maistres. Ce que nous ne serions, s'el-
les auoient le conseil & l'intellectiue aussi bõ-
ne que nous auons. D'auantage cõbien vault
bon conseil en vne guerre nous en dõne l'ex-
perience assez claire Hannibal iadis duc, & ca-
pitaine des Carthagiens: Lequel plus par son
conseil, & par ses finesses, que par puissance de
gens, anciennemẽt destruiët l'empire Romain.**

aux Lecteurs.

ou a peu pres. Je laisse tous les exemples que ie pourrois amener pour corroborer & confirmer mon dire: pource que plusieurs & presque tous sont assez aduerriz que conseil & finesse en faiët de guerre sur tout vault & prouffite. A ceste cause pourtant que ie suis deliberé de escrire le gouuernement & administration qu'on doibt tenir, & en auoir recommandatiõ a la guerre. Je ne veulx seulement parler d'icel luy conseil, tromperies, & fineses, qui s'y doiuent faire. Mais aussi tout ce que ie congnoistray appartenir au faiët d'icelle, en quelconque maniere que ce soit. Voulant deuant que commencer dire aux Lecteurs, que ce que i'en propose enseigner: I'ay extirpé, & prins de la lecture ancienne de ceulx qui en ont escript, & de maintz bons capitaines & souldardz anciens: desquelz i'ay eu & sceu l'opiniõ. Pareillement d'une partie moy mesmes me suis trouué a leur experience.

Le Guidon des gens de guerre. Fueil.j.

¶ Qu'il ne fault faire guerre sans raison.



E roy Demetrius, filz d'Antigonus, interrogué par vng sien capitaine nommé Patroclus, pourquoy il ne combattoit son ennemy puis qu'il estoit le plus fort, & de vaillance, & de nombre de gens? Pource (dist il) que quand les choses sont faictes on ne s'en peult repentir, & fault auant les cōmencer long conseil & pesante entreprise. Agesilaus prudent & sage capitaine des Licaoniens pressé pareillement de respondre aux ambassadeurs de Thebes, respōdit: Ne scauez vo⁹ pas (ô Thebains) qu'a deliberer d'une chose d'importāce, il n'est rien meilleur que le penser longuement. Plutarque à la vie de Satorius l'estime & prise grandement, de ce qu'il estoit tardif a deliberer, & grand a entreprendre. A ceste cause ie dis que deuant que cōmencer guerre fault de long tēps penser si on a iuste cause de l'esmouuoir. Et encores ne doit aucun faire guerre s'il ne la fait a l'intention que par elle il puisse viure en

A

Le Guidon

paix & tranquillité, & non affin que par guerroyer, guerre s'engēdre, qui seroit chose cruelle & inhumaine, cōme porroit aussi estre felō, vaincre & molester celluy de qui on auroit receu iniure, par amastz de gens seulement pour vne enuie de dominer, ou biē par vne cupidité auaricieuse d'estre riche. Leq̃l par autre moyē seroit facile a ramener a penitence & satisfaction : car ou la parole peult vaincre, l'espēe doibt totalement estre remise & recullée, Ou toutesfois iē ple de penitēce, i'entens de penitēce non dissimulée, mais vraye & entiere, D'auantaige s'il te peult aduenir aucun peril ou dōmaige, par vaincre avec douceur celluy qui t'offense, ie suis d'oppinion affin de dōner terreur & craiēte a ceulx q en pareil cas te pourroyent offenser, q̃ son malfait soit griefuemēt & en publicq puny : Car en ce faisant l'estime & reputation en pourra estre plus grande & louable au punissant. S'il aduiēt oultre que tu craignes que cōtre toy aucun plus puissant, ou du moins semblable, vueille faire ou esmouuoir guerre & dissention, ie tē conseille lors que le premier, s'il t'est possible, tu l'assailles : Pource que par coustume trop plus grand est


le couraige de l'assaillât q̄ du defendant. Et tout ainsi qu'il est plus vtile de mettre le premier en bataille ses soldards, & assaillir ses ennemys, ne plus ne moins te sera proffitabile de esmouuoir le premier ton aduerlaire, tât pour ce que i'ay dit dessus, que aussi en cōgnoissant par luy ton cueur nō defectueux de magnanimité, il se puisse desister de l'entreprise q̄ parauant cōtre toy il eust executée: Par ce moyen celluy qui t'auroit molesté par guerre, pourras cōtraindre devenir à faire paix & amyable accord avec toy. Vng cas est toutesfois que ie ne veulx taire : c'est deuant que cōmencer guerre (combien que tu ayes iuste raison pour la faire) que tu regardes diligēment quelle peult en estre l'issue : car il est licite & permis a chascun de faire guerre, mais de la laisser au vainqueur seulement. A ceste cause considere ta force & celle de ton ennemy, quelz ennemys, & quelz voyzins tu as, leur puissance & leur foy: a celle fin qu'ilz ne te puissent faire dommaige, lors que tu seras empesché ailleurs a faire autres armes. Et d'auantaige pense toutes choses qui te peuent aduenir, & quelle gent tu peulx par ta guerre faire amys ou ennemys, & com-

Le Guidon

me si ceulx cy t'estoient amys, & ceulx la ennemys tu pourroys venir a chef de ton entreprise. Apres toutes lesq̃lles choses tu doibs faire prouisiō & amastz de tout ce qui t'est necessaire a ton exercite & armée, & le plus secretement que tu pourras: afin que tes ennemys ne soyent aduertiz de ta deliberation, & qui'lz ne cōgnoissent la cause enquoy ilz te pourroyēt le plus molester. Et doibs de lōgue main faire les preparations : car bien souuent la preparation faicte de longue main apporte briefue victoire. Et doibt celluy qui le premier est motif de la guerre considerer toutes les despenses, necessitez & munitions qu'il est cōuenable auoir, & despēdre à icelle maintenir & paracheuer, pourtāt que si la victoire estoit prochaine, & que par faulte d'argent, de viures, & de munition elle fust retardée, ou du tout anichilée. Que seroit il autre chose de si peu saigement considerée entreprise, sinon vne honte & villennie enquoy tu tōberois ? Et pour ceste cause aduient souuent que qui legierement commence vne guerre, plus legerement beaucoup il vient au repentir, & fault aucunesfois que par legiereté d'esprit l'assaillant vienne hum-

des gens de guerre. Fueil.iii.
blement requerir paix au deffendant, qui est
vne vergongne grandement vituperable. Par-
quoy il fault penser en beaucoup de iours (cō
me disoit iadis Publius Mimus) ce qu'il fault
faire en vng.

Quel Coronal, Chef, ou Capitaine
il fault eslire pour la guerre.

Oronal, ou Capitaine pour ton
armée, ie te cōseille estre vng qui
soit noble & de bōne maison, qui
ayme sō hōneur plus q̄ sa vie, &
qu'il soit sans vice: Car qui veult
sur autruy dominer, il est besoing que premie-
remēt luy mesmes se domine & maistrise: Car
ou l'appetit, c'est assauoir la sensualité domine
& gouuerne, toute raison cesse, Sans laquelle
seulemēt par figure, nō par effect, nous pouōs
estre appelez hommes. Et sur tous vices doibt
fuyr le bon Capitaine luxure & auarice deux
maulx, q̄ tout le mōde doibt aussi euitier, pour
ce qu'ilz engendrent effectz innumerables. La
luxure rend l'home infame, & à ses amys &
ennemys cōtēnible, & qui plus est dōmagea-
ble. C'est que si le Capitaine est luxurieux &

A iii

Le Guidon

paillard, pareillement le ferōt ses souldars. Car cōmunemēt si le chef est malade, les membres s'en sentēt. Et à ceste cause les souldars avecques leur capitaine deuiēnt effeminez, chose aussi cōtraire à l'homme de guerre, comme est l'eau au feu. Pourtant que ce pendant qu'ilz s'adōnēt aux actes veneriens, ilz perdēt la force qui appartient seulemēt au vaillāt hōme, en laquelle faire demeure ilz debueroient totalement labourer, ce qu'ilz ne peuent suyuant ceste lubricité cōtagieuse, qui leur oste entierement le pouoir non seulemēt du corps, mais aussi de l'entendement. Et d'auātage l'hōme en qui sera luxure à peine iamaïs pourra estre vertueux: tāt fort se hayssent vertu & luxure. Entre lesquelles ne peult estre aucune esperance de paix, ny d'amytié. L'avarice pareillemēt du capitaine rēd paresseuse sa cōpaignie & couarde, iasache qu'en icelle soit multitude de gētilz cōpaignōs, Et n'ont courage les souldars pour leur avaritieux chef (& à ceste cause odieux) faire aucuns actes de valeur, & eulx exposer & mettre aux perilz au dōmage de leurs personnes. Car ilz pensent qu'en vain ilz trauielleroient, & sans raison se mettroient aux dāgers

des gens de guerre. Fu.iiii

de la mort, s'ilz faisoient seruice à leur capitaine, duquel ilz ne cuyderoient tirer apres leur bienfaire, aucun emolument, profit, ou recompense, de ce qu'a le seruir loyallement auroient exposé & mis. Qui est la cause que le plus souvent se perdēt les batailles: Car on ne scauroit mieulx oster le cueur d'vng bon compaignon q̄ de luy oster sa paye, & sans le cueur le corps ne sert plus que de monstre. Parquoy ie dis, que si le capitaine est auaritieux, & qu'il ne face son debuoir de bien faire cōtenter ses gens, qu'a toute peine pourra il iamais auoir vire de ses ennemys. Mais que fault il referer toutes choses? quand la fontaine & le cōmēcemēt de tous maulx sont ces deux vices, luxure & auarice. Qultre il est besoing que celluy que pour capitaine tu voudras eslire soit biē fortuné & heureux. Pourtāt qu'il est des hōmes tant malheureux de nature, & ausquelz est tant aduersaire fortune, que ce leur est chose peculiere & commune d'estre tousiours surmōtez & vaincuz. Et ne pourroient à cela obuier quelque multitude & puissance de gens de guerre qui leur fust en ayde, tāt ilz sont esloignez de l'heur d'obtenir & rapporter triumphe & gloire vi-

A.iiii

Le Guidon

Etorieuse de leurs ennemys. Il est donques requis à vng bon capitaine estre heureux, & aussi que des sa ieunesse il ayt tousiours milité & suyuy les gës de guerre en bõne reputation de sa personne soubz de bõs Capitaines, & qui se soit tousiours trouué au reng de ceulx qui par leur bien faire meritent hõneur & louenge de tous leurs compaignons. Non pas encores seulement d'eulx: mais aussi des estrãgiers. Par ce moyen experimenté, il pourra estre crainct de ses ennemys, & obey singulieremēt de ses souldars, ausquelz il fault aussi qu'il soit egal & sēblable en habillemens, & qu'il ne cõmette aucune chose impetueusemēt ou legieremēt faicte encõtre iceulx: mais suyuant raison & discretion. Il ya beau coup d'autres choses qui appartiennent à l'election d'ung bon Capitaine que ie declarerois icy, si ce n'estoit que habondamment i'en ay faicte declaration en deux autres liures q̃i'ay cõposez, & aussi que i'en parle encores en plusieurs chapitres ensuyuans.

¶ Qu'il fault auoir patience, & dissimuler en la guerre.

des gens de guerre. Fueil.v.



L ya beaucoup de choses qu'il est besoïg d'endurer en tēps de guerre, lesquelles en tēps de paix ne seroit licite supporter, & ne fault en guerre de toutes les iniures qui te pourroïēt estre faictes incōtinent te venger: mais conuient & debuons ainsi faire, dissimuler icelles iniures, & en retarder la vengeance iusques apres la guerre finye. Affin qu'en vng mesmes instāt nous ne nous cōpariōs & faciōs plusieurs ennemys: desquelz l'ipetuositē nous seroit difficile ou bien impossible à supporter. Il n'est certes rien plus legier que de commencer noyse; mais l'appaiser, & en venir au dessus avecques son honneur, rien n'est moins facile. Et encores les petites estincelles (desquelles nous ne tenons grande extime) causent le plus souuēt & excitēt grādz bruslemens, & arsure.

¶ Quand il fault qu'vng Capitaine ayt vng cuer inuincible.



Le sage capitaine qui est tresexpert en l'art militaire ne doibt iamais ou vaincu, ou vainqueur se reposer, ou desesperer. Mais tousiours se monstrier courageux, & magna-

nime sans faire estime ou de la victoire, ou de la perte: Car par ce moyen vaincu, ou victorieux, ses ennemis le craindront plus qu'homme du monde. Et absent & present, penseront qu'il leur peult estre de grand dommage. Par quoy le capitaine de tel cueur pourra aysemēt auoir paix (s'il la demande) de ses ennemis, ou bien louenge & victoire.

¶ Cautelle pour prendre vne ville d'assault.



Toutes villes ou chasteaulx sont plus aysez a prédre par vng costé que par autre. Parquoy en icelle part que la ville, ou le chasteau est plus difficile & malaisé à assailir, doibt le capitaine ou chef de l'entreprinse faire retirer toutes ses trôpettes, & tabourins, & de ce lieu faire viuemēt & chauldemēt sonner l'assault. A celle fin que par leur horrible clameur: & impetueux sons esmeuz ceux qui sont cōmis, & instituez pour la deffence de la ville se transportent celle part, pour receuoir les assaillās. Par ce moyen se pourra laisser aucune partie de la ville sans garde: Par laquelle

des gens de guerre. Fu.vi.

le capitaine fera donner l'assault chauldemét. Car ou il ya peu de deffendans avecques plus petite perte de gens on peult escheller les murailles, & d'auantage le petit nombre de gens est souuent mesprisé par la multitude, Aussi la multitude peu, ou iamais par le petit nombre de gens est surmontée. Encores autrement en cela pourra faire le bon capitaine, c'est que les ennemys le plus souuent laissent la part de la ville (qu'ilz veullét deffendre) la plus forte: & la moins prenable avecques petite garde. Et se retirent volūtiers vers le costé de la ville, qu'iz sentent le plus foible: & ou ilz cuident auoir l'assault. A ceste cause doibt le prudent capitaine (s'il cōgnoist le lieu conuenable pour ce faire (prendre la meilleure part de ses souldards, & les plus gentilz compaignons, tant de sa gendarmerie que des gens de pied: & faire assaillir la forteresse de la ville ou il ny a tant de gens pour la deffence qu'aux autres lieux plus foibles. Et ainsi pourra facilement gagner la ville pour les raisons dessusdictes.

¶ Qu'il fault faire quand on sçait que ses ennemys sont les plus fors de gens.



Qu la multitude des ennemys sera plus grande que la nostre le conseil sera vtile, que si aupres de nostre armée nous auons gens sus la mer q̄ d'iceulx nous les renforcions, ou bien s'il n'en y a, que soudainement nous mettions peine de gagner quelque gent voyline, affin qu'en nombre & en vertu nous leur soyons semblables, car la multitude des ennemys fait aucunes fois paour au petit nombre, & aussi pour croistre nostre armée nous pouons dōner craincte fort grande à noz ennemys quand ilz sçauront que nous aurons secours contre leur esperance, & que nostre armée sera creue contre leur opinion. Alors pour vray par si grande alacrité de courage, ilz ne nous assauldront comme auant l'augmentation & recreue de noz gentilz eussent peu faire. Le bon Capitaine doncques aura souuenance de croistre & multiplier tousiours son armée tāt qu'il pourra sans regarder aux impēses & despences de deniers qu'en cela il sçauroit faire, affin que de nombre & de vertu de gens il soit plus grand du moins semblable a ses ennemys.

des gens de guerre?

Fueil.vii.

¶ Qu'il est visupetable à vng capitaine en
este tenir ses gens en maisons & soubz
couuertures.



Vng capitaine doit estre grand
honte, ou plus tresgrand. des hon-
neur en temps estial & chault te-
nir ses gens soubz couuertures, au-
quel temps il deneroit fortement & virilemēt
parfournir la guerre. Et ne donne à entendre
celluy qui en tel temps les tient en maisons à
ses ennemys, sinon q̄ luy & ses gens sont ten-
dres, delicatz & sans experience d'auoir iamais
souffert aucun traual, qui seroit la cause prin-
cipale de le faire contēner & mespriser à ceulx
qui le pourroyent craindre, si au soleil, à la
pluye & au vent, au chault & au froid il tenoit
ses soldardz, lesquelz il doit plus tost entrete-
nir au labour p̄ exercice, & à la peine q̄ non pas
au seiour & aux delices: affin qu'apres auoir
souffert grands traualx, & accoustumez es
grādz labours, la peine qu'ilz pourroyēt auoir
au fait des armes, ilz trouuassent legiere & pe-
tite au regard des maulx par eulx deuant tolle-
rez & soustenuz: car riens n'est plus grand ny
meilleur à vng soldard ou à aultre que l'acou-

flumance des grands labours, pour autant que par iceulx les moindres sont estimez de petite importance, combien que qui souuent y regarderoit de pres, les pourroit cuyder estre importables.

¶ Qu'il faut eslire & prendre le lieu ou lon veult donner bataille à son aduantage.



Le capitaine deuant que donner la bataille à ses ennemys, regarde luy mesme le lieu ouquel il a deliberation la donner, ie dis luy mesme: car plus vault le tesmoignage d'un qui la veu que de dix qui l'ont ouy dire, aussi rien n'est plus fidele q l'aspect propre. Et en ceste contéplation & veue des lieux doibt entatiuement cōsiderer ce qui luy pourroit estre vtile ou nuyfible, & en quelle forte selon la situation du lieu il pourroit ordonner ses gens. Et s'il peult faire quelque finesse, ou surprédre ses ennemys, ou bien si p eulx peult estre surprins & assailly à son preiudice: Mais deuant que la se transporter se soubuiendra le

de gens de guerre. Fueil.viii.
prudent capitaine de faire explorer & cōgnoître par ses plus familiers & fidelles explorateurs ou espies s'il y a point la aucun dangier de ses ennemys, & s'il y peult aller seurement a celle fin qu'en sa personne ne fust faict moleste ou violence au preiudice de toute son armée.

¶ De quelz habillemens fault qu'un capitaine soit vestu.

D'Abillemens vn capitaine soit semblable a ses soldards car en cela il acquerra merueilleusement la faueur de ceulx qui sont soubz sa charge, pource qu'ilz penseront a l'occasion d'eulx estre fait, & q par vne vraye humilité & honnesteté leur capitaine, sans se monstrier enuers eulx superbe ou arrogant, desire totallemēt estre esgal a leur volonté: toutesfois il est necessaire, cōbien qu'il soit pareil en habitz, qu'en vertu il les surmonte, pour autant qu'il est conuenable a celluy qui a domination sur autrui que d'autant qu'il a illustre auctorité sur luy que d'autant il soit maius en vertueuse operation & bonnes meurs,

Le Guidon

autrement le nom de capitaine mauuaisement
meriteroit s'il estoit inferieur & moindre en
vertu de ses subiectz.

Qu'il fault cognoistre les meurs de ses
ennemys deuant que leur donner la ba-
taille.

DE s'assembler pour cōbatre avec ses
ennemys, sans premierement con-
gnoistre leurs meurs & façō de fai-
re est merueilleusement de grand
peril' & par cela souuent à maintes armées ad-
uiuent de tresgrandz dommaiges, & si le captai-
ne est fin & non ignorant le faict de la guerre
certainement iamais ne viendra au combat a-
uec ses ennemys que premierement il n'ayt
congneu entierement leur mode, & façō de
faire. Pour autant que toutes les nations du
monde ne ont semblable action & maniere
de faire guerre ou combatre. Auecques les
vngs fault ordonner sa gendarmerie, & ses
gens de pied en vne sorte, & auecques les
autres en vng autre sorte les vngs fault com-
batre ainsi, & les autres autrement. Par-
quoy il est besoing de congnoistre les gens

des gens de guerre.

Fueil.ix.

a qui lon a affaire, & avec celle congnoissance ne fault oublier au saige capitaine sur le tout de son affaire de s'enquerir & demander le conseil que tiennent & qu'ont deliberé faire ses espies, par lesquelz il peult estre aduertý des conditions d'eux, & de leur deliberation, selon laquelle il doibt mettre ordre en ses gens.

¶ Des Allemans & François.

Q V and lon fait guerre aux Allemans ou François on doibt tant qu'il sera possible prolonger, & eslongneur le combat, & vniuersel conflit ou bataille, pource que l'une & l'autre nation est delicate en leurs corps & ípatiente aux peines & labeurs, & sont merueilleusement tost lassez par soif & par faim: Parquoy souuent cõme nō acoustumez a porter trauaulx deuiēent foibles & sans force de telle sorte qu'ilz n'ont puissance d'eulx defendre ny d'assaillir, A ceste cause p dissimulatiõ on peult d'iceulx facilement obtenir ce que par force seroit peult estre impossible, car François & Allemans sont chaulx & bouillans &

B i

Le Guidon

qui chaudement les assauroit il seroit de grād peine estaindre & abollir si extreme challeur. Il fault donc plus enuers eulx vser d'attēte que de legiereté si on en veult la victoire. Pareillemēt si contre les autres nations veullent les François & Allemās esmouuoir & faire guerre pour les surmonter facilemēt : ilz doibuent chaudement les assaillir & molester, pourtant qu'ilz sont plus duiētz a porter les armes que aucune autre nation, & n'est gent si duiēte a la guerre qu'eulx: combien qu'ilz ne sçauent dissimuler comme les Italiens & Espaignolz, esquelz principalement gist dissimulation, finesse & prolongation de temps, dont ilz ont plus que de cueur ne de force.

¶ Qu'il est besoing faire quand en vn camp s'engendrent noyses & dissentions.



Vand en vn cāp il suruient quelque tumulte ou dissention ciuile entre les bandes des vngz contre les autres, le coronal de la'rmée, ou les capitaines desdictes bandes doibuent gratieusement & par doulces paroles appaiser leur vouloir eschauffé des gens

de gens de guerre.

Fueil.x.

darmes, & des esmeuz soldardz, & apres auoir estainct & appaisé le tumulte ou sedition: les aucteurs estans cause d'icelle tant seulemēt faire punir par glaiue, c'est a dire qu'aux inuen- teurs par qui la noise fut commencée, on doit faire publiquemēt trācher les testes, ou iceulx enuoyer en prison parfonde, iusques au temps plus cōuenable a disposer de leurs personnes, a celle fin que la peine soit a peu de gēs & l'e- xemple a beaucoup, & aussi par telle punition publique soldars puis apres se gardēt de nour- rir ou susciter telles seditions pernicieuses & dommageables, ce qu'ilz feront de peur d'en- courir semblables peines.

¶ De la maniere comment il fault regar- der le fort auquel sont ses ennemys.



Et capitaine qui a vouloir d'entēdre cōbiē les forts ou forteresses de ses ennemys sōt munies & defēsables, doit simuler la paix avec eulx & pce moyen soubz espee de chose hōneste il pour- ra enuoyer des explorateurs ou espies experts & sçauans en l'art des armes deuers eulx, qui pcurront diligemment congnoistre de quelles

B ii

Le Guidon

forces sôt leurs villes ou chasteaux, & par quel chemin ou par quel moyen on les pourroit assaillir & surprendre. Et apres leur raport fait il sera facile les faire assaillir, ou de nuyct ou de iour, selon qu'il sçaura que le tēps luy sera plus conuenable, & que la force de ses ennemys sera grande. Enquoy faisant facilement en pourra venir au dessus, & auoir victoire d'eulx: car c'est vne chose de petite peine surmonter celuy qui ne se dōne garde, & aussi facile affaire que de vaincre vng homme endormy.

¶ Que le capitaine doibt prendre la paix quand elle luy est offerte, plus tost que la guerre.

VNg sage capitaine iamais ne doibt refuser la paix qui luy peult apporter aucun honneur ou vtilité, encores qu'il feust en grosse esperāce d'obtenir victoire, de peur que fortune, laquelle peult estre seroit lors pour luy, ne tournast sa roue, & qu'en lieu de luy estre fauorable ne luy fust contraire & chāgeable, & que par sa reuolte & changement, luy qui cuyderoit estre vainqueur seroit vaincu, ce qu'on voit aduenir souuent: car tel reffuse qui apres muse.

des gens de guerre.

F. xi.

¶ Des trompettes, tabourins & bruy
qu'il est bon de faire quād on veul
venir au combat.



Vand noz ennemys approchent &
que nous sommes si fort approchez
qu'il ne reste que de laisser courre,
il ne sera point mauuais de cōman-
der a tous les harquebousiers de mettre le feu
aux haquebutes, aux trompettes de haultemēt
sonner, & a tous vniuersellement crier, en for-
te que des sons, clameurs, & cris soit emply
l'air, & que par iceulx les ennemys soiēt estō-
nez, & noz gens le courage creu, combien cer-
tes telle maniere est prouffitable aux comba-
tans, la desconfiture Pompeienne (qui ne sera
iamais mise en oubly) nous en fait experien-
ce, pource que Pompée voyant les Romains
ses ennemys prestz a combattre, commanda a
ses gens que sans bruyt & sans clameur, petit a
petit assaillissent leurs ennemys, ce qu'ilz fei-
rent, qui fut la cause de les faire deffaire, &
tourner en fuyte.

¶ Quelz gens il fault pour l'ar-
riere garde.

B iiii

Le Guidon



Yt bonne souuenâce vn bon capitaine qu'il fault tousiours qu'il mette en vne arriere gardé les plus gẽtilz cõpaignõs & ceulx a qui il a le plus de fiance. Pource qu'icelle entiere sans dangier pourra estre le reste de ses bandes, ou bien par elle se pourra auoir victoire glorieuse des ennemys, pour autant que les autres en combatant petit a petit s'amoindrissent, appetissent, & lassent. Et l'arriere garde ainsi garnie de gens cõme dessus, recête & fresche de puissance, desirant de combatre courageusement, se messera avec ses ennemys, lesquelz deffaïre sera petit labour, veu que desia ilz seront las, & qu'ilz trouueront encores les derniers trop plus ardans, vehemens, & de plus haulte force que n'auroient trouué les premiers assaillans: qui leur fera peine nõ portable, & par ce moyé perte de bataille & dõmage, tant es biens que es personnes.

¶ Des grandes & riches villes.

LEs grandes & opulẽtes villes ne sont de longue demeure en leur prosperité, s'ilz n'ont aux chãps tousiours quelques en-

des gens de guerre. Fueil.xii.
nemys. Parquoy ces villes qui ont si grád empire & domination opulète, & qui se gouuernent par annuelz magistratz, doibuent regarder a tousiours auoir quelque vng leur contraire, affin qu'elles ne soient detenues par paresse en delices par lesquelles viennent tous mauix: car ce qui fait auoir prosperité a telles villes, c'est le labour & l'exercice des citoyens, priuez duquel la chose publique deuient rien. Ainsi que nous pouons assez facilement coniecturer par Rome, a laquelle tant qu'a esté Carthage ennemye & cōtraire tousiours a l'empire Romain a flory en bien, force & amys. Mais Carthage abbatue & demolye, pareillemēt Rome & sa puissancc a esté ruynée & perdue.

¶ Qu'il est bon de faire quand on veut mettre le siege deuant vne ville.



Qu'ad on veult mettre le siege deuant quelque ville, le coronal ou capitaine doibt vne partie de ses gens & la plus forte faire tenir en armes, iusques a tant que le camp seroit biē assiz & posé, & aussi que tou-

B iiii

Le Guidon

tes les munitions d'icelluy seront parfaites: car bien souuent en mettant vng siege sans tenir ordre aduiēt que les assiegeans sont par les assiegez assailliz & mis en fuyte, ruyne & desconfiture, & par ce moyen on a veu bien grosse armée estre perdue & deffaite, d'autant qu'il n'est difficile vne armée deffaite, qui est sans armes & sans crainte de tel aduenement quād soudainement par quelque nombre de gens bien equippez elle est bien vigoreusement assaillie: cecy peult estre assez prouué par les esclauons, lesquelz surprins des Venitiens, furent vilainement chassez, vaincuz & desconfitz.

¶ Qu'il fault faire pour garder son amy en temps de guerre.

Q Vand vng capitaine (contrainct par quelque necessité) soudainement ne peult donner ayde ou secours à son amy, s'il sçait qu'il soit en grād peine pour l'empeschement de ses ennemys, il doibt diligemment iceulx ennemys de toute sa puissance mester, punir, & d'iceulx prendre vltion & vengeance, affin que au temps aduenir ses autres

des gens de guerre: Fu.xiii.

amys qui le congnoistrôt stable & fidelle persiflent enuers luy en l'amytié desia promise, doanée ou confermée, & leur sera grand exemple qu'ilz debueront tenir fidelité immortelle a celluy qui en telle sorte auroit vendu son amy, ce qu'ilz feront de meilleur cueur & de plus franche volonté sans iamaïs aller au contraire de ce qu'ilvouldra leur dire, prier ou commander. Ainsi ont tousiours les anciens Romains entretenues & gardées, les Barbares & estrangieres nations soubz leur empire, & domination, toutessois ne soys paompt a faire amys : mais constant & ferme a les entretenir quand tu les auras comme dit Suetone que faisoit Auguste Cesar.

Que soubdaineté est bonne en la guerre.

LEs chasteaulx & villes encores qu'elles soyent fortes & de bien difficile prinse souuentessois par soubdaineté (qui est de toutes besongnes victrice) sont opprimées & surprises. A ceste cause doibt n'estre ignorant le bon capitaine que le meilleur bien qu'il puisse auoir pour venir a chef bien tost de ses

Le Guidon

entreprinſes : c'eſt d'eſtre diligent & ſoubdain
a executer apres auoieurement determiné
& conſulté ſon affaire: car l'experience anciē-
ne & moderne donnent aſſez a entendre com-
bien vault diligence en la guerre, par laquelle
en lieu d'eſtre vaincu, ou eſt vainqueur. Cecy
teſmoignera Scandabergus, iadis roy des Eſcla-
uons qui par ſa diligēce contre le Turcq a ob-
tenues les plus belles victoires de ce monde.

¶ De l'ordre qu'il fault tenir en vne bataille.



'Eſt vne choſe de grande ſeureté
quand les gens de guerre ne paſ-
ſent & excedēt leur ordre en vn
combat, & eſt plus que neceſſai-
re a ceulx qui deſirent obtenir la
victoire marcher en bonne ordonnāce, par la-
quelle eſt tresfacile a l'acquerir. A ceſte cauſe
le capitaine doit non pas vne fois ſeulement:
mais deux, trois, quatre fois admōneſter & fai-
re commandement a ſes gens ſur peine de la
hard, ou autre peine: qu'il ny ayt homme en ſa
troupe ſi oſé ne ſi hardy de ſortir ny paſſer le

des gens de guerre. Fueil.xiiii.
lieu ou il sera mis, & mesmemēt quād on veult
combatre avecques la gent orientale : car par
ce moyen on les peult tuer comme bestes: au-
quel edict, admonnestement, ou cōmandemēt
du capitaine doit chascun des gens de guerre
obtemperer & obeyr, ce qu'ilz ferōt aysemēt:
mais que leur chef & conducteur soit en repu-
tation d'estre en tel cas experimenté, encores
pour mieulx retenir les compaignons en leur
ordre est necessaire au capitaine eslire les plus
gentilz compaignons de sa troupe & les plus
experimentez, que nous appellons maintenāt
sergens de bande: afin qu'eulx hors des rengz
puissēt remettre ceulx qu'ilz verrōt passer leur
ordre, & par eulx & leur bonne ordonnance &
cōduicte les batailles presque pdues se pour-
ront reintegrer, & les compaignies par sa puis-
sance des ennemys presque rompues pourrōt
remettre en leur entier: Car ilz peuvent veoir
mieulx le deffault des troupes, que ne font
pas les propres capitaines d'icelles.

EQu'il est bon de faire a l'assault d'une
ville que lon sçait mal garnye de gēs
pour la deffendre.

Le Guidon



Il on ſçait qu'en la ville qu'on veut prendre ne ſoyent grands gens de guerre pour la deffendre, le conſeil eſt, qu'il la fault (ſ'il eſt poſſible) toute enuirõner de gës, & de iour & de nuyt luy liurer & donner aſſault ſans ceſſer aucune-ment, & la fault battre chauldemêt. A celle fin que les gens d'icelle ſoient tant laſſez, que cõ-straintz ſoient d'eulx rendre. Ce qu'ilz ſeront cõtrainctz de bien toſt faire, pource qu'il n'eſt homme ſi vaillant & robuſte qui puiſſe auoir longue durèe ſans reposer, & ne pourroit tant fuſt il vaillant fournir inceſſamment au combat. A ceſte cauſe a l'expugnation & prinſe de vne ville, fault au capitaine que diligemment il ſ'enquiere quel nombre de gens peult eſtre en la ville qu'il veut aſſieger, & ſ'ilz ſont aſſez pour la deffendre de nuyt, de iour, & a toutes les heures.

¶ Qu'il fault faire en temps de paix.

O V les armes ceſſent, & qu'il n'eſt bruyt d'aucune guerre, le capitaine ne doit pourtāt laiſſer ſeiourner ou reposer ſes

des gens de guerre.

Fueil.xv.

subiectz : mais les contraigne & efforce de labourer, ou faire labourer la terre, avec la presence de leurs personnes: affin q̄ par leur agriculture & rentes terriennes ilz puissent nourrir & payer sa gendarmerie. Aussi que par continuel exercice & labeur, il puisse contregarder les corps robustes de ses souldards, & les maintenir en bon poinct, lesquelz ne sera mal, fait que ce pendant ilz munissent & fortifient les villes par fossez, rampars & autres choses qu'ilz congnoistront estre profitables a la defense d'icelles.

¶ Qu'il est bon & mauuais en la guerre aucunesfois faindre des nouuelles.

Nouuelles faictes en vn camp aucunesfois nuytent, aucunesfois prouffitent. Pour ceste cause le saige capitaine doit souuent faire semer, promulguer & espandre pour son aduantaige, tant en son ost qu'en iceluy de ses ennemys nouuelles faulses & faictes par hommes fainctz & cauteleux : car par icelles souuent il fera peur a ses ennemys, & les desmouuera de leur entreprise, & souuent par icelles il croistra le cueur & le couraige de ses gens.

Le Guidon

¶ De l'office d'un bon capitaine.

Riens plus fascheux ou malaisé a faire a ses soldardz commande le capitaine, que luy mesmes ne peult & ne voulust faire. Et qu'il se souuienne aussi qu'il est bon aucunesfois simuler d'auoir paour ou vouloir fuyr, pour paruenir a la victoire, qui par ce moyé aucunesfois peult aduenir.

¶ Pour congnoistre si vne ville tient pour toy, ou si elle est contre toy.

OV un capitaine a souspeçon d'une ville, ou si elle est son amye ou son ennemye, il fault pour en auoir cōgnoissance qu'il leur face demande de quelque grosse somme de deniers, ou de viures pour les gens : Et en cela pourra sçauoir leur intention, car si elle luy est amye, elle ne refusera la demande, si ennemye ne voudra la octroyer, & par le refus, ou par l'octroy, alors il doibt proceder selon qu'il verra estre a faire.

¶ Qu'il fault tousiours en la guerre auoir bonne esperance.

des gens de guerre. Fueil.xvi.

EN vne guerre encores qu'elle soit grande & dangereuse ne doit vn bon capitaine iamais se desesperer, pourtant que la fin & l'extremité d'une guerre est variable & incertaine, & souuent la fin n'est semblable au commencement, car a ceste heure aux vngs fortune est fauorable, a ceste heure aux autres, & n'est tousiours pardurablement bonne : mais maintenant aydante cestuy, & puis soudainement luy nuyt pour ayder l'autre.

Qu'il fault au capitaine regarder la situation de la ville qu'il veult assieger.

LE capitaine doit regarder curieusement luy mesmes la situation de la ville qu'il veult assieger deuant q̄ y cāpager, pource que toute ville est plus facile d'un costé a prendre ou assieger q̄ de l'autre, & a moins de dommage de ses gens, & doit principalement regarder ou la sieté de son camp sera plus aduantageuse a ses gēs pour demeurer & plus profitable & en quel lieu il sera plus expedient la faire, pour plustost mettre fin a son siege & a la prise de la ville qu'il voudra auoir, & ne se fie tāt

Le Guidon

a autruy que luy mesmes n'en face l'exploration & veue.

Qu'il fault vng capitaine estre liberal
a donner liberté a tout le monde, mes-
mes aux captifz & prisonniers.



Liberté franchement obserue le ca-
pitaine, mesmement la croisse &
multiplie apres la prise des pro-
uinces des villes, & l'expugnatiō
des chasteaulx & forteresses: car
il n'est riens qui ameine les prisonniers & ca-
ptifz plus tost a beniuolence & amytié que de
vser enuers eulx d'honesteté liberalle, qui est
aucunesfois cause de leur faire oublier celles
qu'ilz portoyent parauāt a leur seigneur ou ca-
pitaine, & n'est souuent mauuais que aux pri-
sonniers tu faces grace, nō seulement par leur
donner franchise & liberté: mais aussi en leur
donnant presens & dons pour les amollir & ti-
rer a ton amour, ce q̄ pourras faire facilement:
pourtant qu'il n'est chose a l'hōme plus amya-
ble q̄ liberté & liberalité, pour lesquelles pos-
seder il n'est viuant qui n'exposast son corps a
mille perilz.

¶ Qu'il fault faire quand on ne sçait par quel costé doyuent venir les ennemys.

Toutes les fois que tu es aduerty par quel chemin ou par quel costé te doyuent venir assaillir tes ennemys, & si tu ignores commēt en ce temps tu doibs ordonner & mettre tes gens en bataille, il est besoing que les mettes en quarré, & que les faces marcher en telle ordre : car par ce moyen ton batallon sera de toutes les pars en seureté, & nulle des parties ne pourra estre surprise impourueue: parquoy priuez de leur intention les ennemys qui cuydoyent surprendre aucune partie de tes gens par derriere, ou par les costez, seront confuz & mis p toy en fuyte, ou du moins sera ta troupe par ce moyen sauuée d'eulx & gardée : En telle doubte il n'est meilleur ne pl⁹ seur batallon que le carré.

¶ Quand on voit ses ennemys ne tenir aucun ordre.

C

Le Guidon



Vád les ordres de noz ennemys nous voyons troubles & pleines de craincte, il fault (si tu les veulx sans grande peine deffaire) que avecques les plus gentilz compaignons de ta trouppes vigoreusement tu les assailles deuant que de ceste peur ilz soyent priuez & bāniz, car filz reuenoyēt en leur ordre & en leur cueur, ilz seroyent avec plus grand danger, & plus grande perte de toy & de tes gens combatuz, & ou par leur desordre & craincte les eusses peu vaincre, par leur bon ordre, cueur & hardiessē reprise serois en peril d'estre vaincu.

¶ En quel lieu les gens de guerre douybuent demourer pour estre plus forts & robustes.



Es lieux montueux & aspres rendent les gens de guerre forts & robustes, & au contraire les lieux amenes & delicieux les font imbecilles & molz. Pour ceste cause les ieunes gens qui ont enuie de suyuir les

des gens de guerre. Fueil.xviii,
armes, & non seulement eulx: mais ausi les ve
teranes & vieulx soldards (qui ont esté lōgue
ment en repoz & tranquillité de leurs person
nes) se doibuent exercer en montaignes aspres
& rocqz pierreux: Affin que par l'asperité des
lieux, ilz soyent fai&tz plus aspres & rudes. Et
fault qu'un capitaine pense que d'autant qu'il
fera exerciter ses gens, que d'autant ilz seront
en vne besongne plus legiers & mieulx execu
tans: car sans exercice, il est impossible d'auoir
gens preux & dispotz. Et ou le capitaine n'au
roit ses gens en telz lieux que dessus, mais en
câpaigne & platz pays, il doibt souuent iceulx
partir & diuiser en deux, & contraindre com
batre les vngz contre les autres, sans toutef
uoyes que ce soit iusques au sang espandre, af
fin que par trop grande altercation ne s'engen
draist aucune guerre entre eulx & discorde, par
laquelle aux bandes & compaignies souuent
aduient perte & dommaige.

¶ Qu'il fault faire a vn capitaine s'il y a
aucune de ses bandes qui deffaillent a
vn combat.

C ii

Le Guidon



I aucune compaignie ou bande p faulte de cuer mauuaisemēt fault au cōbat, ou qu'elle se retire d'icelluy par meschansetē & trahison, affin que les aures bandes par elle ne perdent cuer, le coronal ou capitaine doibt deuant elles haultement & publiquement dire que la retraicte d'icelle bande deffaillante a esté faicte par son commandement & conseil, & q nonobstant icelle (sans laquelle il a tousiours cuydé surmonter ses ennemys) qu'elles prennent couraige & volonté de bien faire, ce qu'elles seront aduerties que par le commandement du capitaine icelle bande se sera retirée.

¶ Pour sçauoir le conseil des ennemys.

POur congnoistre, sçauoir, & entendre le cōseil & l'entente de ses ennemys deuers eulx soient enuoyez gens fins, cauteleux, & non ignares du fait de la guerre, qui soubz couuerture d'estre fugitifz, soyent explorateurs & espies, & par iceulx soyent pris le temps & lieu propice pour sceller & executer leur entreprinse, selon laquelle, apres auoir diligem-

des gens de guerre, Fu.xix.
ment enquis du vouloir des ennemys aduer-
tissent leurs capitaines fidellement & loyau-
ment,lesquelz la chose bien considerée,enten-
due,& avec leurs plus saiges de leurs gens con-
sultée l'executeront ainsi qu'ilz trouuerront
par leur conseil estre a faire.

¶ De ceulx qui sont assiegez.

Qui sont assiegez doibuent par vng ob-
iect vray semblable aux assiegeâs dō-
ner a entendre qu'il ont munition suf-
fisante, & qui sont plus que habondans en ce
qui discerne la tuitiō & garde de leur ville en-
cores qu'ilz n'ayent munitiō aucune, & qu'ilz
soient mal garniz, affin qu'iceulx assiegeans
priuez, par ce defesperance d'auoir bien tost la
ville(cōme ilz cuydoiēt parauant) s'en aillent
& qu'ilz lieuent leur siege, ce qu'ilz font souuēt.

¶ Qu'il fault faire si deux bandes pre-
tendent s'assembler ensemble pour
ayder l'une a l'autre.

Si deux bādes te molestēt grandemēt, &
qu'ilz s'efforcent de leur ioindre pour se
secourir l'une l'autre, il t'est besoing que
prinse, & eslite la meilleure part de tes gens le
plus tost qu'il te sera possible, tu t'efforces de

C iii

Le Guidon

opprimer, & deffaire l'une d'icelles deuant qu'elles s'assemblent. En ceste sorte Hasdrubal duc de Carthage, avecques son grand exercice fut deffaict (ou au vray dire) l'empire de Crathage destruyt, & celluy de Romme creu & augmenté, tant fut vehemente la violence des Romains a la deffaicte d'icelluy Hasdrubal, & de son ost.

¶ De l'astuce qu'il fault auoir a prendre vne ville.

S I tu ne peulx prendre vne ville par force, & que tu cuydes que ton siege pourroit estre trop longuement deuant elle sans y prouffiter, ie te conseille qu'avec toutes tes gens puis ça, puis la autour de la ville, & assez loig d'elle tu te retires, & puis apres tu t'en reculles si loing que ceulx qui sont en la ville n'attendent plus le siege, & puis soubdainemēt retournes, & sans demeure donne l'assault. Par ce moyen, cōme tonte esbahie, & de nouveau assiegée, & impourueue de conseil, tu pourras facilement auoir, prendre & posseder.

¶ Vng conseil pour augmenter, & croistre vng ost sans despence.

des gens de guerre. Fu.xx.

S Il aduiēt q̄ loing de ta terre tu vueil
les faire quelque expeditis de guer
re que tu cuydes estre perilleuse, &
dāgereuse, tu feras pour vng conseil
tresvtile appeller, & assembler tous les gentilz
hommes, & les plus riches de la terre, & leur
feras cōmandemens qu'vng tel iour ilz se tien
nent bien montez, & bien armez en tel lieu, &
quand a ce iour ilz feront au lieu assigné, s'ilz
n'ont enuie, ou qu'il leur soit moleste aller en
icelle expedition: qu'ilz soient contrainctz y
aller en personne, ou bien avecques leurs ar
mes, & cheuaulx y enuoyer vng homme pour
leurs personnes, & ce conseil vīa Scypion l'af
rican, quand il alla a l'expeditiō de Carthage.

¶ De vne prouffitabile loy qu'on doit
faire en vng temps de guerre en vng
pays.

Q Ve ceste loy soit mise en vng pays,
en vne ville, ou en vng royaulme,
que le capitaine d'vne bande vain
cue s'il retourne de la guerre, aura
la teste couppée: par ce moyen, ou il surmon
tera son ennemy, ou en le combatant hardi
ment avec fame & gloire imortelle sera occis,

C iiii

Le Guidon

& toutes choses en sa bāde avecques plus grāde cure & sollicitude, ordōnera que si telle loy n'estoit point. Aussi il n'endurera ses souldars demourer otieux: mais les detiendra en continue exercitation & continuelz labeurs, & souvent les admonnestera en leur rememorant la loy du pays, pour laq̃lle euit, ou qu'ilz soient vainqueurs, ou qu'au combat vaillamment se facent tous detrencher & occire, & d'auantage leur remonstrera qu'il n'est riens meilleur a gens de cueur qui veulent estre escriptz au nōbre des gens de bien, que mourir fortement & vaillamment en combatāt pour la vertu, honneur & victoire.

Qu'il fault fuyr excessiueté & superflue despence.



Excessiueté en habiliemēs, en boyre & manger, enerue, pert & gaste l'entendement & le corps des hōmes. A ceste cause les sages disent qu'il la fault fuyr a toutes gēs cōme exciale, contagieuse & dōmageable. Ce que doit faire principalement vng Capitaine, prenant

des gens de guerre. Fu. xxi.
exemple à Hannibal, qui apres tant de glorieu-
ses victoires obtenues a Cannes cōtre les Ro-
mains, fut par iceulx chassé des Itales, pour
auoir trop tenu son armée en delices & exces-
siuetez de viandes, qui souuent sont cause de
perdre vne armée, mesmes vng royaulme tant
soit il riche, puissant & fort.

En fortune prospere qu'on doit
fuyr insolence & orgueil.

En prosperité ou felicité ne soit su-
perbe ou insolent le bon capital
ne, mais de plus en plus se garde
qu'il ne tombe en incōuenient par
sa vile negligence & insolēte gloi-
re, lesquelles suynt voluntiers la malheureuse
fortune: Et par icelles souuent beaucoup de
gens ont esté mis vilainement a honte & ver-
gongne. A ceste cause qui aura prosperité ne
soit par elle superbe & glorieux, & qui l'aura
aduerse, malle & contraire, ne soit pourtant
desesperé & mat: Mais tousiours tant a l'heu-
reuse qu'a l'aduerse fortune moderément se
maintiēne: Car la prudence & sagesse de l'hō-

Le Guidon

me se cōgnoist plus en son aduersité, qu'en son bon heur, par qui souuent l'homme pert la cōgnoissance de soy mesmes, qu'il doibt auoir sur toutes choses deuât les yeulx, en ensuyuât l'admōnestement qui fut premieremēt escript en la porte du temple d'Apollo delphique.

¶ Qu'il fault abatre les villes & chasteaulx foibles, qui sont sur les frontieres des ennemys.



Vx prouinces & pays des frontieres sont aucunesfois plusieurs villes & chasteaulx, qui ne se peuent cōtre les ennemys aucunemēt garder, parquoy le conseil est trefvtil. Le qu'iceulx chasteaulx ou villes soiēt mises en ruyne, & bruslées. A celle fin que par icelles, les ennemys ne puissent aller ouvenir, ou bien obtenir, & auoir viures, tant pour eulx, que pour leurs cheualx. Et pour obuier a cela, & que pour les laisser en leur estre ne soient secours, retraict, & nourriture a noz ennemys, elles se doibuent totalement abatre & desmolir. Et non seulement les chasteaulx, ou les vil-

des gens de guerre. Fu.xxii.

les: Mais aussi debuons corrompre, ou par venin ou autrement, les herbaiges, les fontaines, les puits, & les chemins. Affin qu'iceulx noz ennemis ne puissent paruenir iusques en nostre terre, sans grâdes despenses, ou bien sans grand peril & dangier de leurs personnes. Cecy practiqua tresbiē Messire Anne de Montmorēcy • Connestable de France a la venue de l'Empereur a Aix en Prouence.

Qu'il fault acquerir & garder
ses amys.



Out bon capitaine doit estre solliciteux d'acq̃rir amys, & iceulx acquis les garder & conseruer. Pource que par eulx, les grands royaumes sont cōseruez & augmentez, & aussi (s'ilz sont vrayz & nō fainctz) en eulx gist vng secours & ayde non commune & vulgaire, tant grande est la force d'amytie, qui est de l'humain genre conseruatrice, & consolation des miserables. D'auantage n'aura pas celluy autant de mains, de langues, de yeulx, & de piedz en sa puissance comme il aura d'amys? Certes ouy, & pourtant sera de plus grand peril au Roy, capitaine, ou autre d'estre

Le Guidon

sans amys que d'estre sans argent: Toutesfois nous nous debuons garder des amys simulez, comme nous auons prouué plus que suffisante par Alexandre le grand qui se faisoit guerir de quelques playes qu'il auoit receues en quelque bataille, fut reprins de son grád amy Parmeno d'estre trop hazardeux a la guerre: auquel Alexádre dit assure moy mon amy Parmeno de ceulx qui sont amys dissimulez; car ie me garderay bieu des manifestes.

¶ Qu'i fault aux assiegez tenir bon iusques a l'extremité.



N vne dure obsidiõ, ou fort siege, il fault que les assiegez endurent deuant qu'eulx rendre des maulx presques intollera- bles, pource qu'aux hõmes rien n'est plus louable que la saicte fidelité & loy- aulté diuine: laquelle hors d'eulx, quelle chose scauroit on trouuer plus en leurs person- nes dignes de bien & d'honneur? Icelle donc- ques les assiegez gardent & maintiennent en eulx insques a l'extremité de leur vie, & pour

des gens de guerre. **Fueil.xxiii.**

elle garder, ne facent reffuz aucunement de quelzconques tourmens, combien qu'ilz soyēt importables: Pource que souuent ceulx fortune eslieue hault & leur donne prosperité, lesquels ne pēsoyent par aucun moyen y pouoir iamais paruenir: A ceste cause quī sont en tel accessoire (nonobstant quelq̄ mal qu'ilz ayēt) virilement de toute leur puissance persistent en la foy par eulx promise a leur seigneur, pour lequel doibuent exposer & corps & biens: car riens plus louable ne pourroit aduenir a l'homme que pour garder sa foy n'estimer la mort, & en icelle plus tost se mettre que rompre, demollir & faulser ce qu'il a promis.

¶ Comment par feu on peult empescher le chemin des ennemys.



Ar feu aucunesfois aux soldards aduient salut: pource que la ou la multitude des ennemys est si pchainne qu'il n'est possible de les euer sans grand dommaige, Il est tresbon de faire tant que grande & copieuse quantité de boys soit menée entre tes enne-

Le Guidon

mys & toy, & puis que tu faces desparquer tes gens au moindre bruyt que tu pourras, & le plus tost, & les faire retirer auoc leur bagaige aux lieux les plus seurs que tu cuyderas pour la tuition de leurs personnes: Toutesfois auât leur partement feras mettre le feu dedans le dict boyz ainsi assemblé comme ie t'ay dict: car la flâme, & la fumée empescheront la veue de tes ennemys, & garderont qu'ilz ne voyent ta retraicte, & si ne pourront seurement pour le danger d'icelluy feu te suyure ou molester: Parquoy deuant que le feu soit totalement estainct tu pourras avec tes gens gaigner long pays, & seur, sans estre en danger de tesdictz ennemys.

¶ Vn conseil pour garder ses ennemys de leur enfuyr.



Que tes ennemys vsent de retraicte, & qu'ilz s'enfuyent, & que tu ne pourras bonnement avecques tous tes gens les suyuir, avecques ta gendarmerie & gés de cheual t'est besoing les poursuyure, & par iceulx retarder leur fuytte iusques a tant que tes gens de pied

de gens de guerre. Fueil. xxiiii.
seront a ton ayde, lesquelz ioinctz avec tes gés
de cheual te sera plus aduantageux le combat,
& plus facilement avec moindre perte de tes
gens tu pourras iceulx vaincre & surmonter.

C De la maniere d'assieger vne ville.



V siege d'vneville ou dūg
chasteau te sera merueil-
leusement profitable fai-
re circuyr, & enuironner
icelle de parfondz fossez,
& faire tout al'entour des
tranchées, & haultz ram-
parts de terre: affin q̄ d'i-
ceulx tu puisses faire battre les grosses tours &
murailles, & aussi que les assiegez ne puissent
aucunement sortir, ou bien qu'aucun ne faiche
entrer dedás pour leur donner ayde & cōfort,
autrement il te seroit terriblement difficile de
prendre vne forte ville, pourtant que soudai-
nement pourroit appeller avec elle, & adioin-
dre ayde estrangere & frais secours, & pour-
royent admonnester & aduertir son Roy ou
prince de son estat, & q̄lle necessité elle pour-

Le Guidon

roit auoir, ou combien de temps sa force pourroit tenir cōtre ton siege. Pour euitier lesquelz inconueniens, il te sera plus que vtile de faire ainsi que i'ay dit dessus : Encores s'il aduient d'adventure que tes ennemys soyent trop obstinez a defendre quelque ville contre toy que tu auras assiegée, tu feras tresbien apres l'auoir prinse, ou par assaulx ou autrement de faire couper les mains a tous ceulx de dedans, qui auroyent esté cause de si longue tenue, afin que leur grand' peine & pardurable tourment soit exemple aux autres, & que les villes voy fines ne persistent si fort en leur oppinion & pertinacité.

¶ Pour euitier les empeschemens, fallaces & tromperies de ses ennemys.



LEs cauillations, embusches, & finesses de ses ennemys se euitent pour souuent se muer de lieu en autre : car par trop demeurer en oy siueté en vn lieu telz conseilz se prennent par eulx, & les executent aucunes fois a grand perte & dommaige de ceulx contre lesquelz ilz sont executez.

des gens de guerre.

Fucil.xxv.

Qu'il fault plustost recepuoir à mercy
les assiegez en quelque ville, que d'at-
tendre les auoir par armes.



Lest plus vtile & plus seur be-
nignement receuoir ses enne-
mys à mercy, que experimen-
ter par armes la doubte de la
fortune de la guerre : laquelle
souuentefois engendre diuers & variables ef-
fectz. Et ceulx qu'on cuyde le plus souuent
vaincuz, elle les fait vaincueurs contre l'opi-
nion de tout le monde : D'auantage tant
trompeuse elle est, que lors qu'elle nous flate
& qu'elle nous rit, c'est quand il est bon de
se garder d'elle. Enfuyuons donques ce faige,
& partout assez manifeste conseil, que trop
plus meilleur est paix seur, que la victoire es-
perée, De la vraye paix, ie parle non pas de la
faincte : car par la simulée trop plustost nous
sommen surmontez, que nous ne serions par
guerre ouuerte.

Pour boucher vng port de mer.

D


Le Guidon

POur boucher vn haure ou port de mer ie te donne ce conseil, que tu faces percer & emplir de grosses pierres la plus grande nef que tu pourras trouuer, & fais icelle submerger & effondrer au trauers du port que tu voudras empescher: car les pierres ainsi assemblées dedans la nef ainsi effondrée empescheront les nauires qui sont dedans sortir & les autres y entter.


¶ Pour passer vne riuiera.

POur passer vn fleuue ou vne riuiera qui est quelq̃ peu difficile a passer a gué, ce cōseil te sera bon: c'est que tu faces au dessus du lieu ou tu voudras faire passer tes gés mettre grand nōbre de cheuaulx & de iumens dedans l'eau laq̃lle plus legerement, & en moindre quātité coulera ou lieu ou tu voudras passer, & ne sera si haulte, pour l'obstacle deuant dict, qui empeschera aucunement son cours: ainsi feist Alexandre le grand, quand il voulut passer le Nil.

des gens de guerre. Fueil.xxvi.
¶ Pour congnoistre si ton ennemy
a paour.

 Vand nous voyons & congnoissons
noz ennemys auoir paour, plus fort
nous debuons insister & nous effor
cer que deuant qu'ilz soyent rassem
rez nous les chassions ou deffacions : Facile te
fera la congnoissance de leur craincte, se tu as
aucune experience du fait de la guerre. Et d'a
uantaige tu le pourras sçauoir par ce moyen,
c'est que si tes ennemys remuent & changent
souuent de place & d'asiete de leur camp, lors
c'est signe euident de leur paour: A ceste cause
leur vouloir doibt estre essayé par leur presen
ter alarmes & escarmouches: Car aucunesfois
aduiant qu'ilz ne se remuent sinon qu'en dissi
mulant la fuytte ilz nous puissent tromper &
deceuoir, pour nous vaincre & matter.

¶ Pour contraindre ton ennemy a ve
nir au combat,

 Our esmouuoir & amener tes enne
mys au combat, encores qu'ilz soyét
en lieu mauuais, ou à leur desauanta
ge, fais marcher de tes gens deuers

D ii

Le Guidon

aucune de leurs villes ou chasteaux a qui tu feras donner assaut viuement, & ce pēdant que se dōnera lediēt assaut, tu tiendras le demeurant en armes & en bataille, car si lesdiēz ennemys n'ont volūté de perdre leurdictē ville ilz ne fauldront descendre & venir a combatre maulgré eulx & selon ta volūté.

¶ Vn conseil qui est bon a executer quand tu as enuie de retirer tes gens de ton cāp.



Vn capitaine qui veult euader, & fuyr la perte, qui pourroit encourir pour attendre, est de besoing qu'en son camp, il face faire le moins de feuz qu'il luy sera possible, & que pour se retirer il face mettre des cabassetz, harnoys, ou heaulmes dessus haultz pieux pour abuser les ennemys, lesquelz cuyderont que des armetz ainsi fichez ce soyent gens de guerre, & par ce moyen ne sçauront s'il sera encores au camp ou s'il s'en sera retiré avec ses gens, en telle maniere il e schappera leur force & danger.

des gens de guerre. Fucil.xxvñ.

¶ Qu'il fault faire en ta retraiſte, ſi tes ennemys ſuyuent ton arrieregarde.



Quand tes ennemys te ſuyuent faiſant retraiſte, & qu'ilz vont dōnans alarmes a ton arrieregarde: il fault qu'en icelle tu mettes les mieulx monteſ, armez, & gētilz compaignons, autrement toutes les autres bandes pourroient eſtre en grand dangier, & pourrois faire grand perte tant de gens que de bagage, pour la charge que leſdictz ennemys feroient a ton arrieregarde, qui doit eſtre la tution du demeurāt, & ſeroit legieremēt deſfaicte ſi les plus vaillās & mieulx equippez ny eſtoient mis, ce qu'il n'auiedra ſi telles gens tu y metz qui puiſſent deffendre, & garder la force de tes ennemys: affin qu'ilz ne t'empeschēt le chemin qu'as pourpēſé ſuyure pour te ſauuer, & eulx auſſi: ceſte conſtāce & faſon de faire eurent iadis les Romains: car ilz mettoient les plus fors & mieulx armez de leurs legions en l'arrieregarde, & ſ'appelloient ceulx qui y eſtoient mis Triariens, ſi que quand leurs ennemys auoiēt vaincu l'auātgarde, & la batail-

D iiii

Le Guidon

se, laissez de combatre, estoient souuentes fois
urmontez par lesdictz Triariens, qu'ilz trou-
uoiet fraiz, reposez, plus fors & mieulx armez
que les premiers: Ainsi toute la force des Ro-
mains, & esperance estoit mise en leur arriere
garde, & pour ceste cause en feirent iadis vng
prouerbe; qui se dit, ceste chose est venue ius-
ques aux Triariens: c'est a dire a l'extremite, &
derniere esperance.

¶ Qu'il ne se fault fier aux Barbares,
& gens d'estrange nation.



Ng sage capitaine ne se fiera ia-
mais, s'il me croit aux gens Bar-
bares qui sont felons & cruelz:
Pourtat que l'experiée est plus
que commune qu'il ny a poit de
foy en eulx, ce que ie pourrois prouuer par les
faictz des anciens, si ce n'estoit pour eraincte
d'estre en mō dire trop prolix, ce que ie vueil
fuyr & euter a mon pouoir, & me suffira de di-
re que les Baabares sont tant seulement hom-
mes de figure: mais cruaulté de bestes cruelles,
monstres horribles, & felōs, encores plus per-
nicieux & dangereux que les monstres, & pro-
premeūt sont iceulx mesmes: hors qu'ilz ont

des gens de guerre. Fu.xxviii.

l'entèdemèt plus cler: & que la raison les peult mieulx cōduire: car ilz aymēt tant l'effusiō du sang humain qu'en cela ilz surmōtēt tout gère d'animaulx. Garde toy doncqs de la singuliere desloyaulté d'iceulx & ne te cuides iamais saul ué, & mis hors de leurs trōperies & deceuāces. Ce q̄ ie te dis des barbares: c'est des ifideles: cōme des turcs, & autres dōt tu te voudrois ser uir en ta necessité: car il est peu de chresties qui ayēt leuouloir si mauuais: cōc ie t'ay dit dessus.

¶ Qu'il te fault faire si tu es contrainct avec petit nōbre de gens cōbatre yne multitude de tes ennemys.

Toutes les fois qu'une petite troupe de gens est cōtraincte en combatre beaucoup. Il est besoing a icelle petite troupe s'assembler plus serré qu'elle pourra, & ainsi serrée qu'elle se iecte en la multitude, ou elle pētera q̄ le chef de l'armée de ses ennemys sera, lequel de toute sa force taschera tuer & occire: affin q̄ luy mort le demeurāt de ses gēs se desesperent, ce qu'ilz feront legierement: Car apres que la teste est couppée ce n'est rien des au-

D iiii

Le Guidon

tres membres. Par ce moyen le petit nombre de gens sera vainqueur de la grosse multitude, ou du moins aura occasion de se sauluer. Ainsi fut deffaicte nostre armée deuant Pauie.

¶ Comment il fault qu'vng capitaine se maintienne enuers ses souldars.

VN coronal ou capitaine doit ouyr le moins qu'il peult, les crimes, noyes & dissentions de ses autres capitaines ou souldars, & d'auenture s'il aduient que quelque necessité le contraigne a les ouyr & escouter, il doit par parolles & effect donner a entendre aux autres, que maugré luy il fault qu'il en prenne congnoissance. En ceste sorte attirera & acquerra leur amour, leur cuer, & beniuolence. Aussi il est besoing qu'il soit a ses souldars comme pere, non comme seigneur enuers ses seruiteurs, ou comme maistre enuers ses varletz. Ains fault qu'il regarde a estre plus tost hōnoré d'eulx q̄ crainct.

¶ Qu'il fault abstenir de raur & contaminer les choses sacrées.

des gens de guetre. Fueil.xxix.



L fault a vng capitaine a la prins
se de quelque ville faire faire cō-
mandement sur peine de la hart,
ou sur quelque autre grand'pei-
ne, que nul des siens ne soit har-
dy de raurir, prendre, piller, contaminer, ou ap-
proprier a son vsage chose sacrée & appartenā
te a l'eglise, & au seruice de Dieu. Contre le-
quel son commandement s'il se trouue aucun
chargé desdictes despouilles, soubdainement
soit puny en son corps, affin que n'ayons Dieux
& les hommes contre nous.

¶ Apres vne bataille gaignée qu'un ca-
pitaine se doibt monstrier liberal en-
uers ses gens de guerre.



Vng capitaine apres auoir eue victoi-
re de ses ennemys, doibt ioyeuse-
ment donner a tous ses gens, qui re-
stent argēt, cheuaulx, armes, & tou-
tes choses qui seront en sa puissance, affin que
par telle largesse, & non vulgaire liberalité il
les réde au temps aduenir plus promptz a leur

Le Guidon

exposer & mettre aux perilz , & plus loyaulx en tout: Car vne fidele compaignie certainement endurera auant toute misere, ouy le peril de la mort, combien qu'il luy soit manifeste pour soubtenir & garder de deshonneur son Capitaine , qui aura esté enuers elle tant magnifique, clement & liberal. Tu doibs vser doncques de liberalité enuers tes gens: par laquelle non seulement les cueurs des hommes: Mais aussi les dieux sont reconciliez & amenez a toute ayde. Souuiène toy aussi qu'apres vne bataillé , que tu doibs tant qu'il t'est possible louer tes souldars , & les remercier bien fort de la fidelité qu'ilz t'ont gardée, & du peril , ouquel se sont voulu mettre pour toy , & ou ilz n'ont laissé a faire chose qui feust digne de fortresse & d'honneur, pour te donner serui-ce, & faire obeyssance. Par ce moyen tu les pourras auoir tousiours a ton commâdement: Car il n'est riens que desire plus le souldard que son bien faire soit recongneu de son Capitaine.

¶ Qu'il fault fuyr deshonneur & mau-
uaise renommée.

des gens de guerre. **Fu. xxx.**



Admonnestes tes gens de guerre incessamment, ne riens plus craindre que le deshonneur & mauuaise renommée: laquelle acquise par l'homme, il n'a aucune raison de dire qu'il soit vif: ains est mort de toute bonne compagnie. Parquoy il doibt fuyr ceste reputation cōme vng breu-uage intoxicique & venefique, encores plus, pour ce que par luy seulement le corps meurt. Mais par mauuaise fame & male reputation, non seulement le corps, mais aussi l'ame est trespassee du monde, & effacée du nombre des bien viuans. A ceste cause doibt le bon capitaine auoir en recommandation honneur, lequel il mettra tousiours deuant les yeulx de ceulx qui marcheront dessoubz sa charge: Par ce moyen il sera presque tousiours asseuré de auoir victoire: car par nulle ignominie, honte, ou reproche, ne se laissera noter vne troupe qui ayme gloire & son honneur: mais pour les euitier, se exposera a mille grādz perilz & pertes innumerables.

**¶ De l'office d'vng bon capitaine a vne
assemblée d'vne bataille.**

Le Guidon



'Affaire d'vng bõ capitaine
a vne bataille est de se trou
uer aux premiers rêgs pour
dõner ayde a ceulx qui sont
blecez, ou lassez par gens
fraiz & nouveaulx, & aussi
que de veoir vng capitaine
auecques les premiers aug
mente le courage des gens de guerre, & donne
crainte a ses ennemys: Toutesfois il n'est be
soing que longuement il face demeure au pre
mier fronc: mais fault qu'apres auoir ordonné
les p̃miers qn'il s'en retourne diligẽmẽt, autre
part prendre garde a ce qui est expedient pour
la garde de ses gens, & qui est plus conuenable
de faire pour nuyre a ses ennemys: Aussi est
necessaire qu'il mette toute diligence, que la
ou il verra des blecez ou mors que soudaine
ment de fraiz il emplisse leur place, & doit
d'auantage mettre peine de croistre & augmẽ
ter tousiours les premiers rengs des plus gen
tilz compaignons de sa troupe.

¶ Apres la victoire qu'il fault faire
des prisonniers.

des gens de guerre. Fueil. xxxi.

A victoire acquise doit vn chef de guerre ou capitaine cōseruer & garder ceulx qui n'ont esté cruelz, & selon en la guerre: car riens n'est plus irraisonnable, plus inhumain, & plus approchant de la nature des bestes irraisonnables, que a son semblable estre estrange, lesquelz aymeroyent plus tost endurer tous les maulx du monde deuant que venir soubz sa cruelle puissance. Les villes & chasteaux qui seront aduertiz de telle ferocité experimēteront plus tost la fortune de la guerre q̄ de vouloir se rendre a seigneur tant cruel. A ceste cause vng capitaine qui veult venir au dessus de ses desirs doit estre begnin & facile tant a ses soldars, q̄ aux estranges: & doit chascun honorer, & vser de liberalité & franchise, brief il ne doit riens laisser dont il puisse gagner les cuerus de tout le monde, sans les contraindre a obeir a ses cōmandemens & entreprinſes: toutesfois il se souuendra que la ou le peril à esté moindre q̄ il vse de moindre victoire: affin que par leger droict il ne se monstre par trop seuer qui seroit chose ridicule & digne de mocquerie: car il n'est pertinent a vn ſaigē & prudent ca-

Le Guidon

pitaine vser de' plus grand cruaulté que la victoire n'est grande, ne que le requiert l'affaire. Examine donc le temps & la besongne apres sa victoire, & selon eulx suyue la raison nō son ire, qui ne peult estre sans cruaulté: Trois choses certes (comme disoit Agesilaus) doit auoir le bon capitaine par necessité: c'est assauoir audace contre ses ennemys, enuers ses subiectz amitié, & beniuolence & raison, selon les oportunitiez des temps, en ayant lesquelles iamais il ne pourra mal vser en chose qu'il entreprenne.

¶ Qu'il fault tenir foy & promesse, mesmement a ses ennemys.



A foy & promesse (quelle qu'elle soit) qu'un capitaine aura donnee, soit a roy, prince ou a cité, ayt tousiours souuenance de maintenir & garder inuiolée, quelque chose que ses ennemys luy dicent: car qu'est ce d'un capitaine sans foy, sinon vng corps sans ame? il est hay de tout le monde, il est terreur a chascū, iamais en riens ne peult estre creu. A ceste cause non seulement a ses amys est licite garder sa foy: mais aussi a ses ennemys, & les promesses

de gens de guerre. Fueil. xxxii.

a eulx faictes en bonne foy tenir, fans iamaïs contreuenir a icelles : Ainſi ont faict maintz ſaiges hōmes & prudens, meſmement Scipion l'African, qui durant les trefues avec ſes ennemis les Carthagiens: par iceulx iniurié, moqué & meſpriſé, pour ſon honneur, & celui de Rome ſe voulut toujours garder au temps d'induces prendre vëgeance de ceulx deſquelz facilement l'eult eue: mais plus ayma obſeruer la foy promiſe a iceulx Carthagiens, hommes fans foy & loyauté, que de venger les iniures faictes par eulx en ſa propre perſonne, comme non ignorant les fraudes & tromperies plus aux ſerfs qu'aux nobles appartenir.

¶ De l'office d'un capitaine en ſes affaires.

L'Office d'un bon capitaine eſt de veiller, eſtre diligēt, faire toutes choſes vertueuſement, fans ce que aucun ſommeil, aucun labeur, ou bien aucune volupté ne le puiſſe rappeler de ſon entreprinſe, & de ſon office : Inceſſamment, il doit eſtre attentif & preſt a trouuer & chercher toutes les occaſions du monde qu'il pourra pour nuyre a ſes

Le Guidon


ennemys, & deffendre ses amys & alliez: Auf-
si qu'il n'espargne or ny argent, pour scauoir
que ses ennemys font de iour en iour, ouy
fil peult d'heure en heure, Ce qu'il pourra fa-
cilement entendre par aucuns fidelles explora-
teurs ou espies, lesquelz il doibt cōtenter avec
argent & presens, & encores avec promesses de
leur faire large remuneration, & recōpense de
leur bon seruice: & par ce moyen il pourra ob-
uier a quelque grosse perte qu'il pourroit en-
cōrrir sans eulx, ou bien auoir victoire de ses
ennemys.

Qu'il fault faire quand d'une par tu es
d'un fleue & de l'autre part sont les
ennemys qui ont enuie d'icelluy passer
pour venir deuers toy.

Sil t'aduiēt quelque fois d'auoir dres-
sé tes têtes aupres d'un fleue, & que
de l'autre costé soyent tes ennemys
qui ayent volūté de passer deuers
toy, tu leur dois faire voye, & leur permettre
le passage d'icelluy, en faisant semblant de te
retiter, & t'en fuyr: & quand tu seras aduert

des gens de guerre. Fueil. xxxiii.
que la plus grand' partie de leur troupe sera
passée par deuers toy, soubdainemēt avec tou
te ta puissance assaulx la : Car plus facilement
tu seras vainqueur d'une partie, que si tout e-
stoit ensemble, avec cela en combatant ceulx
qui sont de ton costé, tu doibs aussi garder que
les autres qui sont demourez de l'autre part du
fleuve ne passent pour secourir ceulx que tu
combats.

¶ Qu'il fault faire quand on voit son ar-
mée auoir craincte des ennemys.

 Il le capitaine (qui pretend com-
batre ses ennemys) congnoist q̄
ses gens ayent paour d'iceulx, il
doibt prolonger & differer le cō
bat, en faifāt la cause pourquoy
il n'a intention de combattre, car durant que
craincte est en ses gens s'il combattoit, c'est cho-
se seure que ses ennemys seroyent les maistres
& qu'ilz vaincroient : pource qu'en la guerre,
audace & seure experience de vaincre donnēt
souuēt la victoire, & craincte & paour la fuyt-
te & la deffaicte. Garde toy doncques de me-
ner au combat tes gens, s'ilz ont paour, car ilz

E

Le Guidon

pourroyent estre incontinent desconfitz & de-
faictz, mais en prolongeant le temps de la ba-
taille, efforce toy chasser de leur courage cest e-
paour, par leur donner a entendre des choses
qui sont a leur aduantaige, combien qu'il soit
au contraire, & te fonde principalement a leur
donner esperance de gagner en estant vainc-
queurs, afin qu'ilz bannissent d'eulx la crain-
cte conceue en leurs cueurs.

¶ De l'indigence de viures & munitions de tes ennemys.

Toutes les fois que l'exercite de tes en-
nemys a deffaillance de munitions & de
viures, pertinacement fault s'abstenir de com-
batre, afin que tes ennemys soyent consom-
mez p faim: & en ceste sorte tu acquerras & ob-
tiendras victoire d'iceulx, sans aucune effusion
de sang des tiens, pource qu'un ost qui est as-
siegé deuant que mourir de faim s'essayera en
tout ce qu'il luy sera possible pour molester
son ennemy, & eschaper le peril ou il est: mais
vng faige capitaine ententif & qui a soing de
contregarder ses gens aduerty de leur indigen-
ce & faulte, pour quelque reproche ou insita-

des gens de guerre. Fueil xxxiiii.
tion que luy faichent dire ou donner ses enne-
mys, ne doibt iamais leur accorder bataille, &
doit plus tost considerer la fin de sa besongne
que la honte, qu'on luy pourroit faire.

¶ Q u'il ne fault iamais donner bataille
sans grande necessité.

Mais il ne fault cōsentir le cō
bat a tes ennemys si vrgēte ne-
cessité ne t'y cōtrainct, ou que
l'oportunité ne te soit meruei-
leusemēt grāde: car il n'est gue-
res difficile a prendre ou vaincre les capitaines
qui descendent & viennent au combat toutes
les fois qu'il leur est présenté par leurs enne-
mys: Et telz capitaines qui accordent a tous
propoz bataille sont sans experience aucune
de guerre, & ignorans de l'instabilité de fortu-
ne: laquelle se monstre ioyeuse & obsequieuse
a maintz: Affin que petit de tēps apres, elle les
rende miserables & malheureux. C'e qu'a bien
sceu Marcus empereur, duc & capitaine Rom-
main tresprudent, lequel apres q par deux fois
eut mis en fuyte l'exercite du Roy nōmé Boc-
chus, Et icelluy presque du tout ruyné, a icel-

E ii

Le Guidon

luy Bocchus requerant trefues, de bon cueur les luy accorda contre l'oppinion des plus sages capitaines de son ost, ainsi que memoratif de l'inconstance de ladicte fortune: laquelle le plus souuēt les vaincuz eslieue & met en hault & les vainqueurs opprime & met bas.

¶ Qu'il fault totalemēt s'abstenir de donner bataille, si d'aventure on ne peult par embusches molester ses ennemys.



A mais vng expert capitaine, ne vienne au combat s'il n'a deuant mis embusches pour tromper & molester ses ennemys lesquelles sont principales causes pour obtenir victoire, & sans icelles a peine fust iamais esté vainqueur des Rommains Hannibal, car ou que les Rommains, & Carthagiēs ont eu batailles ensemble, les Rommains ont tousiours esté vainqueurs, si le lieu auquel ilz ont faict lesdictes batailles estoit plain & appert sans fraulde & mal engin. A ceste cause vng bon cappitaine doibt tousiours eslire le lieu de la bataille a son aduantaige, & ou

des gens de guerre. Fu.xxxv.

il puisse mettre embusches, & faire tromperie
a son ennemy, sans lesquelles il ne pourra faci-
lement auoir victoire:mais souuent aussi pour-
ra succumber,& estre vaincu.

¶ Qu'il est bon de faire affin que tes
ennemys pensent & cuydent leur
chef ou capitaine estre mort.



Vand assemblez sôt les deux
ostz, & que Mars gouuerne
tout, & que lon est au poinct
du combat qu'aucuns appel-
lent impression: affin de dō-
ner paour a tes ennemys, en-
uoye vng de tes gens de guerre enuers eulx ac-
coustré a leur mode, & parlant leur lāgage qui
crye haultement, que c'est en vain qu'ilz com-
batent en leur persuadant, & donnant a enten-
dre que leur capitaine ou coronal est mort, &
qu'il a esté tué en icelle rencontre, regarde tou-
tesfois celluy qui portera ses parolles, qu'il les
die au lieu duquel sera absēt ledict coronal ou
capitaine, affin que plus enclins soiēt a le croy-
re les souldars, & par ceste creance, renduz plus

E iiii

Le Guidon

timides & craintifz, & mefmemēt quand la bataille eft en tel inconuenient, que nul ne peut furuenir nouuellement entre eulx qui en fache rapporter la verité. Par ce moyen leur fera icel le mort perfuadée, pour laquelle entre eulx fe engendrera paour, & efpouement, en forte qu'ilz perdront tout cueur & toute puiffance, & conlequemment s'en fuyront, & ie laifferōt tuer comme beftes.

¶ Qu'il fault garder & conseruer les champs, les villages, & chasteaulx du pays ou lon veult auoir domination, & magistrat.



Ng capitaine, cōbiē qu'il soit griefuemēt offencé par les habitās du pays qu'il pretēd sub iuguer, & surmōter par guerres, toutesuoyes les terres & seigneuries d'icelluy doit garder d'icelle prouince, & leurs cueurs reconcillera & attirera a luy, auecques cela il eutera le nom de cruel, & acquerra le bruyt d'estre facile, & clement, & les habitans cuyde tout que

des gens de guerre: Fu. xxxi

le capitaine qui ainsi les cōtregardera, & leurs terres les aymera, & qu'il ne desirera leurs richesses: mais seulement la maistrise & regēce du pays, qui te pourroit estre cause de facilement conquēter icelluy, pourtant qu'il n'est douteable a personne que principalement la chose de ce monde qui garde plus les royaumes, & leurs provinces en leur estre & augmentation, c'est la beniuolence, & amytié qu'entre eulx ont les subiectz, & habitans: non pas les trefors ou les richesses d'iceulx. Cōmande doncques le capitaine a ses gens de guerre, qu'ilz ne soient si osez ne si hardiz de vser d'aucune cruauté en icelle prouince ou il pretēd dominer, & d'auātage si en leurs mains tumbent aucuns habitans ou nobles d'icelle terre, non seulement les renuoyent sans payer rançon: mais aussi en les renuoyant leur donnent quelzques dons ou presens, & ne laissent a faire chose: de laquelle ilz puissent attirer a eulx les cueurs d'iceulx habitans.

Qu'il fault tenir son ost sur la terre
de ses ennemys.

E iiii

Le Guidon



Tiens tō armée ou exercite le plus que tu pourras sur la terre de tes ennemys, & de leurs biés tasche tousiours a le bien nourrir & entretenir, en supportant les terres voylines: qui sont (peult estre) a tes amys ou allies / car par tenir tes gés aux terres qui te sont aduerses & contraires, tu rompz le courage de tes aduersaires, & augmentes celluy de tes amys. Et que tu en doibues vser ainsi, que ie le te conseille: l'exemple t'en a donné long temps ya Hannibal empereur de Carthage: qui manifestement congnoissant combien il est prouffitable d'auoir son armée sur la terre de ses ennemys: d'Espagne par tant d'immenses labeurs & innumerables perilz, amena ses cohortes & ses bandes en Italie. Laquelle presque toute degasta, brusla, print, & mist soubz sa puissance. Scipion aussi non ignorant ce conseil: en Afrique pareillement mena l'exercite Romain: & par ce moyen print Carthage: & mist tout le pays en sa subiection.

¶ Qu'il fault quand en hyuer tu veulx donner le combat a tes ennemys.

des gens de guerre. Fu, xxxvii.



N l'aspreté de l'hyuer deuant que de combatre, tu doibs faire māger & boyre tes gens: car c'est vne chose qui merueilleusement est bonne pour repoulser le froid, que le manger & le boyre en temps hyuernal. Nous en auons congnoissance par la desconfiture de l'ost Romain, faicte aupres d'une riuiera appelée Trebes: on presque tout l'empire Romain fut desmoly & abatu. La cause totale de leur ruyne fut: pourtant que le chef de l'armée trop desireux de cōbatre, mena ses gens au cōbat: sans les faire aucunemēt manger ne boyre: & l'hyuer estoit merueilleusemēt grand, & la froidure vehemente. Parquoy aduint que la plus part de son ost fut plus desconfit par froid que par glaïue & armes des ennemys. Garde toy doncques, toy qui es capitaine ou chef de guerre que tu ne meines tes gēs au cōbat, que premierement ilz ne soient repenz & rassasiez de tresbonnes viandes, & vins delicatz. En ceste sorte tu seras facilement victorieux: Car tu prolongeras & allongeras le combat contre la volunté de tes ennemys. Lesquelz peult estre n'auront encores desjuné. Et a ceste cause peu

Le Guidon

de cuer & de puissance sera en eulx. Pource
que la force des gens de guerre est d'autât grâs
de:qu'ilz ont prins leur refection bonne.

¶ Qu'il fault fuyr tant aux capitaines
qu'aux souldars volupté.



Ve les voluptez du corps soient
pernicieuses & dommageables
aux gens de guerre : & que elle
leur oste force de corps, & de
courage : nous auons exemple
manifeste, par l'exercite presque non surmō-
table du duc Hannibal: qui en la terre Capua-
ne perdit pouoir de corps & de cuer: Car lors
Cappe estoit la mere de toute volupté, a la-
quelle estoient tant adonnez les Carthagiens,
que Hannibal souuent leur reprochoit, & di-
soit, que il n'auoit point les souldars, que il
auoit amenez de son pays : Car les siens pre-
miers estoient rudes & robustes par armes:
& ceulx cy qu'il auoit a Cappe estoient molz
& imbeciles, par volupté. Se garde doncques
le Capitaine, que volupté ne cause plus tost
dommage a ses gens, que la force de ses enne-

des gens de guerre. Fueil. xxxviii.
mys, qui seroit chose honteuse, & pleine de
de vergongne.

Qu'il fault eslire le temps & le lieu a
combatre, & mettre la pouldre & le
soleil aux yeulx de ses ennemys,
qui peult.



Le capitaine doit a son pouoir
cercher vng lieu idoine & cō-
uenable a son prouffit: quand
il a deliberation de donner ba-
taille a ses enemys: aux yeulx
desquelz (s'il luy est possible)
mette le soleil, & luy qu'il le
prène au dos. Et si d'aventure la place, ou la ba-
taille se doit dōner est sablōneuse, ou biē fort
seiche par l'ardeur du soleil, qu'il attēde le tēps
auquel le vent donnera tout droict au visage
de ses ennemys: Car par les frequentes cour-
ses & voltigemens des cheuaulx, se esmoue-
ra grande pouldriere: Laquelle le vent chasserat
tout droict au visage de ses aduersaires, &
empeschera & obfusquera du tout en tout leur
veue & regard, si fort que ilz ne pourront a-
uoir puissance de le molester: Aumoins que

Le Guidon
bien petit. Ce fut la cause principale dont fut
desconfit par Hannibal l'exercite Romain au-
pres du village appellé Cannes.

¶ Du temps qu'il ne fault perdre:



Ten plus cher que le temps ne
doibt estimer vng sage Capi-
taine qui a enuie de executer
choses grandes, & dignes de
gloire immortelle: car demeure
& tardiueté (qui de chascun
se doibt fuyr) souuent, & presque tousiours a
de coustume aux hommes apporter merueil-
leux dommages. A ceste cause il t'est besoing
executer ton entreprinse, le plus soubdaine-
ment que tu pourras, & te doibt estre exemple
Hannibal le prudent Capitaine Carthagien:
qui achepta avec grand nombre de pecune le
chemin en Italie, a celle fin qu'avecques plus
grâde diligence il peust paruenir sur ses enne-
mys. Ce q̄ feist aussi aucun des capitaines Ro-
mains, cōtredisâs tous ses amys, ausquelz il dit
nō seulemēt auoir achepté le chemin: mais aus-
si le tēps: duq̄l riens n'est plus cher en ce mōde:

des gens de guerre. **Fueil. xxxix.**
mesmement a ceulx qui veulent faire chose di-
gne de memoire.

¶ Des biens faietz, & mal faietz qui se
doibuent par le capitaine remunerer
ou punir.



I aucun de ta bāde a deffailly, a le
pugnier fois doulx & piteux, & a le
remunerer & satisfaire de tes biēs
fois large & habandonné: si aucun
en icelle t'a fait quelque seruice:
a celle fin que par l'exemple des autres ce qu'il
reste de souldards soit plus prompt a s'exposer
es perilz pour te secourir en ton affaire, Car le
plus souuent les plus gentils compagnons de
vne troupe sont faietz & renduz paresseux a
faire quelque bon acte, ou l'esperāce de remu-
neration & recōpense leur fault. Estudie donc
principalemēt a estre liberal, sans laquelle ver-
tu de liberalité iamais ne feras chose digne de
grand' louēge, & gloire perpetuelle, & iamais
enuers toy (priué d'icelle) ne seront bien affe-
ctionnez tes souldards, & encores toutes cho-
ses te viendront de pis en pis, Comme nous
prouue le roy Perse qui fut tant riche, lequel

Le Guidon

plus estudiant a auarice plus ayment l'argent
que son honneur, par les Romains fut spolié
& priué de ses richesses, ensemble de son roy-
aume.

Qu'il fault faire a celluy de qui les gens
de guerre sont armez a la legiere.



E capitaine qui a des gens, & la
plus part armez a la legiere, iamaïs
il ne doibt laisser reposer ses en-
nemys, lesquelz il sent chargez, &
molestez de cheuaulx d'armes, ou
de bagaige: mais par cōtinuelles courses iceulx
& de iour & de nuyt doibt infester & mole-
ster: affin qu'en les infestant & molestant in-
cessammēt, plains de terreur ilz n'ayent le loy-
sir & l'opportunité de prendre leur repas, &
qu'ilz tumbēt en desespoir de leurs personnes.
Ceste maniere de faire n'a ignoré vn bon capi-
ne nommé Sartorius, tant expert & fin en la
guerre, qu'ilz ayent avec luy seulement quel-
que nombre de gens de pied, en inquietant &
trauillant Pompeé icelluy mist en total desef-
poir: parquoy d'ainsi faire ne te sera dommai-

des gens de guerre. Fueil.xl.
geable, car avec tes gens (ainſi armez que deſſus) tu pourras ſouuent tes ennemys ſurprendre, leſquelz ne te pourront mal faire, par ce que incontinent (ſ'ilz t'afſaillent) tu ſeras preſt & d'auantaige, ſi vne trouppes chargée (comme deſſus) te ſuyt, & te donne la chaſſe, a peine elle te pourra prendre: mais toy au contraire les pourras ſouuent ſurprendre laſſez & vaincuz de leurs propres armes.

¶ Que les exemples proffitent a eſmou-
uoir les gens de guerre a bien faire.



Ombien proffitent les exemples a eſmouuoir les couraiges des ſouldards a bien faire nous donne exemple manifeſte Sartorius patricieus capitaine treſexpert en l'art militaire, qui ne ſa- che par aucune raiſon re-
fraindre & empescher l'impetuofité des Barbares, deſquelz il eſtoit lors le chef & capitaine contre les Rōmains, apres que beaucoup d'iceulx furent par les Rōmains tuez, & autres beaucoup blecez, deſirant les conſoler preſque

Le Guidon

esbahiz & esperduz pour vne partie de leur puissance abolye & destaincte:feist amener au meillieu de son camp, en la presence de tout le monde deux cheuaulx, dont l'vn fut tresmaigre, & l'autre gras a merueilles : Et fist mettre a la queue du maigre le plus fort hōme de son exercite , & a la queue du gras le plus maigre homme du camp. Le fort hōme s'efforçoit arracher tout d'vn coup la queue du maigre cheual, & iamais n'en peut arracher poil: & le maigre hōme poil apres poil arrachoit la queue du gras cheual: Et en ceste sorte par succession de temps toute l'arracha & mist a neant. Ignorās les souldards de celuy Sartorius a quelle intention il leur auoit proposē telle exemple, par luy leur fut declairē: parquoy ouye la signifiāce d'icelluy, luy furent tousiours humbles & obeissans.

Que riens ne se face en vne compaignie sans l'ordonnance du capitaine.

EN vne bande, en vng camp, en vne armée, riens ne se face sans le commandement du coronal ou du capitaine : mes-

de gens de guerre.

Fueil.xli.

mement sans luy q nul ne presume de, ou dormir, ou manger: & par ce moyen, si tout se fait par le conseil & ordonnance du saige capitaine, tout sera en plus grande seureté, & s'en portera de mieulx en mieulx.

¶ Qu'il fault aucunesfois garder ses souldards de combatre avec leur ennemys.

Aucunesfois on doit retenir ses gés de guerre, & les garde de combatre avec leur ennemys, combien qu'ilz ayent merueilleuse volonté de ce faire, & ne fera mal fait d'ainsi le faire, pourtāt qu'apres ceste cohhibition & defense ilz seront plus ardens au combat, & plus promptz: & de plus grande force commenceront la bataille, qu'ilz n'eussent fait au parauant.

¶ Qu'il ne fault combatre ses ennemys quand on les sçait desesperez.

Que nous sçauons noz ennemys sans esperāce aucune de salut, venir alencōtre de nous, ainsi q gens desesperez, & en maniere de bestes en

F

Le Guidon

ragées: Il sera tresvtile de dissimuler par fuytte ou retraicte gracieuse aucunement leur fureur i'a sache que de force, vertu & multitude de gens, nous soyons a eulx semblables: Et encores qu'ilz fussent si encloz p nous qu'ilz n'eussent puissance aucune de sortir & euter noz mains, si esse que nō seulement leur doibt estre fait chemin & voye, mais aussi couurir icelle: Affin que mieulx & plus couuertement ilz se reculent & eslongnent de nous: Pour ce qu'il n'est rien plus fol que de combatre ceulx qui ont enuie de mourir, car comme disoit vn capitaine Italien de nostre temps, homme tressage appellé le seigneur Iehan Iaques. A ton enemy, laisse tousiours vne porte ouuerte, ou luy fais vn pont d'argent.

¶ Qu'il fault faire quand tes gens ont paour des machines belliques, ou des gemissemens des naurez.




I tu as craincte que le son des machines belliques: C'est a dire de l'artillerie, ou harquebuserie, ou les gemissemens & plainctes de ceulx qui sont

des gens de guerre. Fucil.xlii.

entre les piedz des cheuaulx naurez, n'eston-
nent & facent paour a tes gens, qui te seroit fa-
cheux, & peult estre de grand dommaige, tu fe-
ras boucher & estoupper le plus qu'il te sera
possible leurs aureilles de quelque matiere:af-
fin que sans aucune craincte ilz pensent seule-
ment a cōbatre: Car par ce moyen ilz ne pour-
rōt ouyr le son merueilleux de l'artillerie, ne
aussi les plainctes & gemissemens des blecez,
pour lesquelz ilz pourroyent auoir paour. Et
ne sera ceste maniere de faire mauuaise alen-
contre des Lansquenetz & Allemans, Espai-
gnolz, & Italiens, qui maintenant vsent mer-
ueilleusement de harquebouses.

¶ Qu'il fault faire quand tes ennemys ha-
bondent en traict.

 V en vn exercite y a grand nombre
d'archiers & d'arbalestriers, encon-
tre eulx sōyent mis grand nombre
de rondeliers, & par ce moyen serōt
tes gens en seureté.

¶ Qu'il fault faire deuant qu'assieger
vne ville.

F ii

Le Guidon

DEuant que tu ailles avec ton armée au siege d'une ville, ie te conseille q les primatz & seigneurs d'elle, par parolles gracieuses, doulces, & benignes soyēt prouoquez a te la rendre, & outre prometz leur grands dons avec liberté : car yn peuple sitibond d'argent, & auariteux de richesses, rien n'est au mōde qu'il ayme plus que presens & liberté, car vne grande gloire & faueur non vulgaire portent les gens de guerre a vn capitaine quand il sçait (sans esprendre aucunement le sang de ses gens) obtenir ce qu'il demande.

¶ Qu'il fault euitier a vn capitaine impetuosité en la guerre.



Pmpetuosité inconsultée & furieuse en guerre n'est conuenable ny propice a vn prudent capitaine, ou souldard expert en l'art militaire: A ceste cause la doibuent fuir ainsi que exitiable & mortelle peste, autrement facilemēt seront surmōtez par leurs ennemys, & ainsi que bestes occis, meurdriz, & deffaictz.

des gens de guerre. Fueil.xliiii.

¶ Vng conseil pour deffaire des
gens de pied.

Es gens de cheual faintement dissi-
mulans la fuyte, facent tant qu'ilz
puissent amener en quelque plaine
les gës de pied, ausquelz par l'aspre-
té du lieu(ou ilz sont) n'ont pouoir de parue-
nir:& par ce moyen tirer hors de leurs fors, les
pourront aysement deffaire: car rien n'est plus
dangereux pour gens de pied que la plaine: &
pour gens de cheual que le pays de bois, &
faulfoye.

¶ Vng conseil pour rendre inutiles, &
sans prouffit les hacquebousiers de
vng exercite & armée.

En ce temps cy tontes nations ont ac-
coustumé auorir en leurs bandes de
gens de guerre, grand nōbre de hac-
bousiers, ou hacquebutiers qui font
merueilleux dommage a leurs ennemys. A ce-
ste cause ie cōseille a cellé qui en aura le moins
qu'elle choisisse le temps de pluye pour les ti-
rer au cōbat: car telle maniere de gens en tēps
moyste sont inutiles totalement.

F iiii

Le Guidon

¶ Qu'il te fault faire pour contraindre
au combat : ceulx que tu craindras
que par paour ne s'enfuyent.



Vand tu craĩctz que tes souldars
ne s'effrayent vilainement lors
qu'il te faultdra cōbatre, ie te con
seille pour les y cōtraindre, que
par derriere toutes les batailles
soit mise vne trouppes des plus gentils cōpai
gnons de ton armée : & ausquelz tu auras plus
de fiance: laquelle les souldars fuyans reçoïue
& occie cruellement deuant la veue & regard
de toutes gens, que de ce faire tu admonnest
ras : a celle fin qu'ilz soient contrainctz cōba
tre sans auoir aucune esperance de salut par
fuyr. Ce qu'ilz feront par desespoir qui est sou
uent cause de salut aux vaincuz.

¶ Pour dompter & gouuerner a son ayse
vng peuple felon & cruel.

S I tu as aucunes fois quelque peuple fe
lon & mauuais a gouuerner : & qui soit
belliqueux, de sorte qu'il puisse te ma-

des gens de guerre. Fu.xliiii.

lester, & tes gens ausi. Il te sera tresbon leur oster cheuaulx, harnoys, & autres instrumens de guerre: dont tu leur doibs totalement oster l'vsage: Car vng mauuais courage d'vne mauuaise personne ne te peult (ou bien petit) nuyre sans armes. En ceste facon faict le pape des Mahumetistes qu'on appelle le Souldan: lequel ne pourroit cohiber, refraindre, & regir l'impetuosit  de tant & innumerable peuple: encores si malaixe barbare & cruel avecques si peu de gens qu'il a, si de longue main a iceulx peuples & nations il n'auoit ost  & faict oster l'vsage des armes.

¶ Qu'il est bon aucunesfois faire semblant de s'enfuyr.



L te sera aucunesfois possible de laisser de tresb s vins, & de bonnes viandes en ton camp, & d'icelluy te departir faisant sembl t de t'enfuyr: a celle fin q  tes ennemys venuz en tes t tes, & c gnoyssant ta fuyte fac t grad' chere a l'vmbre de tes t neaulx plains de b  vin c e dessus: duql r pliz &

F.iiii

Le Guidon

pleins, tu pourras de nuyct: ainsi que gens impourueuz & yures assaillir, vaincre & desconfire, pource que petite deffence a celluy qui est yure, endormy, ou impourueu de ce qu'il a affaire.

¶ De exercice.



Ombien d'vtilité a en soy exercice: nous le pouons assez entendre & congnoistre par les Romains iadis maistres de tout le monde, qui seul de tous les autres peuples en tēps de paix & de repos: leurs gendarmes contraignoient exercer, & garder par continu labour, l'vsage, & promptitude des armes: qui fut la principale cause dont ilz furent si puissans conquerans & seigneurs de tout l'vniuersel climat: car riē n'est au monde, qui soit de longue garde, ou demeure: si elle est sans exercice & labour: par qui la nature propre est surmontée: par qui aussi les femmes de nature imbeciles & pusillanimes, sont faites fortes, viriles, belliqueuses & magnanimes. Ce qui est bon a sçauoir par les vaillantes Amasennes, & autres qui ont triomphé

des gens de guerre. Fu.xlv.
anciennement en faict de guerre. Contraigne
doncques le bon capitaine ses gens de guerre
incessamment a l'exercice des armes. Affin que
quand il leur faultdra veuir au combat: la char-
ge ou l'empeschement d'icelles, ne les mole-
stent & faschèt, qui sera de grand' vtilité a son
exercite, qui ne prend ce nom d'exercite: sinon
de ce nom icy exercice, sans lequel ne merite
estre ainsi appelé.

¶ Vaincuz les ennemys, qu'il est bon
de faire, pour soubdainemēt pren-
dre vne de leurs villes.

S'Il aduient que tu ayes desconfit tes
ennemys: & q̃ tu ayes enuie de pré-
dre incontinct vne de leurs villes la
plus prochaine. Je te conseille que
tu faces vestir & armer tes gens de leurs rob-
bes & harnois: & iceulx soubdainemēt cou-
rir vers la ville de tes ennemys. Laquelle, de-
ceuz par les armes de leurs gens ne differerōt
de t'y donner entrée: ou bien espouentez &
priuez de bon conseil, facilement a toy se ren-
dront.

Le Guidon

¶ Qu'il fault faire quand on est cōtrainct
auec peu de gens cōbatre ses ennemys
qui sont en grand nombre.



Ouuent aduient que ou par aucune desconfiture, ou bien par faulte de gēs qu'on est cōtraict combatre auec peu de gens ses ennemys qui sont en grand nombre. A ceste cause si tu viens en necessité, ie te conseille de nuyct assaillir le camp & tentes de tesdictz ennemys: lesquelles (peult estre) serōt sans gardes, n'esperant estre surprinses & assaillies par si peu de gens comme tu en as. Et alors tu doibs essayer la fortune de la guerre: laquelle souuent a ceulx qui l'essayent a de coustume se rendre obsequieuse, fauorable, & donne faueur le plus souuent a ceulx qui n'ont puissance de garder la leur contre les autres. Ce conseil causa iadis perte de leur empire & royaulme aux Catthagiens, qui par trop ioyeux de la deffaicte par eulx commise des Scypions, & de leur armée vne nuyct furent assailliz par vng petit nombre de Romains restāt encores desdictz desconfitz. Par lesquelz trois grans exer-

gens de guerre. Fu. xlvj.
cites des leur furent occis, vaincuz & proster-
nez, qui fut la cause que les Romains demeu-
rerent maistres & seigneurs des Espaignes : a-
pres l'infelice interit, & mort infortunée d'i-
ceulx Scypions. Doncques ce conseil sera au-
cunesfois prouffitable. Comme assez le tes-
moignent les belles conquestes de Scanda-
bergus Roy des Esclauons, contre le grand
Turcq Mahumetes.

¶ Comme doibuent dormir les
gens de guerre.

LEs gens de guerre se doibuēt to-
talemēt accoustumer de coucher
sur la terre sans aucunes paillaf-
ses : car bien souuēt par necessité
cōtrainctz ainsi dormir, & ne l'a-
uoir accoustumé, ilz se trouueront rōpuz, foi-
bles & cassez : parquoy il vault trop mieulx pour
son ayse aduenir, & sa santé accoustumer vne
petite de lōgue main : a celle fin qu'une plus pe-
tite ne moleste aucunemēt quād lon s'y treu-
ue. Il n'est riēs aussi plus parfaict qu'accoutu-
māce, par laquelle toutes choses sont trouuées
faciles & legieres : aussi fault qu'ilz vsent de pa-
tiēce : laq̃lle seule rēd tout parfaict & cōsômé.

Le Guidon

Qu'il fault faire pour donner a ses ennemys souspeçon de trahyson de aucun de leurs Capitaines que tu cuyderas plus te nuyre.

S'Il ya aucun des capitaines de tes ennemys, qui par sa prudēce & sagesse contrarie a ton entreprinse: ce ne sera mal fait par aucune grande finesse le rendre suspect ou deuers ses citoyens, ou deuers son prince de trahyson & mauuaisié. Ce que tu feras en deux manieres. La premiere en contregardant & deffendant de feu ou de pillage les terres, champs, & maisons de celluy capitaine, que tu voudras rendre suspect. Et de ceste cy vsa Hannibal de Carthage envers Quintus Fabius Maximus capitaine, & coronal Romain, ou plustost conseruateur de l'empire Romaine. La seconde en enuoyant souuent deuers luy aucun sage homme de ton conseil: Lequel parle auecques, & en priué, & en public. Qui sera la principale cause de le faire tumber en souspeçon: ou deuers son prince: ou deuers les citoyens. Et de ceste seconde ont vsé les Romains envers icelluy Hannibal, Encores d'auantage tu peulx in-

des gens de guerre. Fueil.xlvii.

uenter autres moyens pour le rendre suspect selon l'opportunité du lieu, & du temps que tu auras: ou par faindre lettres, qui traicteront de la trahison, & paction qui se doibt faire entre toy & luy: & mettre peine que ces lettres faines tumbent es mains de sou prince & de ses primatz. Ou autrement en mille sortes, lesquelles inuentions, cautelles, & charges ie ne approuue, ny ne loue, fors qu'il soit questiō de la defaictē de tout vn royaume.

¶ Qu'il se fault le moins que lon peut seruir d'estrangers en la guerre.



Eulx qui veulēt faire guerre, pour icelle maintenir ont volūtiers aujourd'huy accoustumé d'appeller en leur ayde ceulx qui leur sont tributaires, ou bien prédre a leurs soultes des gens estranges, & d'autre nation que la leur: laquelle coustume est souuēt fois pernicieuse & dommaigeable merueilleusemēt a eulx, & a la cōseruation de leur entreprinse: car quand en iceulx ont mis leur con

Le Guidon

fiance, & qu'ilz cuydent par leur ayde estre vaincueurs, & venir au dessus de leurs besongnes en l'extremité d'icelle trouuent le contraire de ce q̄ parauant ont pensé: & se voyent par iceulx estrangers habādonnez, ou mesmes molestez, & chargez. A ceste cause le moins que tu te pourras charger de gens d'estrange pays ce te sera le meilleur, & le plus prouffitable: car tu en pourras autrement venir a l'inconuenient ou tumberent les deux Scipions, freres, capitaines Rommains, lesquelz estans en Espagne menans guerre aux Carthaginiés eurent si grande fiance aux Espaignolz mesmes qu'ilz en prindrēt beaucoup en leur soultete, & pays, & quand ilz cuydent se seruir d'eulx les trouuerent non seulement deffaillir a leur ayde, mais aussi au iour de la bataille estre contre eulx mesmes, qui fut la cause de faire tuer & occire la pluspart de la multitude & puissance Romaine.

¶ Qu'il fault appaiser ses gens de guerre s'il aduient qu'aucuns d'iceulx prennent querelle l'un a l'autre.

des gens de guerre.

Fueil.xlviii.



I entre les gens de guerre s'engen-
dre aucune noise, querelle, ou dis-
sention, comme il aduient souuēt
aux grandes assemblées & exerci-
tes pour beaucoup de raisons qui
suruiennent, tu doibs les ramener a paix. & con-
corde, cōtraindre a iurer & promettre par grāt
serment que les iniures dictes l'vn a l'autre, ilz
oublieront perpetuellement, sans que iamais
ou par fait, ou par parolles ilz en facent au tēps
aduenir autre chose qu'ilz en ont faict.

¶ Quel temps est propice, & conuenable
a prendre les villes & chasteaulx.

SI tu peulx prendre aucune ville ou cha-
steau, sans espandre le sang de tes soul-
dards, enuers eulx tu acquerras grand
honneur & louenge, & a tes ennemys
tu donneras craincte : Pource que par ta pru-
dence tu auras acquis si grande victoire, sans
perdre aucun de tes gēs de guerre, que tu trou-
ueras tousiours prestz a eulx mettre pour roy
es perilz & dangereux inconueniens, s'ilz con-
gnoissent que tu soyes expert, & bien aduisé

Le Guidon

en l'art militaire . A ceste cause experimente
meurement & faigement avec ton conseil tou
tes choses auant que les commēcer par armes:
Car les guerres se doibuent faire plus par bon
conseil que par force . De nuy& donc que le
temps est fort noir, nubileux & plein de pluye,
il t'est plus facile mille fois a prendre vne ville
que de iour que le temps est clair & serain.

¶ Combien proffite la presence d'un
Roy, d'un Coronal, ou d'un Capi
taine en vne guerre, en un camp, ou
en vne bataille.



Combien proffite en vne guerre,
en un cāp, en vne bataille la pre
sence d'un Roy, d'un coronal, ou
d'un capitaine, tous ceulx qui sōt
capables de raison clairement le
congnoissent & entendent : Car par icelles les
capitaines & soldards sont meuz & enhortez
(tant pour euitier honte que pour la craincte
de leur prince ou capitaine qui veoit tout, &
qui cōgnoist ce qu'ilz font, soit bien ou mal) a
vaillamment, & çourageusement faire leur

des gens de guerre. Fucil. xlix.
debuoir. Aucuns principalement pour auoir
recompense de leur bienfaire, Et aucuns seu-
lement pour acquerir la bonne grace de leur
capitaine. Et bien souuēt ou la bataille est per-
due par les gens de guerre, par la presence du
prince & du capitaine est remise en doubte, &
quelque fois se peult resouldre & gagner : car
a cela merueilleusement prouffitent la parolle
l'exhortation & admonnestement qu'il peult
faire a ses gens. Aucunesfoys aussi les me-
nasses causent le plus souuēt coëtr aux lasches
force aux foibles, & magnanimité aux pusilla-
nimes : Encores d'auantaige taschent les gens
de guerre l'un l'autre surmonter par bien fai-
re, affin d'auoir & acquerir meilleure reputatiō
enuers leur prince & capitaine present, & ne
refusent (pour auoir honneur) les perilz & dā-
gers ou peuent tomber leurs personnes, & ne
se soucient de vie ou de mort mais que deuant
icelluy leur prince ilz puissent faire quelque
faict digne de memoire. Pour conclusion sans
la presence du coronal ou du Roy mesmes, ia-
mais a peine les gens de guerre ont le pouoir
de faire grande chose : A ceste cause te sera be-
soing estre tousiours present en tes entreprin-

Le Guidon

prinſes, ſi en icelles tu veulx auoir honneur & prouffit.

¶ Qu'il eſt bon de faire quand on ſe voit aſſailly de beaucoup de gens, & en beaucoup de lieux.



Il aduiët qu'en ton royaume ou en ta terre ſ'eſlieue multitude d'ennemys, en ſorte que tu ne puiffes ſouffrir leur puiffance, tu doibs taſcher de faire paix avec les aucûs d'iceulx & avec les autres trefues, & en ceſte ſorte tu euiteras la perte & dommage de ton royaume, ou de ta terre : car quand tant de gens demandent part en vne terre, il eſt facile aucuns d'eulx, ou par promeſſes, ou par argent, deſtourner & d'y faire moleſte : meſme mēt au tēps preſent, auquel on ne meine guer-
re pour honneur, mais ſeulement pour l'or & l'argent, duquel maintenant eſt merueilleuſement ſitibond & deſirant tout le le monde.

¶ De guerre perilleuſe, & qui en icelle doibuent eſtre eſleuz & choiſir.

de gens de guerre.

Fueil.1.



Ntre les hōmes s'engendrent
souuēt guerres grosses & peri-
leuses: a ceste cause toutes cho-
ses a icelles necessaires tu dois
avec grand' sollicitude, & fer-
uente estude preparer & or-
donner. Principalement tu doibs choytir &
essire pour le mieulx les vieulx souldards, & les
plus experimentez, nō pas les ieunes gens qui
n'ont encores riens veu, toutes fois que la ieu-
nesse est vtile, si soubz la cōduycte des vieulx
ilz veulent marcher: ausquelz il fault essire o-
beyssans comme a leurs peres, autrement en
vne guerre doubteuse & dāgereuse seroit plus
perilleux de s'ayder de ces ieunes solz que prof-
fitable. Et la cause pourquoy on doibt plustost
choysir les vieulx & experimentez que les ieu-
nes, c'est que les vieulx n'ont craincte de veoir
les espées nues, ne sentir les playes faictes a
leurs psonnes, d'ouyr les clameurs des naurez,
& d'entēdre les horribles sons & tōnoirres des
machines belliques ou artillerie: & aussi qu'ilz
portēt tous leurs maulx patiemmet pour tous-
iours garder leur honneur & gloire anciēne, &
augmenter & croistre la nouuelle. D'auātaige

G ii

Le Guidon

ilz congnoissent ce qu'ilz leur est prouffitabile ou nuyfible pour la prudence & experience qu'ilz ont en icellny art de guerroyer. A ceste cause ou il fault qu'ilz soyent vaincueurs, ou bien qu'ilz avec honneur finissent leur vie, ce qui est coustumier aux magnanimes & gentilz compaignons.

¶ Ceulx qui veulent suyure les armes il fault qu'ilz y soyent nourriz d'enfence.



¶ Ceulx qui ont enuie de suyure la guerre, il fault qu'ilz y ayēt esté nourriz de leurs ieunesses: Car quand vn enfant a accoustumé de monter & descēdre, mener & conduire, voltiger, & picquer les cheuaulx, il peult estre tresbon gēdarme. Aussi il fault que tēs ieunes hōmes accoustument a tirer de l'arc de l'arbalestre, & de la harquebouse, & qu'ilz aprennent a bien porter vne espée, vne lance, & vn harnoys, & qu'ilz se essaytē aucunes fois, ou tous feulx, ou avecques leurs compaignons comme s'ilz estoyent en vne vraye bataille, & contre leurs ennemys: a celle fin que quand

des gens de guerre. Fueil.li.

ilz viendront en l'aage d'adolescence par exercice & accoustumâce puerile, ilz puissent estre au nombre de ceulx qui le sçauēt bien faire, & des gētilz cōpaignons. Ou ilz paruiēdrōt facilement. D'auātage les grandz trauaulx & peines (que par ceulx qui n'aurōt accoustumé telle exērice pourront estre estimées intollera- bles) ilz cuyderont & trouuerōt legieres & faciles a endurer. Cōme ausi d'endurer souuent faim, & de coucher souuent sur la dure leur sera merueilleusement de grande felicité le tēps futur. Brief en toutes choses accoustumâce est grandement vtile & prouffitable.

¶ Quand tu congnois que tes ennemys sont en plus gros nōbre que toy qu'il fault que tu faces.



Vand la renommée est cōmu- ne & vulgaire que grande est la multitude, & nōbre de tes ennemys qui viennēt pour te combatre. Tu doibs d'auan- tage encores croistre & multiplier leur nombre deuant tes souldars: par pa- rolles, c'est a dire que tu leur doibs dōner a en- tendre que tes ennemys sont encores en beau

G iii

Le Guidon

coup plus grosse trouppes qu'ilz ne sont, & que tu l'as sceu pourvray (par aucunes especes) qui t'ont apporté les nouvelles : affin que tu congnoisses de quel visaige & de quel cueur tes gens les vouldroient recevoir, s'ilz estoient autant comme tu leur as dict. Et en cela telle maniere te pourra estre prouffitable, pource que quand ilz parviendront au combat, & que ilz verront leurs ennemys en beaucoup moindre quantité que parauant, ilz n'auroient estimé & conceu en leur esprit, le cueur & la force leur croistra, & ceulx qui au parauant estoient douteux de la victoire: cōme si desia estoient vainqueurs: ou qu'ilz eussent tout confondu, & abbattu. Ilz combattront & se mettront au peril de la mort hardiment, & sans craincte.

¶ Qu'il fault preuenir plustost que d'estre preuenu.



Vand tu crainctz grandement d'aucun riche & puissant homme les trōperies, la force, & mollesse, ou bien qu'il ne te prenne impourueu, ou en trahyson,

des gens de guerre. Fu. lii.

& que par ce moyen il t'oste ton royaume, ou aucunes de tes villes, ou bien ta vie mesmes. Certes le conseil ne te sera mauuais de le preuenir, & le tuer (s'il t'est possible) ou ses villes par grande & inopinée violence assaillir, & surprendre. En ceste sorte tu le molesteras par sa coulpe mesmes: & le feras tumber en la mesme fosse que pour toy il auoit construite, & faicte, & de son propre cousteau luy couperas la gorge. Qui sera oeuvre nou mauuaise. Pourtant que les loix tant diuines, qu'humaines: mesmes nature (qui est ennemye des mauuaises pensées & cogitations) permettent que cela ainsi se face. Et aussi que tout ce qui se fait pour la tution, & garde de son corps, ou de ses biens, est estimé estre faict selon Dieu, raison, & droit.

¶ De ceulx qui portent grand' barbe
& longs cheueulx.



N plusieurs prouinces & regiōs les hōmes ont de coustume porter grā des barbes & lōgs cheueulx, qui est chose de grand danger en la guerre, & par cela s'en trouuent mole-

G iiii

Le Guidon

stez & faschez ceulx qui les ayment ainsi: pour tant que les barbes & cheueulx seruēt de lyens pour retenir les hōmes qui les portent. Doncques pour euitier les incōueniens qui en pourroient aduenir, deuant que de venir & descendre au combat, il sera conuenable & vtile de faire tondre tes gens & de cheueulx & de barbe. Pource qu'en vne bataille chose nuyt & empesche. A ceste cause est besoing de oster tout ce qui nous peult molester & ayder noz ennemys.

¶ Qu'il fault estre maistre du pays deuant qu'en assieger les villes.

TV ne doibs assaillir ou mettre le siege deuant aucunes villes si premierement tu n'es maistre de tout le pays de l'environ ou elles sont assises: car si elles ont aucune partie du pays pour elles, & en leur puissance, malaysement se pourront prendre, & en vain tu consommeras ton tēps tenir siege deuāt. Et peult estre qu'en ce temps tu en pourrois prendre de plus grandes & de plus fortes: de ce cōseil ont tousiours vsé les femmes vtils, & ayant le cueur d'hom-

des gens de guerre. Fu.liiii.

me les Amasfonnes, lesquelles iamais ne mettoient le siege deuant aucune ville, que premierement elles n'eussent en leur possession tout le pays a l'enuiron.

Qu'il faut cacher le plus secretement que lon peut les morts ou les blecez en vne ville.



Es gés blecez ou morts fôt merueilleusement paour a leurs amys, & ilz croissent les cueurs & courages des ennemys. A ceste cause afin que cela n'adiene avecques grande diligēce & sollicitude, tu doibs enterrer

les morts, & les naurez faire trāsporter & mettre hors de la presence de tes gens, & loing de tes ennemys. Les morts en charniers, & les naurez en lieu secret, & le plus secretement que tu pourras: car ce fut vne chose qui feit merueilleuse nuyfance au Roy Philippe de Macedoine, que de monstrier a ses gens ceulx qui auoiēt esté tuez par les coureurs Romains: pourtant

Le Guidon

que par celle ostension son exercite fut tant espouenté, voyant les naureures & blesseures faictes a leurs gens, que plustost se fussent fait mettre en pieces, que de cōbatre contre iceulx Romains. Et en cela fut congneue la betise & l'inconstance dudit Roy: lequel enveint bien tost au repentir. Ceste maniere de faire n'ignorant les Turcs en cestuy temps tresexpers en l'art militaire. Lesquelz brullent les corps de ceulx qui ont esté tuez en bataille: affin que la veue ne donne ioye a leurs ennemys, & crainte a leurs amys.

¶ Qu'il fault ouyr les prieres des humblement requerans.



Vng bõ capitaine ne doit iamais reietter, repoulser ou mespriser les requestes & prieres a luy humblemēt & benignemēt faictes. Mais les doit ouyr tousiours humainement & benignemēt: car rien n'est plus louable a vng capitaine que clemence & humanité, par laquelle les courages encores malueillans & irez de ses ennemys peult attirer & flechir a son vouloir. Ceste vertu de clemēce assez honnora & practiqua Scy-

des gens de guerre: Fu.liiii.

pion Aphrican lors qu'il estoit aux Espaignes: lesquelles il subiugua par douceur & humanité, que par rudesse & seuerité. La clemence aussi de Iullius Cesar le rendit plus renommé, que ne feirent oncques ses gestes & faictz belliqueux: combien qu'ilz soient presque innombrables. Embrasse donc clemence & humanité de toute ta force, qui sont propres aux dieux & aux hommes.

Qu'il fault estre cruel au commencement de la guerre.



V commencement de la guerre on dit q cestvne bõne chose se mōstrer cruel: car la craincte q lon a de ta cruaulté cōtraindra les villes de leur rēdre & en ta mercy. Lesquelles priuées de celle craincte vouldroyent essayer. Au moins la plus part, quelle seroit l'yssue de la fortune de la guerre: qui apporteroit (peult estre) merueilleux dommage a tes gens. A ceste cause ie te conseille, que tu te monstres seuer & cruel au principe & commencement

Le Guidon

de ton entreprinse de ta guerre , si tu en veulx paruenir bien tost au dessus , & faire ainsi que Tamburlanus duc & capitaine des Scytes, qui le premier iour que il mettoit le siege deuant vne ville auoit ses tentes blanches, en signifiât que si ce iour les habitans d'icelle se rendoient, qu'il les prendroit a mercy. Le second iour il auoit ses tentes rouges , en signifiant que s'ilz venoient a mercy , que seulement les femmes & les petis enfans seroient occiz. Et le tiers iour il auoit ses tentes noires , pour signifier que il ne en prendroit nul a mercy , & que il tueroit & brusleroit tout. Et la cause principale qui le incitoit a estre si cruel , le second, & le tiers iour, ce estoit affin que du premier mesmes ses ennemys eussent crainte de venir au second , & au tiers , & que par celle timour ilz se rendissent incontinent a sa mercy. De cestuy conseil aussi vsa iadis le prudent & sage capitaine Romain Metellus, quand il batailloit & menoit guerre en Numedie alencontre de Iugurthe : mais qu'est ce que ie dis de Metellus, quand tous ceulx qui ont merité, & qui ont esté dignes d'auoir le nom de bons Capitaines en ont tousiours vsé ainsi : & en

des gens de guerre.
vſent encores de preſent.

Fueil.lv.

Qu'il fault aucunesfois gouuerner ſon
royaume, ou ſa terre par audace.

EN quelle ſorte les hommes doibuēt
garder leur terres ſaigement, en vn
autre liure brefuement, & auecques
prouffit (ainſi que nous auons veu
& congneu neceſſaire) nous en auons eſcript,
Toutesfois preſentement vne maniere de gar
der ſon royaume, ou ſa terre nō inutile, ne laiſ
ſerons a dire : C'eſt que le plus ſouuent aduiēt
que par ſucceſſions on vient a obtenir gouuer
nement ſur vn peuple & vn royaume, pour au
tant que nouueaulx ſont les adminiſtrateurs
d'icelluy, ou peult eſtre encores ieunes; Les cir
conuoyſins Roys, princes, & ſeigneurs les aſ
ſaillent & moleſtent par guerre : Pour euit
er laquelle inuaſion ou moleſtation, il ſera prof
fitable a celluy qui viendra au gouuernement
de ſon royaume, qu'a ſon aduenemēt il ſe mon
ſtre audacieux & magnanime. Et par ce moyē
il augmentera le coeur a ſes ſubiectz, & a ſes
ennemys dōnera craincte de l'aſſaillir. De ce
cy n'a point eſté ignorant Alexandre le grand,

Le Guidon

celluy qui fut Roy de Macedoine, & qui tint tout le monde soubz sa main, lequel encores ieune delassé de Philippe son pere a l'administration de son royaume par audace & ferocité cohiba, retrainct, & refrena contre l'opinion de tout son conseil, la volonté de ceulx qui se cuydoient esleuer contre luy & sa puissance.

¶ Qu'il fault estre chaste en la guerre.



Hasteté en guerre tellemēt d'un chascun est louée & approuée, que sans elle nul n'est digne d'estre nommé seigneur ou capitaine : car celluy qui sera attainct & infesté de ces deux cruelles bestes concupiscence & luxure, & sur lequel elles aurōt regime ou gouuernement, comment pourra il auoir domination sur autruy, au moins qui soit proffitable? Certes a grād peine aduiendra, que celluy qui ne se sçait gouuerner sache biē gouuerner autruy. A ceste cause il te sera tresbon d'ensuyure Alexandre le grand, qui nō pas seulement

des gens de guerre. **Fueil.lvi.**
se garda d'attoucher charnellement aux filles
(Combien qu'elles feussent tresexcellentes en
beaulte) du puissant Roy de Perse : mais aussi
ne les voulut point veoir quand elles furent
reduyctes soubz sa captiuité & puissance. Le
pareil acte feist Scipion, celluy qui par son bié
faict a merité le nom d'Aphrican : lequel par
sa singuliere chasteté en la terre d'Espaigne a
acquis nom immortel & fame perpetuelle:
Mais pourquoy sont nommez chasteaulx, cha-
steaulx, sinon qu'en iceulx fault viure chaste-
ment ? Laissons la la bonne renommée q nous
pouons acquerir par chasteté, regardons tant
seulement l'vtilité : N'est il pas vray que lu-
xure affoiblist la puissance de l'homme, qu'el-
le l'oste & le priue de son entendement, & luy
appetisse son esprit, icelle hebeté la veue, elle
empesche l'ouye, lesquelles choses combien
sont prouffitables en la guerre pense le toy-
mesmes.

¶ Qu'il fault qu'un capitaine vse au-
cunesfois en guerre de mocqueries,
& petites parolles ioyeuses.

Le Guidon



Es capitaines sages souuēt en grāds perilz, & guerre dangereuse, ont de coustume vser de cauillations, moqueries & parolles ioyeuses: Affin que ilz chassent craincte hors des cœurs de leurs souldards, car en vsant d'icelles il donne a congnoistre qu'il n'estime rien ce qui est tant crainct & redoubté par iceulx: Lesquelz voyāt la fiducie & assurece de leurs capitaines, pour ceste cause ostent souuent paour & craincte d'avec eulx, & reprennent coeur & courage, & de ces cauillations & moqueries vsa Hannibal de Carthage, quand premierement il vint en Italie contre les Rommains. Pareillement Alexandre le grand, tant en la premiere, qu'en la seconde bataille qu'il eut cōtre le Roy de Perse, voulut vser de ceste maniere de faire, lequel admonnesté par aucun de ses amys, pourquoy en vn grand danger (comme il estoit) il dormoit tant. En face ioyeuse luy respondit: Ne scais tu pas bien que nous auons vaincu, & que nous sommes les maistres? Laquelle parolle fut incōtinent sceue par tout son ost, qui a tous fut cause d'esperer la victoire, comme apres ilz eurent par leur bienfaire,

des gens de guerre, Fueil.lvii.
¶ Quand les souldards disent mal de
leur capitaine.

Les souldards, encores les plus
gentilz compaignons d'une
troupe ont presque tousiours
accoustumé de dire mal de
leurs capitaines (peult estre)
pource qu'iceulx souldars ne
sont suffisamment recompensez de leurs serui-
ces, ou bien que les capitaines ne les ayment
point. A ceste cause si tu scez que tes souldards
dient mal de toy, tu ne te doibs pourtant cour-
roucer contre eulx : mais plus tost vsér enuers
eulx de douceur, liberalité & fráchise, car par
cela tu pourras (non seulement les garder de
detraction) mais aussi les semondre a bien par-
ler de toy, & te louer plus que nulz autres, &
les feras plus promptz par ce moyen a vouloir
entreprendre de plus en plus faictz ruyneux
& euidens perilz : & d'auantage garde toy pour
petit de chose perdre les gés de biē de ta trou-
pe, lesquelz tu doibs de toute ta puissance, sans
riens y espargner, retenir, garder, aymer, presu-
mer & recompenser, selon leur merite & bien
faire.

H

Le Guidon

Comment il fault admonnester & inciter ses soldards a prendre peine & labourer,



Ar labourer soy mesmes, & non par violence ou contraincte tu doibs esmouuoir tes souldards a trauailler & prendre peine, ainsi que tant de fois voulut faire Marius iadis sage & bien estimé, capitaine Romain, lequel presque tous les iours supportoit & enduroit les fatigies & peines increables: afin que par son exemple plus tost que force il contrainnist ses gens a faire ainsi que luy. Qui voyans leur capitaine ne s'espargner au labeur s'ilz n'eussent fait leur debuoir comme luy, ce leur eust esté honte & merueilleuse vergongne. Par bonne raison donc & non sans cause icelluy Marius prenoit peine luymesmes : Car comme pourra vn chef ou capitaine de guerre bien admonnester ses gens, & les inciter a peine, a chasteté, a force, a vigilance & a sollicitude, qui sera luxurieux, paresseux, timide, endormy & negligent. D'un capitaine se mocqueront les souldards, qui est vicieux, & qui veut

des gens de guerre. Fueil. lviij.
de vice les autres reprendre. Le capitaine donc
qui veult imperer & gouuerner autruy, pre-
mierement tasche a se gouuerner soy mesmes,
& qu'il ensuyue la parolle escripte ancienne-
ment au temple d'Apollo, qui estoit: Regarde
toy, car apres s'estre regardé, il ne voudra re-
prendre vn autre du vice dont il est entaché:
mais il se gardera d'icelluy le plus qu'il luy se-
ra possible: affin que s'il vient d'auenture a le
corriger & reprendre, on ne luy saiche alle-
guer qu'il soit chargé & commaculé d'icel-
luy: Par ce moyen ses subiectz, ou ceulx qui
seront soubz sa charge en toutes choses libe-
rallement luy obeyront & obtempereront a
leur pouoir.

¶ Qu'il fault faire pour reconcilier &
attirer a soy vne prouince, ou vng
pays estrangier.

VNg Capitaine en vsant des meurs, &
des habillemens d'une prouince, ou de
vn pays estrange, icelluy merueilleuse-
ment attirera & semōdra a luy porter bone fan-
tasie: car par ainsi il semblera a la gent d'icelle

Le Guidon

prouince qu'il sera natif de leur terre, ou qu'il le fait seulement pour l'amytié & beniuolence qu'il leur porte, & de ceste maniere de faire voulut vser Alexandre de Macedoine, apres auoir vaincu le roy de Perse: car il s'habilla ainsi q' les Persiens, desquelz pareillement il print les loix & les coustumes: affin que ceulx qu'il auoit vaincuz, & surmontez par armes, par se habiller comme eulx, faire & viure a leur mode & maniere les attirast a son amytié & bien vueillance.

¶ Vn capitaine doit faire honneur a ses souldards, & estre liberal enuers eulx.



N capitaine doit faire honneur a ses souldards, soyent pauures ou riches, ou de quelque condition que ilz soyent, & doit faire dons & presens, & se monstrier large & liberal enuers eulx: Car quand ilz se verront priser par leur capitaine, & estre en sa bonne reputation, tous perilz, toutes peines & labeurs leursembleront petitz & de nulle importance quand ilz viendront au lieu pour luy faire seruice, &

des gens de guerre.

Fu.lix.

ne craindrōt a espandre leur sang : mais qu'ilz pensent en cela luy complaire. Le capitaine les doit aussi souuent recōpenser de si bonne volunté enuers luy, & de cheuaulx & d'abillemēs & d'argent: pource qu'il n'est riens qui gaigne plus le coeur d'vng bon souldard qu'honneur, liberalité & largesse : car ce sont la nourriture de vertu. A ceste cause les capitaines ne doivent espargner ny dignité ny argent a gaigner les coeurs de leurs souldars qu'ilz trouueront plus que prestz a les bien seruir en ce faisant.

¶ Quand on crainct les saillies au siege d'vne ville qu'il est bon de faire a la tuition de son camp.



Vand tu tiēdras siege deuāt quel que ville, & que tu craindras que tes ennemys ne saillent soudainement sur tes gens, tu dois a la sauuegarde & tuitiō d'iceulx faire enuironner ton camp de rāpars, & faire force trenchées tout autour, & de faire de grandz fossez. D'auantage si tu es en pays de bois, tu dois en faire esleuer de grosses tours a l'entour: car par icelles tu pourras veoir tes enne-

H iii

Le Guidon

mys, & les battre, & par ce moyen seras en seurété. Certes les faillies sôt aucunesfois de grād dommage a vng camp, pourtant que plus souuent se font sans bruyt, & sans ce que ceulx de dehors s'en prenēt en garde, pourtāt qu'ilz sôt prins impourueuz & assailliz sans aucunes armes, le plus souuent aduient que par telles failles vne bien grosse armée est desconfite, & le vainqueur matté & deffaict par le vaincu.

Quand tu congnois que ton ost est en danger d'estre desconfit.



Si tu cōgnois que tō ost, ta troupe ou ta cōpaignie soit en grand danger d'estre deffaicte tu dois a tes ennemys totallemēt habādonner ta vie: car quand tu seras par tes gēs veu en si grād peril, peult estre que le coeur leur croistra, & ausi ne voudrōt failir a te suyure sās y espargner ou corps ou vie, pource qu'apres ta mort ilz n'auroient esperāce de recouurer meilleur capitaine & soubz qui ilz fussent si bien traictez. A ceste cause ainsi que desesperez combatrōt, qui sera peult estre cause du salut de toy & d'eulx.

Comment & pour quelles choses
on acquiert la bien vueilance de
vng peuple.

Rar bācquetz & largesses de viā-
des s'acquiert souuēt l'amytié &
bienvueillāce d'vng peuple : car
il ayme cela sur toutes choses, &
ne cuydent estre aucunemēt ay-
mez de leur seigneur ou capitaine, s'il ne les ap-
pelle quelque fois a bācqueter avec luy : pour-
tant qu'vng peuple ne demāde point ce qui est
honneste : mais ce qui leur est prouffitable, &
sans auoir espoir de n'y prouffiter au ec toy tu
pers, & leur amour & bonne volonté.

CDe la maniere d'enuoyer lettres
d'vng camp en autre.

En chasteaulx, en villes & aux chāps,
de ville en autre, de cāp en autre, tu
peulx éuoyer lettres attachées en fle-
sches, lesquelles tu feras tirer ou tu
veux qu'elles tūbēt, & p ce moyē serōt aduer-
tiz secretemēt tes amys de tō intēti, cōe a faict
de nostre tēps a la prise de Rhodes vng traistre
Espaignol cheualier de leur ordre pour aduer-
tir le Turcq de ce qui se faisoit dedans la ville,

Le Guidon
qui fut cause de la prinse d'icelle, a la grãde cõ-
fusion de toute la chrestienté.

¶ Qu'il ne se fault fier en personne
ou bien petit.



Es Roys aujourd'hui & les prin-
ces ne vsent point de paix ou de
guerre pour garder iustice: mais
seulement pour subuenir a leur
vtilité, ou mieulx a leur sensua-
lité: car qui est maintenant d'iceulx tant saint,
ou tant iuste, qui ne rompe dix fois le iour sa
foy, pour cuyder par la rōpre occuper & met-
tre en sa puissance la seigneurie de son cōpai-
gnon, ou du moins vne partie. A ceste cause il
se faict au temps qui court aussi bon garder de
ses amys, que de ses ennemys quād il est que-
stion de domination & regence: car il n'est au-
jourd'hui trompé que celluy qui se fie trop en
autrui. Poutāt vng Roy, ou vng prince se gar-
de de dōner trop grande foy a vng autre Roy
ou a vng autre prince. Par trop est inscrutable
& difficile a congnoistre maintenant le coeur
des gēs qui cuydēt que tousiours on les vueille

des gens de guerre.

Fu, lxi.

tromper. Et par ce moyen tousiours en seureté il pourra estre entretenu, qui croyra mon conseil. Encores d'auantage ie cōseille que le mois qu'il luy sera possible, ne permette & dōne entrée, soit en forteresse ou autre part a son royaume a quelques gens que ce soit, qui soient plus fors que luy de paour des incouueniens. Dieu nous garde que le passage par le roy permis & donné a son ennemy par son royaume, ne nous soit pernicieux ne dommageable.

¶ D'une munition.



Es charrettes & chariotz mises autour d'vng camp l'une aupres de l'autre, leurs roues bien auant enterrées & lyées ensemble de bonnes & grosses chaines sont de grāde munitiō, garde & tuitiō. Et n'en pourroit on trouuer de meilleure, plus expediente & soubdaine pour fortifier vng camp, pource qu'vng exercite a tousiours accoustumé de mener avec luy grand nombre de charrettes pour porter leurs harnois & bagages.

Le Guidon

Que esperance de gaigner est de
grand prouffit en vne guerre.



Espérance de gaigner, soit
en guerre, ou en bataille,
fait les hōmes (encores que
ilz soiēt imbeciles) fors &
aduentureux. A ceste cause
te fera grande sagesse si de
uant la bataille que tu pre
tendz donner a tes enne
mys, tu incites tes gens a combatre hardiment
pour le grād gaing qu'ilz pourrōt faire a auoir
victoire d'eulx, en les assurant de n'auoir ia
mais poureté apres ceste deffaicte: & qu'en icel
luy iour du tout leur richesse est mise & collo
quée, si par bien faire leur debuoir ilz viennent
a estre les maistres. Ce qui leur en pourra bien
donner l'occasion pour l'attente & esperance
qu'ilz auront d'estre dehors de poureté par les
richesses conquises de leurs ennemys vaincuz
par eulx & surmontez.

De la superhabondance de gens
en vng pays.

des gens de guerre. ¶ Fu. lxxii.



V, pays, ou en la prouïce en laquelle y aura superhabondance de gens de guerre, il sera bon la plus grand' part d'iceulx mener ou ëuoyer en quelque loingtain pays faire guerre: affin qu'ilz ne puissent estre cause d'y faire aucune sedition ou esmeute. Qui fait aucunes fois perdre, gaster, desmollir, & apourir de bië grandes citez fortes, puissantes & riches. A ceste cause il est bon de pourueoir (pour euitier tous inconueniens) a oster, & abbattre les causes deuant que les effectz aduiennent: Car quand la matiere fault, la fortune fault, ainsi que dit le Philosophe. Et est vng acte prudent de veoir les choses de loing qui peuvent aduenir, & a icelles preuenir, si tu congnois qu'elles te soyent dommageables, comme a faict tousiours & en toutes ses charges feu messire Guillaume dn Bellay, seigneur de Langei, qui a esté vng des plus prudens, sage, vertueux & sçauant gentil homme, qui ayent esté de nostre temps.

¶ Qu'il est besoing de faire au commencement qu'une ville se met en ton obeyssance.

Le Guidon



Nouvelle & recente dedition, reddition ou gouuernement d'une province, d'un pays, ou d'une ville pour gagner le coeur des habitans de icelle, & acquerir leur bien vueillâce: tu doibs toutes ses charges abollir, ou remettre a un autre tēps: faire ouurir les prisons, & deliurer les prisonniers. Les sentences, proces, & informations faictes contre iceulx faire brulser & mettre en cēdres. Brief tu ne doibs oublier & laisser chose en cela qui concerne humanité & clemence: affin que tes subiectz nouveaulx cuydēt & entendent que ce que tu en faictz, c'est pour l'ineffable amytié & tresgrande beniuolence que tu leur portes.

¶ De la peine ou punition que doit auoir un capitaine qui s'enfuyt de une bataille.



Ng Capitaine qui s'enfuyt d'une bataille, & qui laisse vilainemēt sa troupe, ou sa bande, il doit auoir (sans mais, ne si) la teste couppee: affin que

des gens de guerre.

Fueil.lxiii.

sa punition soit exemple aux autres qu'ilz de-
ueront mieulx vouloir mourir en vaillammēt
combatant, que perdre leur honneur, & acque-
rir honte & infamie pour s'enfuyr mescham-
ment.

¶ Qu'il se fault abstenir en la guerre de
spolier les temples.



E gardent sur tout les gēs de
guerre de spolier, desrober, &
piller les temples & lieux sa-
crez de Dieu: affin qu'il ne se
corrouce contre eulx, car sou-
uent aduiēt que par telles spo-
liations cruelles, & sacrileges, batailles sont
perdues, & les grands exercites deffaiēt & cō-
fonduz, pource que Dieu ne veult laisser im-
puny vn faiēt tant abominable, & digne de pu-
nition. Donc faiēt que tes gens (si tu veulx
prosperer) se gardent autant de toucher aux
biens des temples, comme aux corps mortz de
tes ennemys, & encores plus, pource qu'il n'est
point de guerre plus dāgereuse & moins dou-
table que celle de Dieu, qu'on doibt craindre
& aymer sur tout.

Le Guidon

Qu'il fault fuyuir fes ennemys quand ilz fuyent.



OV que tu congnois auoir gaigné la bataille, & que tu vois tes ennemys qui s'enfuyent, si tu es assureé qu'il n'y ayt poit d'embusche ou de troupe au chemin par lequel ilz se retirent, ie te conseille de les fuyure, & le plus loing qu'il te sera possible, & ne fault differer en cela : affin q d'auenture apres auoir par eulx esté longuement fuy, & rassurez & remis ensemble a toymesmes ne te donnent la chaste, & qu'eulx au parauant vaincuz ne te surmontent vainqueur: Ce qui aduient souuent quand on ne prend, & qu'on ne fuyt sa bonne fortune : laquelle a de coustume voluntiers nuyre a ceulx qui n'en ont sceu vser quád elle leur donnoit faueur & support.

Qu'il fait bon simuler la fuytte.

SI tu vois ou scaiz quelque lieu qui soit a ton aduantaige pour la tirer tes ennemys, tu doibs faire semblant de t'enfuir

des gens de guerre. Fueil. lxxiiii.
iusques a ce que tu les y auras menez & mis, a-
pres chauldement & viuement les assaillir de
tous costez, ainsi tu pourras facilement, & sans
grand' perte de tes gens les desconfire. En ce-
ste façon font souuent ceulx qui veulent em-
pescher les courses de leurs ennemys, & sur-
prendre iceulx.

¶ Qu'il est bon de faire quand on veult
mettre aucuns de ses soldards en quel-
que grand peril.



V qu'il t'est necessaire en-
uoyer aucuns de tes soul-
dards en quelque beson-
gne perilleuse, & d'agereu-
se, tu doibs d'iceulx eslire
les plus courageux, & les
moins paoureux, lesquelz
tu doibs admonnester qu'en icelle dangerense
affaire ilz ayent tousiours bon coeur, & qu'ilz
s'efforcent tant qu'il leur sera possible de bien
exerciter leur charge : Et que s'il aduient q par
leur bien faire ilz puissent eschaper le danger

Le Guidon

ou tu les enuoyes: il fault que tu leur promettes les faire riches & puissans, & leur faire telle recompense de leur bon seruice, qu'ilz en pourront mieulx valloir a tout iamais, en leur recommandant aussi le grand hōneur & haulte renommée qu'ilz acquerront le temps aduenir, ou par y mourir vertueusement, ou par en eschapper vigoreusement. Oultre tu leur doibs donner a entendre que pource q̄ tu les cuydes les plus gentilz cōpaignons de toute ta troupe, & les plus entenduz pour mettre fin a telle entreprinse, que plus tost que nulz des autres tu les as choyfiz a cela: Et aussi q̄ ta fiance est plus en eulx qu'a nulz des autres qui soyent soubz ta charge, ce que tu leur affermeras par serment. Et a ceste cause tu les prieras que ilz ayent ton honneur & ton prouffit en recommandation, puis qu'ilz l'ont l'un & l'autre entre leurs mains, & en leur puissance. Lesquelz ainsi aduertiz & memoratifz incessamment de tes parolles, & affin que de plus en plus ilz acquierent honneur & grace enuers toy, delibereront de mourir en ceste commissiō & charge pareillement, ou en venir par bien faire leur deuoir au dessus.

Qu'il fault se garder de commettre
trahison.



Es capitaines & gétिल्z
hommes ayans aucu
ne charge, & aussi to⁹
soldards (qui ayment
leur hōneur) se doib-
uent garder sur tout
de commettre trahi-
son, car c'est vne me-
chanceté la plus exe-
crable & malheureu-
se qu'on scauroit trouuer au monde: Pource q̃
ceulx qu'on trahist, aux trahistres demeurent a
iamais ennemys, & ceulx pour qui ilz ont com-
mis la trahison, n'auront iamais bonne fiance
en eulx: ains les craindrōt, & se garderōt d'eulx
affin qu'ilz n'vsent de telle mechanceté enuers
eulx, comme ilz ont voulu faire enuers les au-
tres. Et d'auantaige, qui trahissent demeurent
toute leur vie notez & hayz de chascun, & en-
cores apres leur mort, demeurent par renom-
mée infames & meschans au monde.

Le Guidon
¶ Qu'il est besoing a vn capitaine d'estre bien parlant.



Estre graue en ses parolles, aorné & eloquent, est merueilleusement beau & prouffitable a vn capitaine, & necessairement fault qu'il le soit : Car vn capitaine eloquent & bien parlant se rend a chascun honorable, ainsi qu'un simulacre ou representation d'une claire & lumineuse vertu, pourtant que tous ses ges par son ornature de langaige le prisent, l'estiment & honorent. A ceste cause il ne fault point que le capitaine (s'il veult auoir bonne estime de ses soldards) que deuant eulx il vse de parolles superflues & vaines, sinon avec ceulx qui luy sont les plus pres de familiarité & d'amytié. Et ne luy est besoing de dire & parler lasciuement, ny ne doybuient sortir de sa bouche motz temulans & lubricques : ains fault, & est necessaire que ses dictz & parolles soyent prudens & graues, en sorte qu'ilz ressemblient plus tost estre proferez par vray oracle, que par langue humaine.

des gens de guerre.

Fueil.lxvi.

¶ Qu'il ne se fault iamais amuser au bagage deuant la deffaicte des ennemys.



Deuant que donner bataille, tu doibs faire commandemēt a tes soldards, que sur peine de la hard nulle soit si hardy deuant la bataille gaignée, de prendre a rāson, mercy, ou autrement aucun de tes ennemys, de quelque estoppe que ce soit, & aussi deuant icelle acheuée nul n'entre au camp ou tentes d'iceulx ennemys, pour piller, prendre & raurir leur bagage. Apres lequel commandement fait, s'il s'en trouue aucun qui soit tant presumptueux de faire le contraire, celluy il te fault faire punir griefuement en son corps: Car s'il aduenoit que deuant auoir tous deffaictz tes ennemys tes soldards se amusassent au pillage, que ce pendant n'y eust danger que iceulx tes aduersaires ne se r'alliassent, & feissent de sorte qu'eulx (qui maintenāt estoient vaincuz) fussent les vaincueurs. Pour euitier & escheuer lequel incōuenient, il te vaudra mieulx estaindre du tout leur force & leur feu, & ne vsor

Le Guidon

de la victoire deuant qu'elle soit totalement en tes mains, fault aussi que tu penses que petite estincelle demeurée de grand feu, aucunes fois cause de grandes ruynes & bruslemens. Il fault aussi q tu mettes ordre apres auoir prins vne ville, ou d'assault ou autrement, qu'aucun feu ne soit mis dedans pour la ruynier, ains la doibs garder en son entier, pour la dōner a aucuns de tes amys, qui la pourra deffendre contre la force & puissance de tes ennemys.

¶ Qu'il fault ayder a ses voyfins.



'Il aduient que tes voyfins soyēt molestez par guerre, tu te doibs trauailler de toute ta force & puissance a leur donner ayde & secours : affin que la calamité de la guerre soit plus tost menée, & executée au terrouer & pays de ton voyfin que au tien: pource qu'il est moult propre & conuenable aux hommes (pour euitier le grand danger du feu) courir a la maison de son voyfin qui brustle, & sur icelle estaindre le feu plus tost que d'attendre qu'il soit paruenü iusques a la siēne

des gens de guerre. Fu.lxvii.
qu'il pourra garder par ce moyen. Doncques
les voyfins doibuent eſtre amys: & ſe ſecourir
les vngs les autres: affin que par eſtre ennemys
apres la deffaiſte de l'vng, l'autre ne le ſoit: &
que le peril de l'vng ne ſoit cauſe du dommage
de l'autre.

Combien il eſt prouffitable deuant vne
bataille en la preſence de ſes ennemys
executer quelque autre entreprinſe.



'Eſt vne choſe de grand aduanta
ge, ouy de tresgrand eſmolumēt
ou prouffit, & pour obtenir legie
rement victoire de ſes ennemys
de faire en leur preſence deuant
la bataille aucun acte vertueux, ſoit que le capi
taine le face, ſoit qu'aucun de ſon oſt l'execu
te: pource q̃ par icelluy chaſcun de la part dont
a eſté faiſt tel acte prend coeur: & pretend chaſ
cun en ſon endroiſt de faire le pareil. Et auſſi
que tes ennemys qui l'auront veu par ſon ef
fect pourront auoir paour & craincte. Et par
cela ſouuent aduient qu'il ne fault ſeulement
qu'vng gētil compaignon pour eſtre cauſe de

Le Guidon

gagner vne bataille: cōme aussi vng meschāt de la perdre. Il fault dōcques qu'vng capitaine prenne soing, & qu'il n'ayt sollicitude d'auoir tousiours en sa troupe quelque souldard de grand coeur, de grande entreprinse, & puissance, qu'il soit prompt & vaillant a executer quel que bon combat.

¶ Que paresse est a fuyr, tant au capitaine qu'aux souldars.



Ng coronal, vng bon capitaine, vng gēdarme ne doibt moins fuyr oyfueté & paresse, qu'vne peste exitiale, encores plus, car paresse estainct le corps, & aussi l'ame: de laquelle n'est riens plus excellent & precieux, & d'auantage l'honneur elle deffaiēt, & la bonne renommée, ce que ne faiēt la peste qui n'a pouoir, sinon sur le corps qui est de petite durée & importance au pris des autres. A ceste cause les capitaines, & les gendarmes ny en temps de paix, ny en temps de

des gens de guerre. Fu.lxviii.

guerre ne soiēt oyfifz, & paresseux: mais qu'ilz chassent loing d'eulx icelle beste ciuelle paresse, qui a de coustume (mesmement en prosperité) d'assaillir ceulx qui par diligēce sont paruenuz a auoir bon heur & felicité, & en choses secondes, il ne se treuve d'icelle plus dangereuse guerre: pourtāt que les villes que guerre n'a peu abattre & desmollir, souuent oyfieté & paresse ont ruynées & mis en desolation, qui ont en elles non seulement ce mal qu'elles cōtraignent tomber les imprudens: mais aussi les saiges.

¶ Qu'il est necessaire qu'vng capitaine visite luymesmes le pays auquel il a enuie de guerroyer.



Ng saige capitaine deuant qu'il entre auecques ses bādes en vne prouince pour y faire guerre, il fault que luymesmes en plonne s'y trāsporte pour veoir, regarder, & cōsiderer par quelles voyes, ou par quel chemin il poutra seuremēt conduyre les gens, ou, & en quelles pars pourroient dresser ses ennemys embusches pour les surprendre, ou

I iiii

Le Guidon

bien quelles villes ou chasteaulx luy sera besoing de prendre, assaillir & ruyner pour l'abreuiation de sa guerre. Brief, il doibt diligemment regarder & considerer toutes choses qui luy sont necessaires pour soubdainement mettre fin a son entreprinse, & a sa puissance icelle ruyner. Et cela doibt luy mesmes veoir, affin qu'il ne soit trompé de ses espies, ou par ignorance, ou par trahyson s'il mettoit du tout en eulx son attente & confiance.

E Qu'il fault croistre son royaume en temps de paix.



Office d'vng prudēt Roy est qu'en temps de paix & tranquillité, il augmente & croisse son pays ou royaume par nouvelles alliances & amytiez. Ainsi que feist Hasdrubal sage empereur des Carthagiens, desquelz il augmenta & creut merueilleusement la domination & regence apres la premiere guerre punique, par cercher neufues alliâces & nouveaulx amys. Ce qu'aussi ont accoustumé de faire tous autres sages princes, tant les anciens que les modernes.

des gens de guerre. Fueil.lxix.

¶ Quel doit estre vng capitaine.



Ng bõ capitaine doit estre de grã
de audace & de grãd coeur a entre-
prendre hardimēt ce que sön prince
veult qu'il execute sans craindre dã
gier ny peril ou il puisse tomber, encores en
iceulx doit tousiours estre de bon conseil mu-
ny & pourueu, si qu'il ne s'esbahyſſe en façon
du monde en quelconque affaire qu'il se trou-
ue : Car il seroit peu prouffitable aux souldars
auoir vng hardy capitaine qui seroit priuē de
bon conseil a vng besoing : pourtant que har-
dieſſe ne vault rien sans bon conseil : Car il est
besoing que l'vng soit ayde pour l'autre, A ce-
ste cause si en l'homme l'vng d'eulx deffault, il
perd non seulement le nom d'vng bon capitai-
ne: mais aussi tombe en reputation d'estre im-
becile : & non digne d'auoir honneur: comme
celluy qui merite mieulx auoir gouuernemēt
sur luy que d'estre sur autruy gouuerneur: ain-
si il est de neceſſité qu'vng capitaine qui voul-
dra acquerir honneur & reputation entre les
hommes, soit sage & prudent: affin qu'il esliſe
le bien du mal: car comme disoit le Philosophe
& sage capitaine Bocotien Meronides: la pru-

Le Guidon

dence se cōgnoist a vng homme , non tant a se retirer du mal qu'a choisir le bien , pource que communement soubz le mal, aucun bieu ne se peult cacher : mais soubz le bien beaucoup de mal se peult dissimuler.

Qu'il fault faire a l'assault d'une ville pour croistre les coeurs des gens de guerre assaillans.



L est besoïg en vne oppugnation & assault d'une boneville faire crier par le cāp de par le coronal , & chef d'icelluy: que la ville prinse, a laquelle doibt dōner l'assault, qu'il entend qu'elle soit pillée & mise a sang, affin que pour l'esperance de gagner soient plus ardātz a icelle assaillir & prendre les gens de guerre assaillans : desquelz les courages augmenteroēt les richesses par eulx pretendues a l'expugnation de icelle ville, pour laquelle mettre en leur puissance, ilz ne voudront espargner ny corps ny vie. Et ne pourront estre les deffendants si gentilz compaignōs qu'apres cest edict ilz puissent chasser lesdictz assaillās, tāt est au

des gens de guerre. Fueil.lxx.
temps present en cours, desir de gaigner, auarice & concupiscence insatiable.

¶ Comment il fault passer vne riuere
maulgré ses ennemys.

L aduient souuēt a vng exercite passer quelque riuere, de laquelle le passage est empesché p les ennemys: par quoy en cela il fault trouuer le moyen de passer avec des bastaulx, & faire pont d'iceulx, ou tu ne pourras autrement en faire: toutesfois deuant que faire passer toalemēt tout ton exercite tu doibs enuoyer vne partie d'icelle passēt beaucoup plus bas du lieu ou tu veulx passer & le plus secretement que tu pourras: affin que ce pendant que tes ennemys s'amusent a toy, que tes gens desia passez donnēt sur la queue de tesdictz ennemys, qui ne s'en donneront garde, parquoy ainsi surprins, tu pourras aysement passer ce pendant qu'ilz seront empeschez a leur deffendre: & toy pasé ou par toy, ou par tes gēs desia passez pourront estre vaincuz, chassēz & surmontez. Et est ceste maniere de faire merueilleusement vtile en lieu dangereux.

Le Guidon

Que le capitaine doibt conseiller ses souldars quand ilz sont desesperez de laviatoire, ou faschez du long chemin qu'ilz ont a faire.



Vue tes souldars sont desesperez, ou bien d'obtenir victoire contre leurs ennemys, ou faschez du long chemin qu'ilz ont fait, ou qu'ilz ont a faire. Tu dois mettre toute diligence & sollicitude a les conseiller, & leur donner bonne esperance de repos, & tranquillité. Affin que par ta consolation leur tristesse & leur crainte soit totalement ostée & arrachée de leur courage, & qu'ilz soient faitz asseurez & courageux a parfaire le chemin desia par eulx commencé, ou vaillamment executer la guerre, ou la bataille entreprinse contre leurs ennemys.

Qu'il fault honnoralement enterrer les corps morts de tes ennemys.

S'Il ad advient que tu surmontes tes ennemys, & que d'iceulx aucuns soient mis a mort, tu gaigneras merueille.

des'gens de guerre. **Fueil.lxxi.**
sement le coeur des viuans, si tu'as soing de faire honorablement enterrer les corps morts de leurs compaignons: car par cela tu leur donneras a entendre que tu n'auras point entrepris guerre contre eulx, par hayne ou malueillance que tu leur portasses: mais seulement pour garder & deffendre ton droict & ton honneur. A ceste cause ne se pourront garder de te porter bonne volonté, & t'aymer pour ta clemence & pitié, de laquelle rien n'est auiourd'huy plus louable en ce mōde, & qui soit plus digne d'estre aymé, veneré, & extolleré.

¶ De prendre ostages en guerre.



'Est vng sortable lien de bonne foy, & vne asseurance bien grāde auoir & prendre aucūs ostages des plus grands, & plus riches de la ville ou du peuple que tu auras nouuellement surmontez, & desq̃lz tu craindras la reuolte. A ceste cause ie te conseille se tu veulx garder icelle ville, ou icelluy peuple

Le Guidon
en la foy qu'ilz t'ont promise, que tu prennes
ostages riches, & les plus suffisans d'entre eulx
car pour l'amytié qu'ilz porterôt a iceulx osta-
ges ilz demeureront, & persisteront en la foy
donnée, & promesse faicte.

¶ Qu'il fault chasser les plorements
des femmes.



Es plorements tristes & espouen-
tables des femmes faisantes de-
meure es villes, sont a euitier, &
les doibt on cohiber, chasser &
refraindre: car par telz vblemes
telles plainctes & plorements, les hardies pen-
sées, & les courages magnanimes des hommes
se peuent amoindrir & perdre, & n'ont puissan-
ce en telles tristesses le plus souuent de conce-
voir aucun bon conseil pour euitier leur incon-
uenient, & chasser l'impetuosité de leur enne-
mys.

¶ Qu'il fault occulter, & cacher
les morts en vne bataille & les
naurez.

des gens de guerre. Fueil.lxxii.



Y es souuenance quand tu auras en quelque course, assault, ou bataille perdu nombre de tes gens, les vngz par mort, & les autres par blessures, tant q tu pourras par parolles, & par

faictz, tu doibs cacher ceste perte & dommaige: Et lanuyct venue occultemēt & sans bruyt faire enterrer les mortz, a la plus grand diligence que faire se pourra. Les blecez enuoyer aux plus prochaines villes de celles qui te sont amys, & n'espargner chose qui soit proffitabile, ou conuenable a leur santé & guerison: Pour ce qu'eulx gueriz en vn autre affaire tu les trouueras plus promptz, & appareillez a te bien seruir, & ne refuseront faire & prendre peril (tant soit il grand) pour toy, quand vne fois ilz auront cōgneu & experimēté ta largesse, clemence & misericorde enuers eulx.

¶ Qu'il fault aucunes fois mettre peine de appaiser vn gentil compaignon s'il aduient qu'il soit marry, ou qu'on luy eust fait tort.

Le Guidon



'Il aduient qu'un de tes souldards
homme de bien & gentil compai-
gnon, par quelque iniure ou con-
tumelie qu'on luy aura faicte se
courrouce, tu le doibs par doul-
ces parolles, ou par luy faire presens benigne-
ment amollir & appaiser, plustost que le aigrir
& eschauffer d'auataige: affin que tu n'experi-
mentes celluy qui est prudent & fort, encon-
tre toy puissant & pernicieux, & qu'il ne se
reuolte du costé de l'ennemy pour te nuire:
Ce qu'il pourroit faire quelque fois a ton grád
dommaige.

¶ Qu'il fault que les souldards se gar-
dent de demander argent a leurs ca-
pitaines quand ilz scauent qu'ilz n'en
ont point.



N loyal & prudēt capitaine, pareil-
lement les bons souldards, filz sca-
uent que l'argent soit failly, & qu'il
n'y ayt plus rien au tresor ou cof-
fres de leur Coronal ou chef de guerre pour
les satisfaire de leurs seruices, ilz se doibuent
totalement abstenir & garder de demander sa-

des gens de guerre. Fueil lxxiii.
tisfaction & payement de leur seruice: Car en
vn grand affaire, & vrgente guerre, cōtraindre
leur seigneur faire payement, lequel ilz sçauēt
n'auoir dequoy: qu'esse chose autre, sinō trahi-
son, & vn donné entēdre qu'ilz n'ont pas grād
enuie de te seruir. A ceste cause filz veulent cō-
stre ayez p leur prince, coronal, ou seigneur,
& acquerir sa bonne grace, ilz doibuent totale-
mēt leur taire de demāder ce qu'on leur peult
bien debuoir lors, & attendre que leurdict sei-
gneur puisse auoir la puissance, de faire a cha-
scun recompense, selon son merite.

¶ Qu'il fault se garder des choses petites
qui sont difficiles.



L est besoīg laisser & escheuer
les petites besongnes, qui sont
aussi difficiles que les grandes
a mener a fin: car autant y fault
il de despence, & toutesfois la
gloire n'y est pareille, ne sem-
blable l'honneur. A ceste cause totalement est
bon de s'abstenir d'esmouuoir & faire guerre
cōtre les prouinces, a faire lesq̃lles les despen-
K

Le Guidon

ses sont grādes, & tes peines immenses: & toutesfois la victoire ou le prouffit en est nul, ou bien petit.

¶ Que doibuent faire les princes apres auoir encommencé vne besongne.



I vng prince a encommencé vne besongne, combien deuāt que la cōmencer il ne le deust faire, si esse q̄ puis qu'elle est cōmencée q̄ pour nulle chose du monde, il ne doibt laisser qu'il ne l'aye acheuée a fin. Et en cela ensuyuons les saiges & anciens Emperours Rōmains, qui assiegerent la ville de Cappe, & la prindrēt par force: Enuers lesquelz ilz vserent de si grande obstination, que pour l'auoir, ilz habandonnerent du tout leur propre ville, & paternelz dommaines: Et ne les peult iamais desmouuoir de leur entreprinse, l'exercite puissant & merueilleux de Hannibal, par lequel en celluy furent souuēt molestez & mis presque du tout en totale ruyne. Or nonobstāt qu'ilz eussent beaucoup a y souffrir, toutesfois

des gens de guerr e. Fueil.lxxiiii.
non esbahys, ou par peril, ou p labeurs, iamais
ne voulurent habádonner ou leuer le siege de-
uant auoir prinse ladiete ville d'assault: laquel-
le ilz prindrent, & eurent en la fin par conti-
nuelle peine, obstination, pertinacité & opi-
niaftreté.

¶ Qu'il fault bien garder ce que
lon tient.



I quelque ville, ou quelque pays
(en quelque sorte que ce soit) tu
as. acquise, 'gagnée, ou mise en ta
possession, ayes tousiours souue-
nance de ne t'en deffaisir pour
quelque chose qui t'aduienne : Mais gardes la
tant qu'il te sera possible, Pource q'c'est plus
grand honte de perdre si petit que lon a que de
ne l'acquérir: Et aussi que c'est vne chose mer-
ueilleusement difficile d'acquérir la domina-
tion de ville ou pays estrange. Et pour ceste
cause ie suis d'aduis qu'il n'est bon de donner
a autruy ce qu'avec tant de peine & labeur se
veult possider & acquérir, & est chose beau-
coup plus folle que saige de faire autrement.

K ii

Le Guidon

¶ Qu'en vn assault il y a multitude d'arbalestriers & de harquebousiers.



Outesfois que par la grande multitude des arbalestriers, & des harq̄bousiers qui donnent l'assault, Ceulx des villes qui sōt sus les murs (pour la defence d'icelles) ne peuēt y faire demeure, pour cōtre-dire l'oppugnation & assault de dehors, ie suis d'aduis (s'ilz n'ont le moyen autre pour ce faire) qu'ilz percent leurs murailles en maintz lieux, & qu'ilz y fassent petitz pertuys, par lesquels ilz pourront nuyre, & d'arbalestres, & de hacquebutes aux assaillans: affin q̄ trop seurement ilz ne puissent entrer en leur ville.

¶ Qu'il fault faire quand il y a bresche en vne ville assaillie.



Ouvent aduiēt q̄ les puissans, & fors murs des villes p coups de bōbardes couleurines, canons & autres piēces d'artillerie sont tuez, & mis bas,

des gens de guerre. Fueil.lxxv.

A ceste cause si tu te treuues en vne ville qui soit assaillie, & dont les murs soient abatuz en quelque part d'icelle, ie te conseille que soudainement avecques grande diligence tu faces faire par dedans des rampars de terre & de bois meslé l'vng avecques l'autre, & aussi faire esleuer des tours de bois aux coïgs d'iceulx pour battre les flans de ceulx qui voudront entrer par la bresche. Aussi tu feras faire de grandes tranchées par dedans, & parfondes fosses, tout autour desquelles soient mis pres biē fort l'vng de l'autre des paulx fichez en terre en maniere de murailles, qui seront pour la tution de la ville. Par ce moyen l'entrée en icelle sera plus difficile aux assaillans que par les premieres murailles abattues ainsi que dessus. Il ya mille autres manieres de faire en telz inconueniens que ie laisse descrire: Pource que Vegetius & Vallo en ont amplement descript.

Qu'il fault faire en manifeste perte
d'une ville.

K iiii

Le Guidon



Vand tu es en vne ville assie-
gée, & qu'il t'appert que les
marchans & citadins d'icelle
ont enuie de leur rēdre a tes
ennemys. Incontinēt & sans
attēdre tu doibs auecques tes
gens de guerre les mettre a mort, sans en y es-
pargner aucun: Car en telles choses aucune
voye de raison n'y prouffite rien, & nulles loix
y sont gardées. Parquoy ce que par aucunes
parolles, & que par raison on ne peult persua-
der, incontinent il est besoing par droit le fai-
re entendre a la rigueur de l'espée.

¶ Qu'il fault faire quand tes gens sont
tardifz, & lentz a l'assault de la ville
que tu veulx prendre.




V que tu congnois tes gens de guer-
re laschement & froidement donner
assault, & assaillir tes ennemys, tu
doibs oster les enseignes des mains
de ceulx qui les portent, & les iecter dedans la
ville par dessus les murs, ou autrement. Et puis
doibs admonnester tes gens, & les prier qu'ilz
ne seuffrent telle iniure & vilennie t'estre fai-

des gens de guerre. Fu.lxxvi.

Et: ne a eulx aussi de permettre qu'icelles enseignes soient ainsi vilainement perdues & mises en la possession de tes ennemys. Et apres auoir ce dict tu doibs prendre vne rondelle, ou vn pauoys, & dire, que ceulx qui t'aymeront te suyuent. En ceste sorte tu pourras assembler tes gens avecques toy, lesquelz te voyant en telle deliberation, mettront peine de te suyure, & de gagner ce qu'ilz estoient en danger de perdre sans ton moyen, & ta prouesse.

¶ Qu'on ne doibr en la guerre despriser chose tant soit petite.

 L n'y a rien si petit, ou si legier en la guerre, qu'aucunesfois n'aye grande puissance de nuyre, ou de prouffiter. A ceste cause si tu es saige tu ne contemneras ou despriseras aucune chose tât soit petite: mais egallement examineras, & peseras tout ce que denant toy se presentera. Le vent prospere en bataille marine, est souuent cause d'auoir & obtenir victoire.

K iiii

Le Guidon

Que souuent par temerité on cuite
de bien garder perilz.

L aduient souuent qu'une armée
est en si grand dangier qu'il luy
est presque impossible d'en es-
chapper. A ceste cause lors le ca-
pitaine se doit ayder de teme-
rité, & estre aduenteureux: affin qu'il viēne par
icelle au dessus de sa besongne que par raison
il n'eust peu faire. Et de ceste maniere de faire
ie trouue plusieurs capitaines auoir vsé, & s'en
estre bien trouuez. Pource que merueilleux &
grād est aucunesfois le pouoir d'audace teme-
raire, & folle hardiesse. Les entreprinſes de
Scādabergus prince des Epirotes nous en dō-
nent preuue assez suffisante.

Quand tes eunemys habondent plus
que toy en gens de cheual.

Sies ennemys ont plus grand nom-
bre de gēs de cheual que toy, & que
tu les vueilles cōbatre, ou pour quel
que prouffit que tu y cuydes auoir,
ou par contraincte de quelque necessité. Ie te
cōseille lors que chascun gendarme ou archier

des tiens porte en croupe vng hōme de pied legier & prompt, qui en vng mesme temps ayt l'agilité & promptitude de monter, descendre, frapper & molester son ennemy. Ceste maniere de combatre fut premierement inuentée en l'obsidion & siege de Cappe. Ou autrement q̄ tu vses d'harquebousiers a cheual: car il n'est rien meilleur pour deffaire vne gendarmerie.

¶ Des villes qui se rendent liberalement.



Es villes qui de propre volunté & liberal mouuement se redēt a toy si tu ne peulx totalemēt les garder & defendre cōtre tes ennemys, toutesfoistu ne le doibs piller ny pmettre qu'aucune iniure leur soit faicte: mais plus tost les doibs gratifier par dons & par presens, & vser enuers elles de toute maniere d'hōnesteté: affin que l'exemple de telle frāchise & gratification faicte a icelles: puisse paruenir aux autres plus deffensables, lesquelles plus facilement pour ceste cause se voudront rendre & mettre en ta mercy.

Le Guidon

Qu'il est necessaire aux gens de guerre
sçauoir l'art de guerroyer.

La science & l'experience de l'art
militaire, de coustume apporte
grand prouffit, & donne grand au
dace aux gens de guerre, & a leurs
capitaines: car les sçauantz & expe-
rimentez sçauent mieulx (que les autres nō ex-
pers, & non accoustumez du mestier) se garder
& deffendre de leurs ennemys, & plus finemēt
sçauent assaillir & frapper iceulx: lesquels ilz
trouuēt moins experts & enguerroyez qu'eulx,
deuant qu'ilz leur donnent la bataille, encores
deuant le commencement d'icelle ilz cōnois-
sent, & ont apperceuance certaine d'emporter
la victoire, ou de perdre la iournée: ainsi que
la besongne se portera. Toutesfois ou qu'ilz
congnoissent leur desauantage & dōmage, ilz
ont assez la cautelle, & treuuēt assez de moyēs
pour differer & prolōger la besongne iusques
au temps qu'ilz verront propice a obtenir vi-
ctoire, de laquelle asseurez plus courageuse-
ment, & auecques plus grāde deliberation cō-
batront leurs ennemys: mais science d'art mi-

des gens de guerre. Fueil.lxxviii.
litaire cōme elle s'acquiert par cōtinue & quo-
tidiane exercitatiō, ainsi p lōgue desaccoustu-
māce de frequēter les armes, elle se perd, cōme
font aussi toutes les autres sciēces de ce mōde,
lesq̄lles sās y seiourner & se pdēt & anichillēt.

Avec petit nombre de bons souldardz
se gaignent les grandes batailles.



I tu pretendz agir & faire aucun
acte digne de memoire immor-
telles & perpetuel nom: prens seu-
lement avecques toy vng petit
nombre de gens de guerre gen-
tilz cōpaignons & experimentez: car avec eulx
plus que ton saoul tu en pourras rōpre & aba-
tre vne bien grosse multitude, & d'icelle em-
porter l'honneur & la victoire. A quoy faire si
tu te veulx ayder d'vne grande multitude &
assemblée de gens qui ne sçauent que c'est de
porter armes, ou de leur trouuer en quelque
bonne affaire, certainement tu te tromperas,
& de tes lyens dont tu cuyderois les seduyre
& surprēdre, toymesmes tē seduyrois & pren-
drois. Cecy ont practiqué plusieurs capitai-
nes: mesmes le Roy Charles huyctiesme a la
iournée de Fournoue.

Le Guidon

¶ Des ieunes gens qu'il fault eslire,
& choisir pour la guerre.



Es apprentifz des armes se doi-
uent choisir & prendre fors,
robustes, & grands de corps,
qui en vng mesme tēps puis-
sent endurer faim, & soif, &
dormir sur la terre, ausquelz
aussi soit volupté & plaisir, continuellement
manier les armes, & combattre a leurs enne-
mys, sans qu'ilz estiment cela labour ou peine:
mais ieu, & esbat. De telz apprentifz & ieu-
nes gens, tu prendras sonbz ta charge en ta
compaignie: Car pour vray s'ilz ayment ainsi
a faire comme i'ay dict dessus, ilz seront tres-
bons souldars, & gētilz compaignons le temps
aduenir, & te pourras ayder d'eulx en de bien
haultes affaires, & dangereux perilz: & par
eulx te pourront aduenir tes entreprinſes se-
lon que tu demandes. Il est requis doncques
diligente sollicitude, & grande sagesse a ſça-
uoir bien choisir les ieunes hommes dont on
a enuie de seruir au faict des armes (tou-
tesfois que lon cuyde souuent d'aucuns qu'ilz
soyent ou seront gēs de bien, qui en fin ne val

de gens de guerre. Fueil.lxxix.

lent riens,& au contraire parquoy souuen ton y est trompé,& aussi qu'il ne fault iuger selon les corps,mais selon le coeur.

¶ Quelz doibuent estre les gens de guerre, ausquelz nous voulons donner charge de noz pays & de noz villes.

Le te fault diligemment regarder que tes gens de guerre ausquelz tu veulx donner la garde, & la deffence de ton pays,ou de tes villes,qu'ilz soyēt naiz & habitans du pays & des villes, encores des plus riches, & des plus nobles, & s'il se peult faire qu'ilz ayent des filz, & qu'ilz soyent peres de famille:car telles gens te serōt tousiours bōs & fidelles, iamais tu n'auras craincte d'eulx qu'ilz te fassent aucune trahison, laquelle serōt marriz de faire,ouy de penser tāt pour la craincte d'eulx & de leurs biens,qu'aussi elle seroit reprochable,vilaine,perilleuse & dommageable aux leurs, & a leur posteriorité,ainsi qu'un crime sur la terre, le plus meschant & abominable qui s'y puisse faire.Et encores pour plus grāde seureté d'eulx tu pourras tenir leurs enfans auectoy.

¶ De la maniere de combatre.

Le Guidon

L Es soldards doibuent tousiours assaillir leurs ennemys de pointe, & non de taille : Car par telle mode de combatre les gens s'estonnét fort, mesmemét si les coups se iectent en leurs faces. A ceste cause iamais ceste maniere de combatre n'oublent, pource q' aussi les blesseures qui suruiennent par coups d'estoc s'ont mortiferes, ou mortelles, & qui desirerent & demandent plus tost les prebſtres que les medecins : mais filz vsent & f'aydent d'espées orientalles, c'est de Suyſſes, Allemans, & Lansquenetz, ilz doibuent frapper de taille nō pas d'estoc : car ces espées sont si tranchantes & mortelles qu'un bien petit coup est facile de couper la teste a vn homme, ou de luy aualer & couper vn membre.

¶ En quelz lieux se doibt asseoir & planter vn camp.

T V doibs planter & asseoir ton camp s'il t'est possible tousiours es lieux aquatiques, habōdans en boys & pasturages dont tes gens puissent iouyr a leur volunté & a leur aise, sans le danger de tes ennemys, d'auantaige ou tu mettras ton camp tu doibs diligemment veoir qu'aupres n'y ayt mōtagne qui ayt veue

des gens de guerre. Fueil.lxxx.
sur icelluy, de paour que aucunesfois n'aduint
que ton armée fust surprise, ou par nuyct, ou
par iour, qui te feroit cause de grād' perte, dom
maige, & de grand' craincte a ton oist. Aussi te
fault garder de le mettre es lieux ou souvent
ont acoustumé s'assembler grādes inundations
d'eaues ou bié es lieux esquelz tes ennemys te
pourroyent deffaire par la rōpture de quelque
riuere, par laquelle pourroit estre du moins
merueilleusement molesté ton camp, ou par
habondance de trop grandes eaues, ou par def
faute de pasturaiges pour tes cheuaulx qui se
royent occupez & submergez d'icelles, Pareil
lement ne se doibuent asseoir tes tentes, & ton
camp en lieu descouuert par trop, auquel tes
ennemys te pourroyent aisément canonner,
& faire dommaige a coups de canons, passeuo
lans, serpentines ou autres machines de guer
re. En telz cas ne se peult donner certaine rei
gle, & ne sçauois bonnement quel moyen tu
doibs tenir en telle asiete, sinon qu'il fault
que tu t'y gouvernes selon la qualité du lieu,
& la necessité de ton affaire ou temps que tu
doibs entendre, & congnoistre sur toutes
choses.

Le Guidon

Quand tes ennemys te pressent, & q̄ ton camp n'est du tout assis & muny.

Si tes ennemys sont pres, & qu'il t'est necessaire de munir & enforcer ton camp, tiens deuant icelluy camp la plus grand part de tes gendarmers en armes, & la plus forte de tes gens de pied: affin qu'ilz reboutent ou du moins quilz soustiennent la violēce d'iceulx ennemys, iusques a tant que la munition & le fort de ton camp soit du tout parfaict: Et lors en icelluy petit a petit fais retirer iceulx gens d'armes & aduenturiers, par ce moyen tu tromperas tes ennemys: & sera licite puis apres en seureté de sortir & entrer ton fort, toutesfois qu'il te plaira, & ceulx qui maintenant cuidoient auoir tout gaigné, parauenture petit apres s'en retournerōt & retireront vilainemēt.

Qu'il fault plus tost se seruir de ses subiectz mesmes en guerre q̄ des estrangers.

Tu dois plus tost eslire tes subiectz & ceulx de ton pays a te seruir au temps de guerre que les estrangers, car tu trouueras iceulx plus fidelles & plus promptz a prendre & chercher les dāgers

des gens de guerre. Fueil.lxxxij.
que non pas ceulx d'autre nation. Et la cause
pourquoy tu seras mieulx seruyde tes subiectz
mesmes est assez apparente : Toutesfois ie ne
veulx laisser a dire qu'ilz (pour leur p^{ri}ce, pour
leur pays, pour leurs enfans, & pour leurs pa-
rens & amys) vouldroyent prendre & souffrir
tous les hafars qu'on leur sçauroit presenter, ie
laisse leurs f^{em}es, leurs affins, cousins & alliez.
La memoire & souuenance desquelz leur croi-
stra le coeur, & augmentera la puissance. Tou-
tesfois que les riches Venitiens ne sont de mon
opinion, pource q^e eulx seulz entre tât de Roys
& princes qu'il y a au monde se seruent de g^{es}
estrangers, ce que nous accoustumons de faire
en France, & ne puis entendre pourquoy, veu
que les estrangers ne nous seruent que de nom-
bre, parade, & sur tout d'emporter l'argent du
Roy, cōme la preuue est notoire & manifeste.

¶ Qu'il fault regarder deuât q^e faire amastz
& assemblée de gens de guerre.

Quand tu as enuie & volūtē d'esmouuoir
guerre en quelque pays, tu te dois en-
querir, & sçauoir sans doubte si icelluy paysest
constitué en pleines ou en lieux monteux: Car
s'il est entre montaignes & lieux robotteux &

L

Le Guidon

aspres, tu doibs faire plusgrand amastz de gens de pied que de cheual, encores est il besoingq tes gens de cheual soyent legeremēt armez, afin qu'ilz puissent aisément monter & descendre les montaignes, & aussi si la necessité vient qu'ilz se mettent avec les gens de pied. S'il aduient que ce soit en pleines que, soit cōstitué le pays, alors ta totale esperance doibt estre mise aux gens de cheuau: car en pleines & campaignes les gēs de pied de sont petite, ou de nulle vtilité & profit. Je dis cecy, non sans cause: car a faire amastz de tant de gens il sy fait de merueilleuses despenses.

¶ Pour garder vn camp en bonne santé.

LA bonne conualescence en vn exercite se garde bien merueilleusement p soy exerciter, & aussi pour afféoir icelluy en lieux idoines & salutaires, & habondans principalement en conduictz de chemins, de portz, de fleuves & riuieres: Affin qu'il n'y ayt necessité & deffaillance de viures, car souuent par faim s'engendre peste en vn camp, d'autant que par penurie & faulte de viandes bonnes & profitables les gens sont contrainctz vser en leur man

des gens de guerre. Fueil lxxxii.
gers de viandes inutiles, immundes, ordes, &
nuysantes aux corps humains.

¶ Qu'il fault faire ou vne riuiera ne se
peult passer a guey.



¶ V la riuiera que tu voudras faire pas-
ser a tes gens sera si parfonde qu'el-
le ne se puisse gayer, ny par gens de
cheual, ny par gens de pied, tu doibs
diuertir de son cours naturel, s'il t'est possible,
& la faire courir ailleurs par dix mille fosses &
voyes que tu y feras, & en ceste sorte le passai-
ge d'icelle te sera facile & seur.

¶ Pour congnoistre les espies de tes
ennemys.

Combien qu'il soit difficile en vn bié grāt
ost cōgnoistre les espies de tes ennemys,
toutesfois ie te diray aucunes raisons nō inuti-
les, par lesquelles tu pourras quelquesfois en
auoir la cōgnoissance. La premiere, q̄ tu regar-
des souuēt les roolles de tes bandes, & s'il fen-
trouue apres auoir chascun appellé l'un apres
l'autre aucuns sans estre enroollez, & sans par-
ty, ce te sera non petite souspeçon qu'ilz serōt
espies: mais s'il aduient que ceulx la qui y sont
escriptz & nōmez soiēt trahistres, & qu'ilz ad-

Le Guidon

uertissent tes ennemys de ce qui se fait en ton camp, il te fera lors de necessité faire garder les champs, les boys, & les chemins de iour & de nuyct, par aucuns de tes soldards, & ceulx qui seront prins par eulx soyent ramenez, tormentez, & occis comme espies, mesmement tous ceulx qui sortiront du camp, sans congé de leur capitaine, ou de leur maistre doibuent estre soupçonner d'estre espies & trahistres: Toutesfois aussi l'office d'un sage capitaine fera de faire veoir, & regarder tous les iours son camp par aucuns de ses gens, les plus fins & entenduz, qui doibuent noter les faces des hommes pour les recongnoistre: affin que s'ilz en trouuent en apres qu'ilz n'ayent accoustumé de veoir, qu'ilz s'enquierent d'eulx, soubz quelle charge ilz sont, combien de temps il y a qu'ilz sont enroollez, & s'ilz sont gens de cheual ou de pied. Tu pourras aussi de iour commander que tout le monde de ton camp se retire en son quartier chascun vers son capitaine, & en leurs tentes: affin que s'il s'en trouue aucuns qui ne sachent ou eulx retirer, & qui ne ayent point d'adueu cōme dessus, qu'ilz soyent prins, & liez, & affin qu'on congnoisse qu'ilz

des gens de guerre. Fu.lxxiii.
font au camp, & pourquoy ilz y font.

¶ Quel conseil se doit tenir secret
en la guerre.



Rens tousiours conseil de ce que
tu auras a faire avecques les plus
vieulx, & les plus sages soiēt ca-
pitaines ou souldars de ton ost.
Et ne fais riē temerairement sans
leur aduis & opiniō: mais apres les auoir ouyz
diligēmet cōsidere ce q̄ tu auras affaire, & suys
l'aduis de celluy que tu cōgnoistras meilleur a
executer ton entreprīse a tō hōneur, & gardes
sur tout q̄ de la cōclusiō de tō cōseil ne soit de-
clarée ou diuulguée: affin que tes ēnemys n'en
soiēt aduertiz, lesquelz ne sachās ce q̄ tu ptēdz
faire cōtre eulx, ne pourrōt obuier a ce q̄ tu ne
viennes maulgré eulx le plus souuēt au dessus
de toutes tes besongnes selon ta volonté.

¶ Des parolles que doit tenir vng capi-
taine a ses gens quand il veult donner
la bataille a ses ennemys.




QVand tu as ordonné tes gens au cō-
bat, & qu'ilz marchent pour cōba-
tre deuant qu'ilz soient assemblez
au ec leurs ennemys, tu dois leur

L iii

Le Guidon

dire & remōstrer que tu as deliberé mourir en combatant vilainement plus tost que retourner sans auoir victoire de tes ennemys, & merueilleusement te pourront prouffiter ces parolles a l'augmentation des coeurs de tes souldars & au gaing de la bataille, mesmement ou tu es aymé & honoré d'iceulx, & d'autant qu'ilz auront souuent experimenté ta clemence, liberalité, & bon traictement (dont tu auras vsé enuers eulx) d'autant pour le salut de toy, & pour ton hōneur ilz s'y exposerōt au mourir, pource qu'āps ta mort leur seroit grief de viure-soubz la cōduycte d'autrui. A ceste cause efforce toy de leur persuader ton salut, ou ta mort estre du tout boutée entre leurs mains.

¶ Vng astuce ou tromperie pour surprendre ses ennemys.

 E conseil est que tu prennes tous ceulx qui seront les plus inutiles de ton camp, & q̄ tu les enuoyes es lieux ou tu cuydes que tes ennemys les chargent. A celle fin que par la deffaicte d'iceulx leur captiuité, &

des gens de guerre. Fueil.lxxxiiii.
meurdre affriandé tu les puisses attirer , ou tu
auras mis gens en embusche pour les surpren-
dre. Ce qu'ilz seront licitement & sans grand
danger, pource que tes ennemys voudrôt suy-
ure la fortune de la victoire qu'ilz cuyderont
desia auoir en leurs mains pour la deffaicte des
desiuidictz , & se rendront par ce moyen plus
habandonnez & ententifz a la cbasse de tes gës
que la cōsideratiō de leur salut. Parquoy soub-
dainemēt surprins par ton embusche en la qua-
lité ilz tomberont en desordre , seront mattez
& desconfitz. En telle maniere & par telle de-
ception ont esté beaucoup de gens trompez, &
beaucoup de grandz ostz destruietz & mis en
ruyne, laquelle façon de faire n'ignorēt point
les gens de guerre d'orient : lesquelz souuent
pour decepuoir leurs ennemys laissent eschap-
per leurs cheuaulx, & les chassēt deuers le lieu
ou sont leursdictz ennemys. A ffin qu'eulx en-
tentifz du tout a la prinse d'iceulx cheuaulx ilz
habandonnent leur ordre , & que ilz laissent
leur troupe, & par ce moyen qu'ilz soiēt tuez
ou prins.

¶ Qu'il fault faire des prisonniers.

L iiii

Le Guidon



Si tu as prins aucuns de tes ennemis, tu ne les doibs temerairement tuer: mais plus tost reduyre & mettre a labourer les terres principalement ceulx que tu cōgnoistras a ce faire vtils. Pource q̄ nul prouffit, nulle vtilité, nul benefice ne te pourroit aduenir par la mort d'iceulx. Ce que par leur viure pourra bien estre: car ilz sont gardez & cōtrainctz a exercer la culture des champs par leurs continuelz labeurs tu pourras cueillir & amasser grande & innumerable quantité de fruietz. Ce qu'assez de Roys ont practiqué. Et mesmement ce Mahumetiste prince des Turcs lequel inestimable nombre des Chrestiens (o vergongne des princes catholicques) a mis bouté & redigé en seruitude, cuy dant assez que sans laboureurs ne se peult nourrir son excercité: & aussi que par leur vëdition il peult payer ses souldars, & par ce moyen que la vie des capifz luy est plus necessaire & aduantageuse, que non pas leur mort.

Pour trouuer de l'eau douce au
bort de la mer.

des gens de guerre. Fu.lxxxv.



V riuage de la mer tousiours l'eau
doulce se trouue ou les arbres vien-
nent & croissent; mesmement des-
soubz iceulx qui rendent plus grād
vmbre. Ce qu'il est besoing de sça-
uoir a vng capitaine.

¶ Quand on combat de nuyt.



L n'est poit inutile aucunes fois
cōbatre de nuyt : mais il fault
que tu mettes tousiours s'il est
possible la lune derriere tō dos:
pource que tes ennemys facile-
ment ne pourront euitier tous tes coups pour
l'abuz & empeschement que leur donnera la
clarté de la lune.

¶ Ce qu'il fault faire a vng capitaine
pour apprendre ses gens de guer-
re a combattre.



V ng saige capitaine deuât que
venir au combat: & deuât que
donner quelque bataille a ses
ennemys, doibt mōstrer tant
a ses gens de cheual q de pied
comment ilz doibuent aller,
marcher, & tenir leur ordre. Pource que leur

Le Guidon

inſciée pourroit eſtre cauſe de ſa deſtruction & totale ruyne : & d'autant que ceulx qui ſont ſans art & congnoiſſance de l'art militaire , ne peuvent pas bien entendre ce qu'ilz doibuent faire , s'ilz ne ſont monſtrez & apprins par leurs capitaines : Eſquelz giſt l'eſtat prouffitabile de paix & de victoire.

¶ De l'office des Roys ou de leurs lieutenans generaulx de la guerre.



Es Roys & les autres primatz ou poteſtatz (chassez tous autres conſeilz d'eulx, encores qu'ilz fuſſent ſaiges & de grãde prudence) doibuent laiſſer & permettre les capitaines & cheſz de leur guerre (qui ſont en icelle experimẽtez) vſer de toute raiſon bellique & martialle, & cõtre icelle raiſon rien temerairement faire, commettre ou perpetrer, & en cela doibuent prendre pour exemple Pompee, qui pour l'excellence de luy en l'art militaire merita eſtre appellé grãd: lequel voulant vſer d'icelle raiſon contre Ceſar , contrainct par le Senat Romain de faire autrement qu'il n'auoit penſé ou premedité, & que la raiſon de

des gens de guerre. Fu.lxxxvi.
guerre ne requeroit fut vaincu, surmôté & des
côfit, & auecques tous ses amys miserablemēt
fut occis & meurdry.

¶ Du signe de guerre.



Le signe dont tu doibs vser
en la guerre, c'est q̄ tes ten-
tes soient rouges, pour dō-
ner signifiācie de victoīre
contre tes ennemys, auec
grāde effusiō de leur sang.
Et n'est couleur en ce mō-
de plus conuenable a l'hō-

me de guerre, que la couleur rouge pour plu-
sieurs raisons, & p̄cipallemēt, pource que les
blessez n'ont cōgnoissācie de l'effusion de leur
sang, qui est souuent cause d'estonner les hom-
mes, en sorte qu'ilz perdēt force & coeur quād
ilz voyent leur sang. Ce qui leur est caché ou
du moins la plus grande partie par la couleur
rouge. Laquelle pour ceste raison est plus pro-
pre & necessaire aux Italiens, qu'a quelque na-
tion de ce monde.

¶ Fin du premier Liure.

LE SECOND LIVRE

ou il est parlé des loix & statuz
qu'on doibt tenir & ob-
seruer en la
guerre.

L'autheur.



L RESTE QVE
briefuement ie declare &
mette par escript de q̄lles
loix, coustumes & droictz
doibuent vsfer enuers leurs
souldardz délinquans, tant
en tēps de paix qu'en tēps
de guerre les coronalz, les capitaines & lieute-
nans d'iceulx. Qu'il est besoïg s̄auoir, pource
q̄ sans humaine iustice & equité, nō seulement
les gros exercites, les royaulmes & prouinces:
mais aussi les petites maisōs, & toute autre ma-
niere de choses ne peuent lōguemēt demeurer
en estre, tant est grande & immense la force, &
puissance sur la terre de iustice & equité. Ce ne

de gens de guerre. Fueil.lxxxvii.
fera donc sans cause si (apres auoir parlé de la
maniere de guerroyer) ie metz par ordre bres-
uement ce que i'ay peu compiler, extirper, &
prendre des loix que anciennement ont obser-
uées, & gardées en leurs armées les Rōmains,
iadis chefs de tout le monde, nō des leurs seu-
lement: mais aussi de celles desquelles encores
de present on vse a la punition des fautes &
erreurs commises entre les gens de guerre: Af-
fin que ceulx qui auront cōgnoissance du me-
rite de leur punition, ne cuydent qu'a tort leur
soit faicte par leurs capitaines, & pourront con-
gnoistre par ce qui s'ensuyt si lon leur faict
tort ou non.

**¶ De ceulx qui se rendent prisonniers a
leurs ennemys.**

S'Il y a aucun d'une compaignie qui
en vne course, en vne escarmouche,
ou en vne bataille se soit rendu pri-
sonnier, sans grand' cause & vrgen-
te necessité, de tant plus qu'il seroit cōstitué en
haulte digignité, de tant plus le doit faire pu-
nir son capitaine, & ne luy sera adioincte la pu-
nition sans merite, pourtāt que ses cōpaignons

Le Guidon

prennent exemple a luy, & qu'ilz n'ayēt occasion (deuant qu'auoir essayé la fortune de la guerre) pour paour des coups, ou des blesseures leur rendre.

¶ D'un qui se casse en temps de guerre, sans cause legitime, ou qui habandonne sa compaignie.

VN qui laisse sa bande ou cōpaignie se doibt punir par sa bourse, ou biē par mutation de degré, comme s'il estoit gēdarme il sera archer, ou biē par bannissement: affin qu'il soit manifeste exemple aux autres, pourtant que par tel habandonnement ou casseure ne se peu't ensuyure q̄ dommage & honte.

¶ D'une espie.

L'Espie qui par les prieres de tes ennemys sera retardé d'executer sa charge, ou bien qui habandonnera le lieu auquel il auroit esté mis par son capitaine, qu'il ait la teste trēchée, pource que le salut ou dōmaige d'une armée souuētesfois despēd du fait d'une espie, pquoy s'il fault il est plus a punir qu'un autre.

¶ D'un soldard qui habandonne le lieu ou il aura esté mis par son capitaine.

des gens de guerre.' Fueil.lxxxviii.

VN soldard qui laissera le lieu ou la place en laquelle son capitaine l'aura mis, ou p craincte, ou par pusillanimité, ou p gloire, qu'il soit banny de la cōpaignie, & si par fraulde & mal engin il le fait, qu'il ayt la teste couppee.

¶ De ceulx qui s'enfuyent d'une partie en l'autre:

CEluy qui s'enfuyra de ta bande en la cōpaignie, & en la part de tes ennemys, si apres p fascherie ou penitence de son mal faict il s'en retourne deuers toy, soit pendu, ou s'il se trouue quelqu'un qui soit pressé de s'enfuyr, qu'il ayt la teste trenchée. Ceste punition, non pas sans cause a esté aujourd'huy inuētée pour noz gens de guerre, toutesfois qu'on en vſa autrement le temps passé.

¶ De ceulx qui perdent leurs armes ou leurs cheuaulx en la guerre.

CEluy qui laschement en la guerre aura pdu ses armes, ou icelles alienées, & mises hors de sa possession meschamment, qu'il soit changé de bande, c'est que s'il est ou gend'arme, ou archer, qu'il soit mis au nombre des gens de pied & celluy qui desrobera les armes de son cōpaignon, qu'il soit chassé, du camp ou de sa bande.

Le Guidon

¶ De ceulx qui font le contraire de ce qui leur est cōmandé par leur capitaine, ou qui ne gardent pas son commādement.



Celluy qui aura fait vne chose defendue par son capitaine, ou qui n'aura pas gardé son commandement, encores qu'il ayt tresbien fait en ce faisant, qu'il ayt la teste couppée, ou bien s'il s'en trouue aucū qui sans cause & necessité vrgente de ses ennemys passe par dessus les murs, rāpartz, ou forteresse du camp ou d'une ville, pareillement ayt la teste couppée: & s'il passe par les fossez ou trēchées, qu'il soit osté des ordonnances ou des bandes.

¶ Des querelleux.

Celuy qui esmouuera ou causera quelque grande seduction & trouble en vn camp, ayt la teste trenchée: toutesfois si noyse se fourt pour l'occasiō de quelque legiereté, & sans totalement grande coulpe celluy par qui sera esmeue, celluy qui n'est cause soit mis hors & priué des ordonnances.

¶ D'une compaignie qui aura faill'y.

des gens de guerre. Fueil.lxxxix.

¶ Si vne compaignie a failly a bien faire son debuoir, elle ne merite, & ne doit auoir autre peine & dommaige, que d'estre cassée.

¶ D'un banny.

¶ Si vn banny a souffert estre mis & enroollé avec ceulx qui suyuent les ordonnances, pour la dignité de la gend'armerie, qu'il ayt la teste coupée.

¶ D'un coupable de mort.

¶ Si vn coupable de mort, qui a mérité pour ses malfaictz mourir, si volūtairement il a souffert, & qu'il se soit mis, & faict enroeller au nombrer des gens des ordonnances, qu'il ayt la teste trenchée.

¶ Des essorillez.

¶ Vn essorillé, qui se trouue sās aureilles, pour l'honneur & hōnesteté des armes, ne doit aucunement estre receu a exercer le mestier.

¶ Des condemnez a mourir.

¶ Ceulx qui par edict public & sentence de iuge ont esté condamnez a mourir pour l'infameté d'eulx ne se doibuent iamais receuoir a la gendarmerie.

¶ De ceulx q subornēt vn hōme de guerre.

¶ Celluy qui suborne vn filz de millice, c'est a

M

Le Guidon

dire vn homme de guerre, durant le temps d'icelle en sorte qu'il habádonne les armes doit estre bány, & vne partie de ses biens cōfisque & si c'est en tēps de paix il doit auoir le fouet.

¶ Qui aura mehengné vn filz de guerre.

¶ Qui aura blessé, debilité, ou mehengné vn filz de guerre, c'est a dire vn souldard vieulx & ancien sans cause, est digne d'estre banny.

¶ De ceulx qui mettent violement la main sur leur capitaine.

¶ Qui aura mis violement la main a son capitaine ou lieutenant d'icelluy, doit auoir la teste trenchée: car le crime & l'offense est creue par la dignité d'icelluy capitaine ou lieutenant.

¶ De celluy qui s'enfuyt.

LE premier d'une troupppe qui s'enfuyt a vne affaire, apres l'affaire acheuée, doit auoir la teste trenchée: pource que par telle fuytte, peult estre faicte paour & craincte a ses compaignons, & a ses ennemys augmentation & croissace de couraige, dont il pourroit aduenir que par tel fuyát se pourroit perdre, & deffaire vne bien grande armée.

des gens de guerre.

Fueil.xc.

¶ Des espies.



Ne espie qui le secret de sa ptie de-
clare a ses ennemys est trahistre, a
ceste cause doit auoir la teste tren-
chée, comme ceulx aussi qui pour
paour qu'ilz ont de leurs ennemys font sem-
blant d'estre bien malades. Et doit on tenir
pour espies & trahistres tous ceulx qui seront
trouuez en vn camp sans maistre ou adueu, ou
lon ne doit souffrir homme de quelque estat
qu'il soit sans estre aduoué, pour les inconue-
niens qui en peuent aduenir.

¶ De celluy qui blesse son compai-
gnon.

Celluy qui aura blessé son cōpaignon,
de quelque ferrement que ce soit que
il ayt la teste trenchée, & si c'est d'une
pierre, qu'il soit cassé : Affin que par
telles follies & querelles ne s'engendrent gran-
de sedition & tumulte entre les bandes. A ce-
ste cause s'il y a quelque mutin & querelleux
en vne trouppes ou compaignie, qu'il soit cas-
se & mis hors d'icelle : car c'est vne peste trop
plus d'agereuse q̃ quelque chose de ce monde.

M ii

Le Guidon

¶ De ceulx qui s'enfuyent d'un costé a l'autre, & des trahistres.



Es trahistres, & ceulx qui laissent vn camp pour aller en celluy des ennemys, s'ilz sont prins, deuant que leur trencher la teste (qu'ilz meritent) il leur fault donner la gehenne: afin qu'il congnoissent, & declarent s'ilz ont point de compaignons.

¶ En quel lieu est deffendu aux soldards d'achepter.

L Es soldards sont prohibez totalement de faire aucune marchandise es lieux ou ilz militent, c'est a sçauoir au coups de l'armée, pourtant que s'il leur estoit donné puissance d'achepter en tous lieux ilz vouldroyent aucunesfois forcer les marchands de leur donner & laisser a leur volonté leur marchandise. A ceste cause se trouueront peu de marchans qui voullussent apporter des viures au camp, & aussi, q'iceulx soldards se pourroyent plus arrester aux marchandises qu'au traitement des armes.

¶ Du guet qu'on doit faire de nuyct.

des gens de guerre. Fueil.xci.



CEulx qui sont cōstituez & assiz pour faire le guet s'ilz vont, ou qu'ilz se retirēt sans congié de leur corporal, ou de celluy qui les aura assis soient puniz pour auoir la teste treuchée, & non sans merite leur est o'donnée telle punition, quand non pas seulement les Capitaines : mais aussi tous les souldardz reposent soubz leur garde : par faulte de laquelle toute vne armée lassée des labeurs du iour pourroit aysement tomber, & estre mise entre les mains des ennemys, qui seroit chose qui n'auroit en cruaulté sa pareille. Pareillement quand le guet est assis, soit en ville, ou campagne, ne doit aucun de quelque estat qu'il soit sortir, entrer la ville, ou le camp, y aller, venir, ou se pourmener sur peine d'estre tué: comme trahistre par les gardes, & gens faisant le guet : sinon ceulx qui seroient commis a faire la ronde: & qui auroient le mot du lieutenant du Roy, ou coronal de la dictē armée.

CDe ceulx qui s'en vont de l'armée sans le congé de leur capitaine.

M.iii

Le Guidon



Elluy qui s'en va & qui est cōtrainct
suyure sō pere, & qui part de l'armée
& de sa compaignie sans le congié de
son capitaine ne doibt estre puny par
mort; mais doibt auoir q̄sque peine plus doul-
ce & moïdre: si par son pere il a ce faict. Autre-
ment il seroit digne d'auoir la teste trēchée, ou
d'estre puny ainsi que i'ay dict dessus au chapi-
tre, qui s'en vōt sās le cōgé de leurs capitaines.

¶ Du temps donné par le capitaine.



Vi ne retourne dont il a esté
enuoyé par son capitaine, ou
il est allé pour luy mesmes p
congé dedans le temps a luy
donné de retourner par son-
dict capitaine, doit estre mis
au nombre des deffaillans, & de ceulx qui s'en
vont sans congé, au moïns s'il ne monstre iuste
cause de son seiour & absence.

¶ De ceulx qui empeschent la paix.

L'Homme de guerre qui empesche & gar-
de que la paix ne se face merite auoir la
teste trenchée comme trahistre.

¶ De ceulx qui vont descourrir,
ou qui cheminent.

des gens de guerre. Fueil.xcii.

Es souldars qui impourueuement & sans y pēser sōt surpris p leurs enne mis en allāt les descouurir: ou autre ment apres auoir regardé leur estat & leur bōne maniere de viure soiēt pardōnez.

¶ De ceulx qui sortēt de l'armée qui passent & transgressent leur ordre:

Ceulx qui passent & trāsgressent leur ordre en vne bataille: ou qui sans congé se aduancent trop, ayent le fouet, ou bien qu'ilz soient contrainctz muer leur ordonnance, c'est qu'ilz soient faictz de gensdarmes, archers, & d'archers gens de pied.

¶ D'vng prisonnier.

Si vng qui sera prisonnier ne retourne quād il a le loysir, ou qu'il luy est permis. Il sera mis au nōbre des fugitifz, & puny cōe eulx, il est pris, & s'il retourne qu'il soit receu en sō pmier estat, s'on treuue qu'il soit biē sorty, & eschappé des maīs de son maistre, & non pas qu'il s'en soit fuy.

¶ De ceulx qui habādōnent leur capitaine.

Celluy qui n'a point gardé son capitaine, quād il a peu, ou qui l'a laissé en vne grā de affaire entre ses ennemys soit pendu.

M iiii

Le Guidon

Qu'il est bon en vne armée auoir des gens de cheual harquebousiers.



N vne armée il ne sera point inutile d'accoustumer les cheuaulx d'aucunes gens de cheual (ainsi que font les Allemãs) a endurer leur cheuau cheur porter & tirer d'une hacquebute, ou harquebouse: affin que en vng affaire ilz ne ayent paour d'ouyr telz sons: car il n'est en vng cãp, ou exercite homme de guerre (quel qu'il soit) qui vaille celluy qui sera ainsi chargé de feu & de boulettez a cheual: pource que nul des ennemys ne sçauroit estre si bien armé ou equipe, qu'il soit asseuré contre le coup d'vng hacquebutier, ou harquebousier: tant est grãde la violence de telz instrumẽtz plus tost diaboliques que belliques. Et volũtiers par telles gens que venir a ce que nous appellons impressiõ, c'est assaouir au combat de main en main sont defaictz les ennemys, qui n'ont accoustumé telle façon de cõbatre. Et ou que les ennemys y fussent accoustumez, si demoureroit la victoire aux plus asseurez, toutesfoi fault regarder que lesdictz harquebousiers a cheual, soient tresbien montez: affin que s'il aduenoit qu'ilz se

des gens de guerre. Fu. xciii.

mellassent avecques les gés de cheual de leurs ennemys, ilz se peussent cōbatre avecques au si grande aduantage qu'eulx, & pource faire ie veulx qu'ilz soiēt armez d'armer, corseletz, ou hallecretz, avecques manches de maille en lieu d'auantbras, avecques morrions, cabassetz, ou autre habillement de teste a la legiere, ayans masse a l'arçon de sa selle : de laquelle ilz puissent combattre, s'il vient au besoing.

¶ Des canons & autres pieces d'artillerie.



L sera merueilleusement vtile en vne armée auoir dessus des charettes grand nombre de pieces d'artillerie: car tant grande ne sçauroit estre l'exercite de tes ennemys, & tāt puissant, que par icelle plus qu'on ne sçauroit dire ne soit esmeu, perturbé, & fait craintif. Pource que de bien loing & les gendarmes & les cheuaulx en sont abbaruz cōfonduz & foul droyez. Et en ceste sorte nul pres ou loig n'est asséuré du coup d'icelles

¶ De la munition d'vng camp.

Le Guidon



Ne grāde munition & sauue
garde d'vng camp, est de me-
ner en icelluy grosse multitu-
de de larges chariotz ferrez,
& d'autres instrumēs de bois
qui soiēt propices & cōuenā-
bles pour porter aucunes tours de bois: lesque-
les emplir de hacquebutes a croq sera tresfor-
vtile pour faire dommage a tes ennemys: Ca-
pour la haulteur d'eulx, tout ce qui sera au de-
uant sera abbattu & prosterné. Aussi c'est vn
garde pour vne armée legierement faicte.

¶ Qu'il fault rendre graces a nostre sei-
gneur apres auoir eu victoire. 7



Ceste fin que ie ne paracheue ce li-
ure sans dire ce qui appartient a no-
stre seigneur en vne guerre, il fault
qu'vng capitaine ne soit ignorāt que
apres auoir eu & obtenu victoire de ses enne-
mys, il doit avec toute son armée rēdre grace
a nostre seigneur, & le remercier: affin qu'au
tēps aduenir il soit aydāt a luy & aux siēs es ba-
tailles & ailleurs: pource q' sās l'ayde & secours
de Dieu, les puissances humaines sont nulles.
Et si Dieu nous regarde, & qu'il soit pour nous

des gens de guerre. Fu.xciii.

quelles espées de noz ennemys nous pourrôt molester? Incontinent doncques vng deuot & sage capitaine apres la bataille, avecques tous ses gens doit remercier Dieu, avecques dons & oblations a sa maiesté, dont on l'apaise merueilleusemēt: & contrainct on donner aux hommes ce que leur leur est propice & cōuenable.

¶ S'il est permis aux Chrestiens de faire guerre.



¶ A radventure qu'entre ceulx qui liront ce present liure mien inculte & peu sçauant en l'affaire dont il traicte, pourroit s'engendrer vne question & maniere de doubte. A sçauoir mon si aux Chrestiens est permis faire guerre, pource qu'en icelles y a tant de homicides, tant de subuersions, & ruyues de citez, tant de captiuitez de hommes, & efforcemens de filles, rauissemens de veufues, & tant de autres innumerables crimes & offenses, que il n'est possible d'en faire aucun recit qui soit assez suffisant: Lesquelz maulx leur sont prohibez & deffenduz en leur loy: Mais pour les oster de scrupule, doubte, & ambiguité, il fault sçauoir briueuement que

Le Guidon

faire guerre, ce n'est péché : ains au contraire qui milite, & exerce le faict des armes plaist merueilleusement a Dieu faicteur, & createur de toutes choses. Ce que clèrement appert, & est manifeste par la beatitude & exercice militaire de saint Georges, & de David prophete, qui furent tant agreables a Dieu, & plus que nulz autres acceptables, & aussi par le Ceturion hierosolomite. Il laisse les tesmoignages dudit saint, & des autres qui afferment que militer, ce n'est pas mal faict. Que fault il dire de la sentence infallible de Christ? lequel commanda que les tributz appartenans a Cesar luy fussent renduz : afin que de iceulx il payast ses gens de guerre, & en les payant qu'il s'en seruist en la guerre pour tenir le monde en paix & tranquillité : Laquelle paix Dieu plus que meilleur, & plus que grand nous a laissée en terre pour vng magnificq & louable ioyau & precieux don. A ceste cause despriserons nous les mondaines armes, qui nous font cause de si grand bien? Certes nenny. Mais dirons que c'est le plus plaist acte qui se puisse exercer, ou faire selon le vueil de Dieu; mais que ce soit a intention que par guerre paix aduienne.

Et aussi qu'en l'exerceant les gens de guerre se contentent de leurs salaires & estat, & ne demandent d'auátage a leur seigneur que ce qu'il leur est donné, qui est suffisant a icelle maintenir, sans faire tort ny moleste a personne qui viue, sans piller & manger le bon homme, comme font aujourd'huy presque tous les gens de guerre, qui ne se contentent pas de viure seulement: mais aussi ransonnent & contraignent les pauvres gens par batteries, naureures, & tormés de leur donner de l'argent au partir de leurs maisõs, qui est chose desplaisante a Dieu, & digne d'estre punie, cõme chose inique, meschante & abhominable. Or donc & a celle fin que iceulx gens de guerre puissent avec gloire honneur, & le salut de leurs armes exercer les armes, il est besoing qu'ilz ayent les qualitez & vertuz qui s'ensuyuent. Deuant toutes choses, il fault q̃ celluy qui voudra suyure les armes soit seculier puissant de corps, & magnanime de coeur, qui pour garder son pays seulement, & pour acquerir paix cõbate courageusement ses ennemys, qui ayt suiuy, & hanté les armes, exercites, & les bandes ieunes, & qu'il soit expert a conduyre, mener, & picquer che-

Le Guidon

uault, porter & bien manier vne lance, s'accoustre & mettre a point d'un harnoys, qui soit abstinent tant en boire qu'en manger, prompt, & habille a faire & executer ce qu'il luy sera commandé par son capitaine, loyal, & plain de bonne foy, prudent, sage, misericordieux, doux & benign, esperant & se confiant en l'ayde, & en la misericorde de Dieu nostre seigneur. Toutes lesquelles vertuz si un soldard a il n'y a rien en luy qui se doibue reprendre ou redarguer: ains peult complaire a Dieu & au monde. Le bon souldard, s'il est homme de cheual, doit pareillemét porter la liurée de son capitaine pour estre recongneu de ses compaignons, & dessus son hocqueton ou robe de liurée l'enseigne, ou marque du party qu'il tient, c'est a sçauoir qu'il est François, qu'il porte la croix blanche deuant, derriere, & de toutes pars, cousue dessus son accoustrement, & ainsi des autres. Enquoy faillent les Italiens sur toutes les nations du monde: car eulx seulz portent seulement le signal au dos, & non ailleurs, ce qui ne se deueroit souffrir par le prince qu'ilz seruent, pour les meschancetez qui si peuent faire, & les inueniens qui en peuent aduenir: car toute per-

des gens de guerre. Fueil.xcvi.

sonne qui prend argent doit auoir & porter le signal du prince qu'il sert, non derriere seulement : mais deuant, dessus, dessous, & de tous costez, & encores si bien cousu qu'il ne se puisse aisément descoudre. Et pourtant que les gens de piend qui vont armez aux factiōs n'ont la commodité de ce faire par faulte de hocquetons, dont ilz n'vsent cōme gēs de cheual, il fault qu'ilz ayent des escharpes larges & plātuseuses, qui seront attachées a leurs corselets, animes, ou chemises de maille : sur lesquelles sera cousu ledict signal aīsi que dessus, & ou il s'en trouueroit quelque vn qui ne le auroit, il le fauldroit punir comme trahistre ou espie, sans auoir esgard a quelque congnoissance qu'il pourroit alleguer. Autrement l'enemy se pourroit meller avecques toy, sans estre congneu, & par ce moyen entendre tes deliberations & entreprinſes, dont tu te dois principalement garder.

Le-Guidon


CCeulx qui vont a la guerre ne doibuent
auec eulx rien porter de precieux, soit
habillemens ou autre chose.




Vand nous allōs a la guer
re nous ne deuōs rien por
ter ne mener auec nous,
fors noz armes & noz che
uaulx: mais toutes beson-
gnes precieuses, cōme ba-
gues, habillemēs, chaines,
or & argent laisser en noz maisons : & encores
que ce fust en villes que nous allissions pour
la deffense d'icelles, A celle fin q̄ noz ennemys
pour l'esperāce & cupidité de gaigner, & auoir
nostre despouille ne se rendent plus forts, &
plus courageux: Ce qui aduient souuēt, car c'est
vne chose presque cōmune & naturelle a tout
le monde, que la ou on sçait gaing & prouffit,
qu'on n'estime la peine guieres grāde, & la ou
sont les richesses pour en auoir, nul ne reffuse
le peril. Il est doncques de necessité aux gens
de guerre laisser leurs velours, & leur soye en
leurs maisons, ainsi que i'ay dict dessus : affin q̄
nous ne cōtraignons noz ennemys a nous def-

des gens de guerre. Fueil xcviij.
faire, & que nous ne croissons & augmentons
leurs couraiges, qui pourroyët estre sans l'espe
rance de gaigner timides, craintifz & paoureux.

¶ Si nous voulons infestez & gaster les
eaues de noz ennemys.

 I nous voulons gaster, infester, into-
xicquer & empoisonner les eaues de
noz ennemys, il ne sera point mau-
uais iecter en la partie haulte de la riuiera au
dessus du camp, ou de la ville d'iceulx gran-
de quantité de glasti contusi, c'est vne drogue
qui se trouue chez les apoticares, & p ce moyē
leur eaue sera amere, en sorte que les hommes
& bestes n'en sçauront boire.

¶ En quel lieu vne bataille se doibt faire.

 Rincipalement regarde vn capitai-
ne qu'au lieu où il veult dōner la ba-
taille a ses ennemys, qu'il mette (s'il
luy est possible) l'eaue audos de son
armée par le refraischissement, de laquelle les
cheuaulx las se puissent refraischir & repren-
dre vigueur. Et qu'il mette toute diligēce que

N

Le Guidon

ses ennemys en ayent faulte: car par la prolongation de temps les cheuaulx de ses ennemys se ferōt las & foibles par la faulte d'eau, dont ilz auront neceſſité: & par ce moyen facilement obtiendra & aura victoire.

¶ Qu'il fait bon auoir munition d'archiers avec arcs & fleſches en vne armée.



L est merueilleusement proffitable auoir en vne armée grand nombre de gens de pied, avec arcs & fleſches, ainſi q̃ les Angloys ont accouſtumé, pource qu'aux coups de leurs fleſches, il eſt merueilleusement difficile de ſe garder & deffendre, quelques pauois ou rondelles qu'on aye, Et auſſi qu'un cheual eſt plus empesché d'une bleſſeure de fleſche que d'autre traict a feu.

¶ De l'assaillir fait legierement.



S I les gens de cheual en vne rencontre de mille pas, & les gens de pied par cinq cens pas viennent courant contre nous par ſoubdaineté & cha-

de gens de guerre. Fueil.xcviii.
leur, qui est en eulx pour nous rencôtrer, il ne
nous fault bouger aucunement : mais les fault
attendre pied coy : & vigoreusement les rece-
voir presque hors d'allaine, & les battre & aba-
tre vaillamment : Ce que nous pourrons faire
sans grād' peine, pource qu'ilz seront las, hors
d'allaine & trauaillez de leur courir long &
prolix.

¶ De preuenir ses ennemys au chemin.



I nous pouons entēdre quel
le part tyrent noz ennemys
ce ne sera pas mal faiēt de
faire marcher soubdainemēt
nostre armée au lieu ou no^s
aurons esté aduertyz qu'ilz
passeront : Affin que la nous
choysissions le lieu qui sera
le plus a nostre aduantaige, & que y mettions
embusches pour les cōbatre & deffaire, & eulx
venuz les assaillir de toute nostre force. qui im-
pouruez, & ne leur donnans garde de nostre at-
tente, & aguet seront facilement estonnez &
chassez.

¶ Quand on combat en lieux estroictz.

N ii

Le Guidon



I en quelque lieu estroict tu rencontres tes ennemys, & que la il te faille les combattre, & que chascune des deux armées s'efforce courageusement de garder son lieu ia occupé & prins, sans fieschir le pied, ou si ou la, ie te conseille que ce pendant que les vngz cōbatront, & qu'ilz amuseront tes ennemys (que prinse vne partie des compaignons de ton armée, faignant la mener plus loing) tu donnes par derriere viurement en tes ennemys, lesquelz assailliz deuât & derriere n'auront puissance de resister, ny de fuyr.

¶ Que trop grand confiance en la guerre se doit fuyr.



'Il nous est donné faculté de combattre vne partie de noz ennemys, auecques toute nostre puissance nous ne deuons point (folement nous fiant en nostre force, grand' & quantité de gens) reffuser, ny differer a les combattre, quelque bonne esperance que nous ayons encores d'estre assez forts, pour les bien battre, & surmonter tous ensemble: Affin que nous ne mettions en doub-

des gens de guerre. Fu.xcix.

te ce, qui nous seroit clairement cōgneu, c'est a sçauoir que la partie(ainsi auecques l'occasion surprise) seroit facilement deffaicte, & douteux de gaigner, & vaiucre icelle rassemblée, & ioincte auecques son troncq, ce que ne debuōs attendre : si a part nous la pouons deffaite : car tant plus de morts, & moins d'ennemys.

EQu'vng capitaine doibt commander que nul ne prenne a rançon son ennemy deuant qu'il donne le signe.



I as enuie d'auoir certaine victoire de tes ennemys, tu doibs faire commandement a tous tes souldars sur peine bien grande: qu'il n'y ayt nul d'eulx qui prene, & reçoynie a mercy, ou rançon aucun de ses ennemys: iusques a ce que le signe pour ce faire soit par toy donné, & ne sera sans cause que tel commandement se fera. Pource qu'aucuns de tes souldars a prendre prisonniers ne perdra son temps: mais plus tost s'efforcerōt tous mettre leurs ennemys en fuyte. Iceulx prosterner, & occire, affin que tost, & legierement ilz puissent auoir le signe promis par toy.

N iiii

Le Guidon

¶ Qu'il ne fault habandonner le lieu,
ou le capitaine te met.

BEaucoup de bōs souldars & autres q̄ cui-
dēt estre pl^sages & mieulx enguerroyez
q̄ leur chef, ou capitaine, ou pour esperā-
ce de gaigner & auoir hōneur, habādōnent le
lieu, la place, & le quartier, ou quel par icelluy
sont mis, qui est la cause q̄ souuēt de biē gran-
des armées sōt mises en ruyne. A ceste cause il
fault necessairemēt que pour mort, & pour vie
iceulx souldars obeissēt du tout en tout a leurs
capitaines, & aux cōmādemens p̄ iceulx faictz,
sans pl^s sçauoir qu'il n'e de besoīg, & qui autre-
mēt le fera doibt estre puny p̄ mort: encores q̄
eust biē faict: cōme il fut iadis pl^s cruellemēt q̄
iustemēt practiqué p̄ Mālius Torquat⁹ cōsul
Romain, qui ayant guerre aux Latins feit vng
edict & cōmādemēt, q̄ sur peine de mort aucū
ne p̄sumast cōbatre hors de sō ordre & lieu. Or
aduit q̄ Genutius Metius capitaine de la gēdar-
merie Tusculane puoca p̄ parolles, & appella
le seul filz dudiēt Māli⁹ qui pour n'estre veu las-
che cōtre le cōmādemēt de son pere cōbatit le
dict Genutius Metius: & le tua. Neātmoīs son
pere luy feit coupper la teste: pōurce que cōtre

des gens de guerre.

Fueil.c.

son edict il auoit combatu hors son ordre.

¶ Qu'il ne fault laisser ses têtes sans garde.

Quand tu sortiras ton fort pour dōner le cōbat a tes enemys, souuiēne toy de ne laisser iceluy sās gardes: affin q̄ ce pēdāt que tō armée seroit empeschée ou cōbat, q̄ tes têtes, tō fort, & tout tō bagage ne fust prins & rauy p̄ aucune partie de tes aduersaires, ou biē eulx bruslez & mis en cēdres qui te seroit cause, puis apres de ne sçauoir lieu, ou q̄ tu te peuf ses retirer a saulueté, ou au couuert.

¶ Qu'il ne fault vne armée pres de l'autre estre sans armes.

S'Il aduient que le camp de tes ennemys soit pres du tien, tu ne doibs pour quelque promesse qu'ilz te facēt, ou par quelconques trefues que tu ayes avec eulx permettre ton camp du tout estre sans armes: mais tu doibs tenir tousiours p̄tie de tes gēs en armes, qui diligēmēt & de iour & de nuyt gardēt tō camp: car souuent au tēps de paix & de trefues les armées pleines de trop grāde cōfiāce ēuers leurs enemis sōt chassées & deffaictes, & ceulx que p̄ vertu bellique ne s'eufset peu auoir par fraudes & trahisons facilement se surmonter.

N iiii

Le Guidon

¶ De faire vng pont de cordes.



N a accoustumé pour faire passer les riuieres a vne armée faire des ponts de bois : pource qu'elle ne pourroit passer sans grand naufrage ou perte avec des basteaulx: dont le plus souvent on a deffaulte. Or pour autant que plusieurs fois aduient, que pour faire & construyre iceulx ponts de bois la matiere fault: & aussi que pour la lōgue demeure que pourroit faire ladiēte armée a attendre la fin & consummation d'vng tel courage, dont il pourroit ensuyure dommage en icelle bien grand. Le conseil est que par la multitude de grosses cordes & lōgues se face vng pont: & d'vne part & d'autre de la riuiere que tu voudras passer, soit grand nombre de gros paulx de bois: esquelz icelles cordes soient attachées, & au meillieu de la riuiere soient mises & affichées de part & d'autre deux grans moules d'arbres: affin que le fons du pont soit plus ferme & de plus grande feureté a ceulx qui passeront. Ainsi le passer sera facile & diligent. Avec ce l'armée pourra tousiours auoir & porter telle maniere de pōt Affin que la diligence du chemin qu'on voul-

des gens de guerre. Fueil.ci.
dra faire , soit plus viftement executée. Et est
vne inuention merueilleusement bonne, pour
abbreger chemin.

¶ De la maniere d'oster son armée d'vng
lieu qui n'est prouffitable.



Es frais, despenses, & domma
ges sont plus grands a vne ar
mée envng lieu qu'en l'autre.
A ceste cause si tu as cōgnois
sance que la demeure en vng
lieu te soit dōmageable & pe
rilleuse, tu te doibs retirer au
tre part en donnant assault aux villes , brulant
les villages , despouillant & gastāt les champs
de tes ennemys. Et d'anantage tu doibs tou
iours le plus qu'il te sera possible mettre toute
diligence en ce cas , que tu contraignes le plus
tost tes ennemys a te suyure, qu'eulx toy: tou
tesfois il ne fault que par trop grande enuie
de gaster les biens d'autrui , tu habandonnes
& delaissses les tiens desers , saas emolument &
prouffit.

¶ Comment il est besoing de faire en vne
ville, si tu as besoing d'eaue.

Le Guidon



I d'aventure tu es assiegé en vne ville, en laquelle soit penurie & deffaillâce d'eau, le cōseil te fera bõ apres en auoir ietté & mis hors la multitude de gens que tu cuyderas ne te sçauoir seruir a la tuition & defense d'icelle que tu faces tuer & meurdrir toutes les bestes qui seront en ta puissance: lesquelles tu feras tresbien faller pour subuenir a la faim de toy & des tiens: affin que l'eau qu'elles pourroient boire soit sauuée & gardée pour ton besoing, & en ceste sorte tu pourras longuement soustenir l'obsidion & siege de tes ennemis.

Qu'il fault le plus que lon peult tascher a recouurer ses villes perdues.

SI au temps d'estre par trop plus grande multitude de tes ennemis que la tiens, ou par aucune trahyson tu as perdu quelques villes ou chasteaulx qui estoient a toy, tu dois au temps d'hyuer mettre tout soing, toute peine & diligence de le recouurer & mettre en ta possession, ce pendant que tes ennemis se sont retirez pour hyuerner en leurs maisons: affin que ce que tu n'as peu garder en esté,

des gens de guerre. Fu.cii.
ou par deffaillance de gens, ou par la couardise
d'iceulx, ou temps hyemal par plus grand nō-
bre & prouesse des tiens, tu sois remis en ce qui
t'appartient. Et par le recouurement de telles
villes perdues tu puisses acquerir pris, hon-
neur & renommée de magnanimité : ou du
moins que tu ne tumbes a honte, & renom de
laschete.

Qu'il fault brusler le fort & les tentes
de ses ennemys s'il est possible.



Les têtes ou le fort de tes en-
nemys est faict de choses sei-
ches & combustibles, tu doibs
mettre du trauail & sollicitude
qu'il soit bruslé & mis en feu
par aucun de tes gens les plus
idoines & conuenables a cela, & principale-
ment quād le vent est grand: car par ce moyen
de leurs bestes, & de ce qui appartiendra a leur
viure, ilz serōt spoliez & priuez, pource que le
vent agitera & chassera la flamme par tout ce-
ste matiere seiche, qui en petit de temps sera
bruslée, arse, & consommée. Et lors te sera grā-
de occasion (ce pēdant que tes ennemys seront
occupez a estaindre telle arsure) de enuahir

Le Guidon

& assaillir iceulx, & de les deffaire: pource que eulx en doubte sçauront assez mauuaiselement auquel ilz deburont plustost courir, on au feu, ou a leurs ennemys. Perte, & arsure d'vng costé les tiédra, & craincte, & paour d'autre part les assauldra, parquoy facilement seront tous prins, ou tous desconfitz.

¶ Qu'il fault faire quand il est presque impossible de fuyr & eschapper le lieu ou nous serons.



L aduiét souuét que cōtre nostre esperāce nous venons & tombons en vng lieu: au quel nous ne pouons pas bien sortir, ou y estre lōguemēt sans grand perte & dommage de noz gens. Doncques en telle perplexité & anxieté, qu'il nous seroit bon de faire diligēmēt fault entendre, & nous enquerir. Toutesfois apres auoir longuemēt cherché. Je ne trouue mcilleur chemin pour en eschapper que de prendre & auoir trefues auecques noz ennemys, pendant lesquelles par de noz gens les plus fins & cauteleux leur donneras esperāce de paix. Attédans laquelle qu'en leur

des gens de guerre. Fueil.ciii.
armée toute chose se feront plus negligement
que deicoustume, & moins se garderont & tiē-
dront sur leurs gardes que silz n'esperoyent q̃
la guerre:parquoy lors que tu verras que tu te
pourras licitemēt oster,ou de nuit,ou de iour
de ce lieu la difficile, & a toy mauuais, tu doibs
mettre toute diligence a t'en oster, & le plus
soubdainemēt qu'il te sera possible, & quelque
fois s'il est bon qu'ainſi se face, tu doibs vaillā-
ment assaillir tes ennemys pour eſchapper de
ſi grand peril.

CAſſin que noſtre gendarmerie ſe mon-
ſtre de plus grand nombre qu'elle n'eſt.



Aſſin que nous perſuadiōs a noz en-
nemys que nous auons plus grand
nombre de gens d'armes que nous
n'auons, Il fault que les varletz, &
les pages de noſtre gendarmerie nous faſſions
tresbien armez, montez ſur noz cheuaulx, &
tenir lances en leurs mains toutes droictes &
d'iceulx faire noz bādes aſſez loing, toutesſoīs
de tes ennemys, leſquelz cuyderont a les veoir
ainſi de loing que ce ſoyent tous bons gendar-
mes, & par ce moyen ilz pourront auoir crain-
cte de nous aſſaillir, d'autant qu'ilz verrōt en-

Le Guidon

cores. tāt de gens en nostre ayde, & tant de bādes si entieres qu'ilz auront cuydé au parauāt estre presque toutes deffaiçtes.

¶ Qu'il se fault garder de tenir lōguemēt siege deuant vne ville, a laquelle on ne peut empescher secours.

IL fault totalement se desister de tenir siege deuant vne ville ou chasteau, a laquelle de iour en iour maulgré no⁹ on peut enuoyer ayde, viures, & mettre gēs: car p telles munitiōs & étrées de gēs fraiz l'expugnatiō en seroit merueilleusemēt difficile, mesmes il est presque impossible de prédre & mettre en sa subiectiō telles villes ou chasteaux pource q̄ pour les blecez de iour en iour elles pourrōt auoir des sains & entiers hōmes a leur ayde & secours pour les mors des viuās en lieu de penurie abōdāce de viures & de munitiōs: p quoy nous faudroit incessāmēt cōbatre cōtre gens fraiz, sains & biē nourriz, qui nous seroit chose merueilleusemēt de grosse encōbre: toutesfois nous ne desprisons pas q̄ enuers icelles villes nous ne vsions aucunesfois d'assaulx & de sieges: mais il fault que cela se face le plus vigoureuxmēt & soubdainemēt qu'il nous sera possible sans arrester longuement, & tenir

des gens de guerre. Fueil.ciiii,
siegé deuant elles, autrement ce seroit honte
pour nous, & honneur pour noz ennemys.

¶ Quand tu veulx assaillir par guerre quel-
que pays difficile a auoir.

S I tu veulx assaillir, & mettre soubz ta main
quelque pays malaisé, pourtant que l'oppu-
gnation de toutes, ou de plusieurs villes & cha-
steaulx est de tresgrand peine & difficulté mer-
ueilleuse, tu dois par gens de grand auctorité,
& de bonne renommée faire promettre a icel-
les villes & chasteaulx la remission, & quitan-
ce entiere de tous & chascuns les tributz, tail-
les, impositions ou autres charges que ce soit
qu'elles auroyét accoustumez de payer: laquel-
le promesse tu iureras tenir a iamais stable &
permanente s'ilz se rendent, & mettent de bon-
ne volonté, & sans ctonraincte en ta mercy &
soubz ta main: car il n'est riens plus agreable a
vn peuple q̄ d'estre en liberté, & ne payer riens
de toutes telles manieres de tailles.

¶ Qu'il fault faire des espies de tes enne-
mys, s'ilz tumbent en tes mains.

S I les espies de tes ennemys tōbet d'a-
uerture entre tes maïs, il ne sera poit
mauuais aucunesfois de leur faire
quelzques bons presens, & les laisser
en aller, & leur promettre que si de la en auât,

Le Guidon

ilz veulent tant faire pour toy, que de te declarer le secret de tes ennemys & leurs entreprises que tu leur feras bonne recompense & satisfaction de leur aduertissement: car il n'est en vne guerre riens plus vtile, plus seur, & plus necessaire, que de iour en iour congnoistre, & sçauoir le cōseil & secret de son ennemy, pour ce qu'en cela que nous aurons preueu & sceu, il ne nous peult faire molester, au moins ou bien petit. Tant que tu pourras donc ayes ce soing & sollicitude d'entendre, ouy toutes les heures du iour la deliberation de tes ennemys & ne fais en cela aucune espargne d'or ou d'argent, encores moins de promesses. Pour vray si tu renuoyes ainsi icelles espies sans faire aucune interrogation ou demande du fait de tes ennemys, ce leur donnera grand signe de ta cōfiance, seureté & bon coeur, qui sera vne chose qui les contristera & espouentera terriblement: toutesfois en tout ce que tu feras prens ton conseil, & du temps & de de ton affaire. En cecy messire Guillaume du Bellay, seigneur de Langey, tresexpert & sçauant gentil homme a esté vigilāt, & n'y a iamais espargné son biē, en quelques charges qu'il ayt esté

des gens de guerre. Fueil.cv.

mis par le Roy son maistre : Par ce moyen il a tousiours ou a peu pres sceu le conseil de ses ennemys. C'est grande perte pour nostre republiq^{ue} Françoisse, d'auoir perdu si tost vn si grád personnaige de sens & de bon sçauoir, liberal comme vn Alexandre, saige comme vn Cato censorinus, prudent comme vn Iulius Cesar, & sçauant comme vn Ciceron, qui n'a iamais eu rien propre, mais a tousiours preferé le public a son particulier, chose rare & peu acoustumée au temps present, ouquel entre les hommes est perdue, & du tout estaincte la charité euangelique, qui ne scait iamais ce qui est sien: Je passe ceste nostre infelicité pour reuenir a mon propos.

¶ Qu'il ne se fault point seulement ayder d'vne espie.

IL fault que tu ayes souuenance de ne t'ayder & seruir en la guerre seulement d'vne espie : car souuentefois subornée & gaignée, ou par promesses, ou par dons, il pourroit aduertir tes ennemys de ton entreprinse & volonté: Et ce qu'il te seroit

O

Le Guidon

moins necessaire & executable il te diroit au plus loing de sa pensée : a ceste cause il fault que tu mettes peine d'en auoir quantité, encores qu'aucun d'eulx ne congnoisse l'autre : car par ce moyen tu congnoistras la faulceté de l'un par le rapport des autres, laquelle congnoissance des pieux faulx, trahistre, & méteur, le fault incontinent miserablement faire pendre.

Pour cōgnoistre si tes ennemys ont paour.



¶ And tu seras tant approché en vng assault, ou en vne escarmouche, ou en vne bataille de tes ennemys, q̄ tu les pourras aisement choyrir a l'oeil, si tu vois leur bois, lances, picques ou hallebardes se frapper ensemble, ce te fera vn euidēt signe de leur paour & coniecture de leur fuytte aduenir, & te prouffitera aucunes fois auoir l'intelligence de telle crainte.

Pour recouurer la santé d'une armée infectée de quelque maladie.

des gens de guerre. Fu.cvi

SI tu desires recouurer la premiere santé de ton armée infectée par peste, ou autre mal contagieux & mortel, tu doibs icelle sans attendre la faire changer de place, & d'air, & la mener es lieux montueux ou sont les plus haultes montagnes.

¶ Pour acquerir la bienveillance de ses soldards.

LE capitaine s'il est diligent, & qu'il soit solliciteux a visiter, & faire guerir diligemment ses gēs vulnerez & blecez en la guerre, Pour vray en telle sorte il gaignera leur coeur & amytié, qu'ilz n'auront honte ny crainte reuenuz en leur premiere santé, pour son honneur exposer, & aduenturer leur propre vie.

¶ Du feu ardent en l'eau.

EN bataille de mer, il est tresvtile de compenser & faire vn feu artificiel pour brusler les nauires de ses ennemis, & l'eau mesmes, quelque habondance de humeurs aquaticques que ilz

O ii

Le Guidon

puissent iecter dessus. En ceste maniere feut
bruslée n'y a pas long temps vne nauire de Sar
razins pres Constantinoble, parquoy conuint
au capitaine d'icelle nauire, prins prisonnier,
pour sa rançon payer tous les ans a l'Empereur
de Constantinoble cent marcs d'or.

¶ Quand les capitaines d'une armée sont
en different a quelles villes premiere-
ment ilz deueront donner l'assault.



L aduient aucunesfois qu'il se
engendre diuerses sentences en
vne armée, pour l'oppugnation
des prouinces & des villes d'i-
celles, & sont souuent les capi-
taines differends en opinion: car l'un dict d'un
& l'autre d'autre, principalemēt quand ilz sont
egaulx & semblables en auctorité & puissan-
ce. A ceste cause il est bon de sçauoir qu'il est
de faire en si grande varieté d'oppinions, pour
satisfaire a la volonté de chascū. Pour les met-
tre donc d'accord il fault que la chose soit finée
p fort en ceste maniere, il fault escrire le nom
des prouinces ou des villes en petitz papiers

des gens de guerre. Fueil. cviii.
billetz de bois, & les ietter en vne cruche, ou
autre vaisseau: puis y faire mettre la main par
vng enfant, & le papier, ou billet de bois, au-
quel sera escript le nom d'une des villes q l'en-
fant premier tirera dehors, que par commun ac-
cord tous ensemble se retirent a surmonter ou
assaillir icelle ville aïsi escripte ou choisie. Tel-
le maniere de faire ne sera poit mauuaise: pour
tant qu'il se pourroit ensuyuir par leur discord
& cōtrouersité de grâdes dissentions qui pour-
roient estre dommageables & pernicieuses a
toute l'armée.

¶ Qu'il fault prendre vengeance d'une
foy & promesse violée.

Combien que toutes iniurés se doib-
uent oublier, & que ce soit le faict de
vng hōme de bō cueur les mettre tou-
tes au neant, toutes fois l'iniure de foy
rompue, & promesse violée se doit punir &
venger indubitablement. Ce qu'ont tousiours
observé les anciens Romains, Empereurs de
l'vniuersel monde.

¶ La maniere d'assaillir les villes
de mer.

O iii

Le Guidon



V que tu pourras faire approcher tes nauſz ou galleres des murs de la ville de mer que tu voudras prendre par affaulx, pour faire reculler & oſter les gens, qui ſont pour la tuitiõ & deſſe d'icelle: tu doibs aupres des maſtz faire lier enſemble de bons liens & fors toutes nauires, & ſur elles faire cõpoſer des ponts de bois aſſez puiſſans: deſſoubz leſquelz tu doibs faire mettre tous tes harq̃bouſiers: affin qu'a coups de harquebouze ilz chaffent ceulx qui ſont ſur les murailles. Et par ce moyen tu puiſſes faire leuer tes eſchelles de longs des murs ſans danger des deſſendans, & conſequemment par ce lieu meſmes prendre d'affault icelledictẽ ville. Ce qu'il te ſera plus que facile, en bien gardant ce conſeil.

¶ Q n'il fault faire quand on n'a l'eau
que par fontaines.



Vand nous ſõmes cõtrainctz par neceſſitẽ d'eau de nous ayder ſeulement des fontaines, il nous ſera grãd beſoing de faire garder icelles fontaines & de iour & de nuyt: af-

des gens de guer^e. Fueil.cviil.
fin qu'elles ne puissent estre iⁿoxiquées & en-
uenimées par noz ennemys, au dommaige de
nous & de noz gens, ce qui seroit facile a adue-
nir, si elles n'estoyent en ce songneusement de
fendues.

¶ Pour abuser noz ennemys sur mer.

S I nous enfuyons deuant noz ennemys
en la mer, pourtāt que nous ne sommes
assez forts pour eulx, & que par iceulx
nous soyons viuement suyui^z & chauldemēt
chassez, & qu'ilz soyent ia tant approcher de
de nous, qu'il ne reste presque que le comba-
tre, pour les deceuoir, il te sera vtile & de
besoing, que tu faces soudainement demou-
rer ta nauire ou gallere, sans plus auāt faire ra-
mer, faisant semblant de vou^loir combattre &
dissimulant ta pensée: toutesfois il fault que
tes gens soyent aduertiz qu'apres leur auoir
donné signe de s'en aller qu'ilz gagnent pays
tant qu'ilz pourront, faisans voile, ou ilz cuy-
deront estre en seureté: Affin que tes enne-
mys cuydant estre venuz au combat laissent &
abandonnent leurs rames, & leur equipage ma-
rin, pour prendre & vestir leurs armes, & s'ap-
prester pour te choquer, ce q^u ferōt diligēment

O iiii

Le Guidon

Mais quād tu les verras biē armez & pres pour t'assaillir, tu doibs incontinent donner le signe promis, & enseigné a tes gens qui rameront a puissance pour iuestir port au lieu de leur saulueté. Par ce moyen tu pourras eschapper des mains de tes ennemys lesquelz chargez & empeschez de leurs armes ne pourront faire si grā de diligence a te suyure comme tu pourras faire a les fuyr, & a eschapper d'eulx.

¶ Quand ton armée est en bien grand peril.



V q ton armée sera en extreme dāger qu'il n'y aura plus ou bien petit d'esperance de se sauluer, ou d'auoir hōneur de la iournée: tu doibs te mettre a pied, & cōmander a toutes gēs de cheual de faire ain- si se tu vois qu'il soit besoing le faire, affin que le peril d'eulx, & de toy soit ton egal, & aussi qu'eulx congnoissans, & voyans ton danger, & le leur combatēt plus ardamment, & que plus obstinemēt resistent a la puissance de leurs en-

des gens de guerre. Fu.cix
nemys: Si qu'ilz congnoissent aucune esperance d'eschapper, ne leur pouoir estre bõne: mais que tous les fauldra la mourir sans matter & vaincre leurs ennemys, ce qu'ilz s'efforceront faire pour sauluer leur vie, de laquelle en ce monde n'est riens plus requis & amyable.

¶ Qu'il fault faire quand les ennemys sont si pres qu'il ne reste que les combatre.



Vand tes ennemys sont si approchez de toy qu'il ne reste que les combatre, tu doibs promettre a tes gens de guerre les faire tous riches & puissans en biens, si iamais Dieu te donne la grace de venir au dessus de tes ennemys, s'en leur remõstrant que c'est le iour que tu doibs vaincre par leur bien faire, & que celluy iour est le dernier de toutes leurs miseres, perilz, soing, & pauureté: mais qu'ilz fassent leur debuoir de estre vaincqueurs & maistres. A quoy ilz tacheront merueilleusement tant pour l'occasion & esperance qu'ilz ont en tes biens, que aussi

Le Guidon

pour estre quittes de tant de maulx où ilz sont subiectz de si long temps pour faire si longue guerre.

Pour esmouuoir ses ennemys, & les contraindre a venir au combat.



I tu desires combatre tes ennemys, ou pour q̄lque vtilité que en cela tu cuydes aduenir a ton armée, ou bien cōtrainct par necessité: ie te conseille que tu les y incites par large & plantureuse depopulation & destruction de leurs biens champestres ou par iniures, reproches & contumelies, par lesquelles irrites & prouocquez souuent tu les pourras attirer & esmouuoir inconsiderement descendre & venir au combat: lequel il te souuiendra iamaiz ne faire ot consentir, si premierement tu n'es bien aduerry, & seur d'estre plus fort qu'eulx en toutes choses, & aussi qu'iz ne te pourront nuire en icelluy conflict par finesse, ou par ebusches: desquelles tu te doibs garder sur toutes choses. A ceste heure la que tu te sentiras plus aduantageux, & qu'il ne te

des gens de guerre. Fueil.cx.
peuent nuyre sinon bien petit, tu ne leur doibs,
iamais reffuser la bataille d'armée cōtre armée
ou de gens a gens.

¶ Vne maniere d'aller en vn assault:



N vn assault de ville doib-
uent principalement estre
enuoyez les souldardz qui
sont les mieulx armez. Af-
fin de soubtenir mieulx la
deffense de leur ennemys:
Car en tel affaire peu y val-
lent les hommes nudz, pource qu'ilz sont plus
tost renuersez, ce qui dōne empeschemēt mer-
ueilleux aux suyuaīs, & craincte & retardemēt
a leurs compaignons. A ceste cause ie te cōseil-
le q̄ tu y enuoyes les mieulx couuers d'armes,
& deuant tous ceulx la qui ont corseletz, halle-
cretz & animes, pource que telles armes sont
plus malaisées a rompre que la maille, Toutef-
fois tu regarderas auant que les y enuoyer de
leur faire oster leurs cuyssotz ou tassettes: pour
ce que tel accoustrement en ce cas ne sert vo-
luntiers que d'empeschement.

Le Guidon

¶ Des armes qu'on doit porter a vng assault.



Our autant que toutes armes ne sont propres & conuenantes a porter a vng assault: Je suis d'aduis que ceulx la que tu y enuoyeras ayent sur tout rondelles, pauois, ou tarques pour garder & deffendre les coups d'en hault, qui sont quelque fois si violens qu'il n'y a si bon arme t, cabasset, ou morion qui ne soit froissé avecques la teste, & ceruelle ne celluy qui le porte. Pour a quoy obuier sont merueilleusement necessaires lesdictes rondelles, pauois, ou tarques: car non seulement on en deffend la teste: mais aussi generally tous les autres membres de l'homme. Quant aux bastons qu'on doit porter hallebardes y sont tresvtils & tresbons plus beaucoup que pertusannes, ou iauelines, pour ce que les hallebardes ont poincte & tranchât avecques deffence & garde: ce que n'ont les iauelines & pertusannes: routes fois ie ne vueil dire qu'ilz n'y soient bons s'ilz sont accom-

des gens de guerre. Fueil.cxi.
paignez de rondeliers, ce qui leur est necessai-
re pour leur deffense & seureté: ce qui n'est re-
quis du tout a ceulx qui y vont avec hallebar-
des pour les causes dessusdictes, qu'ont prati-
qué ceulx qui se sont souuent trouuez en telles
affaires.

● A IEHANNE DE LONGUEUAL, dizain par L'auteur.

Ne plus ne moins que Mars vergongne n'a
De sa Venus belle, & droicte de taille
Qui l'accompaigne avecque Bellona
Souuentesfois quand il marche en bataille
Ie n'auray honte, encores qu'on s'en raille
De te donner'entre mes armes place
(O Longueual) de qui la bonne grace,
D'une amytié loyalle accompagnée
Merite plus que Venus, n'y l'audace
De Bellona, aux armes enseignée.

Dieu, & nom plus.

**¶ Fin de l'Art & Guidon des gens de guerre,
nouuellement imprimé a Paris, par Iehan
Real, demourant au coing de la rue
du Meurier, a l'image sainte
Geneuiefue, le vingtiesme
iour d'April, Lan mil
cinq cens cinquante
& deux.**

